

Գեղամ Մ. Բաղայան

ԱՐԵՎՄՏՅԱՆ ՀԱՅԱՍՏԱՆԻ ՊԱՏՄԱԺՈՂՈՎՐԴԱԳՐԱԿԱՆ ՆԿԱՐԱԳԻՐԸ ՄԵԾ ԵՂԵՌՆԻ ՆԱԽՕՐԵԻՆ

Մաս ութերորդ: Սասուն պատմաաշխարհագրական մարզը և Բաղեշ (Բիթլիս) քաղաքը

Բանալի բառեր – Առաջավոր գյուղեր, Հուրյան-Պետոյան, Տավորիկ, Խուր-Բռնաշեն, Հագո քաղաք, Խուլփի, Իսյանի իշխանություն, Խարզանի իշխանություն, Թաղի գլուխ, Կարմրակ Սուրբ Նշան առաջնորդանիստ եկեղեցի, Ավեր մեյդան, Ավելխու թաղ, Ծապրկորու թաղ, Գոնոց թաղ, Ամիրդով (Ամիրդոլի) Սուրբ Հովհաննես Մկրտիչ, Խնդրակատար Սուրբ Աստվածածին:

Մուտք

Ընթերցողի ուշադրությանը ներկայացվող Արևմտյան Հայաստանի պատմաժողովրդագրական նկարագրին նվիրված ուսումնասիրության **վերջին մասը** կազմված է 2 բաժիններից: Շարունակելով Բիթլիսի (Բաղեշի) նահանգի նախաեղեռնյան ժողովրդագրական պատկերի ուսումնասիրությունը՝ նախ ներկայացվում է Հայոց պատմական հիշողության մեջ հավերժացած **Սասուն** պատմաաշխարհագրական մարզը՝ համապատասխան քարտեզով, և ապա՝ նահանգային կենտրոն **Բաղեշ** (<Բաղաղեշ) կամ **Բիթլիս** քաղաքը:

Ա. Սասունի հայությունը Մեծ եղեռնի նախօրեին

Սասուն պատմաաշխարհագրական մարզն ընդգրկում էր Բիթլիսի (Բաղեշի) նահանգի հարավարևմտյան խոշոր հատվածը: Թեև պաշտոնապես այն մասնատված էր Բիթլիսի, Գենջի, Մուշի և Սղերդի սանջակների միջև, սակայն հայկական ավանդական ներքին վարչական բաժանումը կենսունակ է եղել և պահպանվել է անգամ 20-րդ դարասկզբին: Այդ իսկ պատճառով նպատակահարմար ենք համարում Սասունը ներկայացնել ըստ հնուց եկող հետևյալ բաժանման. 1. **Առաջավոր գյուղեր (Առաջավորաց Սասուն)**, 2. **Շատախ** և **Ծովասար**, 3. **Տավորիկ (Քարակ)**, 4. **Իշխանձոր**, 5. **Գավառ (Կավառ)** կամ **Բուն Սասուն**, 6. **Փասնք** կամ **Փասնաց**

Թ (ԺԵ) րարի, թիվ 2 (58), ամբիլ-հունիս, 2017
վլն համահայկական հանդես

*Ընդունվել է տպագրության 28.05.2017:

գավառ (Քուսանաց գավառ), 7. Խուլթ-Քոնաշեն, 8. Մոտկան, 9. Մարաթուկ կամ Խարզանք (Վերին Խարզան), 10. Հազո-Խարլջոզ կամ Հազվան, 11. Խիանք, 12. Խուլփ, 13. Գազկու գավառ (Գավառ) կամ Հավեղան (Հավեղիկ), 14. Խարզան (Ղարզան):

Սասունում հայերն ընդհուպ մինչև Մեծ եղեռն կազմել են երկրամասի բնակչության բացարձակ մեծամասնությունը՝ 55000-60000 մարդ: Ընդ որում, Սասունի կենտրոնական և հյուսիսային շրջանները՝ **Վերին Սասուն, Առաջավոր գյուղեր, Շատախ, Ծովասար, Փսանք, Տավորիկ, Իշխանաձոր (Իշխնձոր)** գավառակներով կամ գյուղախմբերով, զուտ հայաբնակ էին (չնչին բացառություններով): Սա պատահական չէր, քանի որ երկրամասի այս հատվածում մինչև 19-րդ դ. 70-80-ական թթ. պահպանվել էր հայկական պետականության արտահայտություն համարվող Սասունի կիսանկախ իշխանությունը: Վերջինս մի շարք կառավարող (իշխանական) տոհմերի դաշնություն էր, որոնցից էին **Հոլոյենց (Պետոյենց), Քաջառենց կամ Քաջհայրենց, Տավորիկցիների (Դավլորցիներ), Բերմցիների (Պերմցիներ)** ընտանիքները: Մոտավոր հաշվարկներով **Վերին Սասունի** իշխանությունների գինական ուժը կազմում էր 4000-4500 մարտիկ: Սասունի որոշ շրջաններում, ինչպես, օրինակ՝ **Խուլթում, Կուսզետի** ձորագավառում, ստեղծվել էր առանձնահատուկ կարգավիճակ՝ ի դեմս հայ-քրդական, իսկ **Խարզանում**՝ հայ-եզդիական համադաշնությունների: Ի դեպ, անգամ **Սասունի** արևմուտքում՝ **Խուլփում**, և արևելքում՝ **Հազոյում**, ուր 16-17-րդ դդ. ձևավորվեցին քրդական իշխանություններ (թրք. hünkümet), ինչի հետևանքով եկամուտ քուրդավազանին աստիճանաբար գրավեց գերակա դիրքեր, տեղի հայ իշխանական ընտանիքները հիմնականում պահպանվել էին և օժտված էին արտոնյալ դիրքերով ու իրավունքներով: Այս հանգամանքով պայմանավորված՝ 19-րդ դ. վերջերից, երբ նոր թափ ստացավ հայկական ինքնավարությունը հետզհետե վերացնելու Բ. Դռան քաղաքականությունը (որի համար վերջինս օգտագործում էր հարավից երկրամաս թափանցած քրդական վաչկատուն ցեղերին), Սասունը և առանձնապես **Վերին Սասունը** վերելք ապրող հայ ազատագրական շարժման գլխավոր կենտրոններից մեկը դարձան: Թուրքական պետությունը միայն կանոնավոր բանակային և «համիդիե» զորամիավորումների կիրառմամբ 1894 թ. և 1904 թ. ճնշեց սասունցիների պատասխանությունները: Այնուամենայնիվ, մինչև Մեծ եղեռն **Վերին Սասունը** կարողացավ պահպանել իր արտոնյալ դիրքերը: 1915 թ. մարտ-օգոստոս ամիսներին Սասունը կրկին վերածվեց անօրինակ հերոսամարտի կենտրոնի: Ցավոք, թշնամու բոլոր առումներով հսկայական գերակշռությունը (միայն կանոնավոր բանակային ուժերը կազմում էին 30000 զինվոր ու սպա), զինամթերքի խիստ անբավար լինելը, ինչ-որ տեղ նաև ինքնապաշտպանության ղեկավարների թույլ տված որոշակի սխալները, հնարավորություն չտվեցին հաղթական ավարտին հասցնել հերոսամարտը, ավելին, օգնության հասնել Մուշ-Տարոնին: 1915 թ. հուլիս-օգոստոս ամիսներին թշնամու հետզհետե սեղմվող օղակը հարկադրեց ինքնապաշտպանության ջոկատներին և խաղաղ բնակչությանը ծանր կորուստներով նահանջել **Անդոկ-Կեփին** լեռների շրջան: 1915 թ. օգոստոսին ճնշվեցին նաև տեղի դիմադրության կենտրոնները, որից հետո գազազած թշնամին անխնա հաշվեհարդար տեսավ ողջ մնացած սասունցիների մեծագույն մասի հետ: Կատարյալ «հայաորս» ծավալվեց 1915-1916 թթ. ձմռան ամիսներին: Մարտափեղի չափերի հասան նաև սովամահությունը և ցրտահարությունը: Միայն 1916 թ. փետրվարին ռուսական բանակի կողմից Մուշի գրավումը հնարավորություն տվեց Եղեռնը վերապրած հայերին (տարբեր տվյալներով՝ շուրջ 11000 մարդ) լեռներից իջնելու Տարոն, որտեղից էլ անցնելու Արևելյան Հայաստան:

Սասուն պատմաաշխարհագրական մարզի բնակավայրերի ցուցակները կազմելիս օգտվել ենք այլևայլ տպագիր և անտիպ (արխիվային) աղբյուրներից: Այս տեսանկյունից առանձնակի կարևորություն ունեն 1912-1914 թթ. վիճակագրական նյութերը: Մանրամասնությամբ և բավականին բարձր հավաստիությամբ աչքի է ընկնում հատկապես Սշո առաջնորդարանի նախկին քարտուղար, իսկ 1914-1915 թթ.՝

Սասունի գավառի ելևնտից վարչության գանձապահ (թրք. sandık emini) **Նազարեթ Մարտիրոսյանի** վիճակագրությունը¹: Սասունի վերաբերյալ հիբրավի հայրենանվեր գործ է կատարել հայտնի մանկավարժ, պատմաբան, բնիկ սասունցի **Վարդան Պետոյանը**, որը տարիների տքնաջան որոնումներով, փաստորեն, անվերապահ կորստից փրկել է իր բնօրրանի պատմական աշխարհագրությանը վերաբերող ահեղի և հազվագյուտ նյութ²: Վ. Պետոյանի աշխատություններն առանձնակի կարևորություն ունեն Սասունի ինչպես բնակավայրերի, այնպես էլ մանրատեղանունների, սրբավայրերի (վանքեր, եկեղեցիներ, ուխտատեղիներ) ուսումնասիրությունը լրացնելու տեսանկյունից, ինչի շնորհիվ կարող ենք ավելի ամբողջական պատկերացում ունենալ երկրամասի հայ բնակչության կրոնամշակութային կյանքի վերաբերյալ:

Մեծ կարևորություն ունեն ցեղասպանության ականատեսների վկայությունները, որոնք հրատարակել է Հայաստանի ազգային արխիվը³: Սասունի տեղագրության մասին արժեքավոր տեղեկություններ են հանդիպում նաև ժամանակի հայկական պարբերական մամուլում: Մասնավորապես կցանկանայինք առանձնացնել 1894 և 1904 թթ. ապստամբությունները լուսաբանող մի շարք հոդվածներ, ուր ներկայացված են նաև վիճակագրական բնույթի հետաքրքրական նյութեր⁴: Որոշակի հետաքրքրություն է ներկայացնում մեր կողմից նախորդ հոդվածներում բազմիցս հիշատակված **Ա-Դոյի** հայտնի գործը⁵: Ուշագրավ են նաև արևմտահայ նշանավոր հասարակական-քաղաքական գործիչ **Վարազդատ Տերոյանի** հայթայթած վիճակագրական բնույթի տեղեկությունները⁶: Խուրթ-Բոնաշենի մասին հետաքրքիր տեղագրական և վիճակագրական տվյալների ենք հանդիպել նաև 20-րդ դ. սկզբին Բիթլիսի անգլիական հյուպատոս (նախապես՝ փոխհյուպատոս) **Արշակ Սաֆրաստյանի** ուղեգրություններում⁷:

Սույն ուսումնասիրության մեջ ևս կարևոր տեղ ենք հատկացրել սրբավայրերին: Հարկ է նշել, սակայն, որ գործը բարդանում է նրանով, որ այս առումով հրապարակում չկա ամբողջական և համապարփակ տվյալներ պարունակող որևէ սկզբնաղբյուր: Դա է պատճառը, որ անհրաժեշտ նյութերը քաղել ենք մեզ հասու այլևայլ աղբյուրներից: Դրանք շարքում կցանկանայինք առանձնացնել **Գարեգին Սրվանձոտյանի** «Թորոս աղբար» աշխատասիրության մեջ զետեղված նյութերը Սասունի արևմտյան և կենտրոնական գավառ-գավառակների (Խուլփի, Խիանք, Տավորիկ ևն) հայկական սրբավայրերի մասին⁸: Կարևոր է նաև **Արիստակես Տեկանցի** աշխատու-

1 Տե՛ս **Մարտիրոսեան Ն.**, Սասուն, «Վան-Տոպ», Թիֆլիս, 1916, N 13, էջ 6-7: **Նույնի՝** Բոնաշեն-Խոյթ.-Նույն տեղում, թիվ N, էջ 8: **Նույնի՝** Խիանք և Խուլք.-Ն. տ., N 15, էջ 8: **Նույնի՝** Ստորկան.-Ն. տ., 1917, N 7, էջ 8-10: Հմնտ. Հայաստանի ազգային արխիվ (ՀԱԱ), ֆոնդ 397 (Գևորգ Մեսրոպյի), ցուցակ 1, գործ 1: Թէոդիկ, Գողգոթա Հայ հոգևորականության և իր հօտին աղէտալի 1915 տարիին, Թէհրան, 2014, էջ 126-128, 133-138: **Raymond H. Kévorkian, Paul B. Paboudjian**, Les Arméniens dans l'Empire Ottoman a la veille de Genocide, Paris, 1992, pp. 477-490. «Վիճակագրություն Մուշ-Սասունի (քաղաք Մշոյ դաշտի դպրոցական վիճակագրությունից, դպրոցական) վերատեսուչ Ռուբէնի, [1914, Մայիս 1)».- Հայաստանի պատմության պետական թանգարանի արխիվ. գ. 145, թթ. 1-5:

2 Տե՛ս **Պետոյան Վ.**, Սասունի և Տարոնի պատմա-աշխարհագրական տեղագրությունը, Եր., 2005: Հմնտ. նույնի Սասուն, Եր., 2016:

3 Տե՛ս «Հայոց ցեղասպանությունը օսմանյան Թուրքիայում: Վերապարծների վկայություններ», փաստաթղթերի ժողովածու, հատոր 2 (Բիթլիսի նահանգ), Եր., 2012:

4 Տե՛ս «Սասունի կռիւը».- «Դրօշակ», Վիեննա, 1895, N 1: «Սասուն».- Ն. տ., N 11: Հմնտ. «Ցուցակ Սասունի աւերած գիւղերի 1894 թ. (Արժանաշատ աղբիւրից)».- «Մուրճ», N 8, էջ 1154-1155: «Սասուն: Վիճակագրական».- «Դրօշակ», Ժնև, 1904, N 4-5:

5 Տե՛ս **Ա-Դո**, Վանի, Բիթլիսի և Էրզրումի վիլայէթները, Եր., 1912:

6 Դրանք գրանցված են Վ. Տերոյանին պատկանող՝ Ա-Դոյի վերը նշված գրքի տարբեր էջերում: Այդ մասին տե՛ս **Բաղայան Գ.**, Վարազդատ Տերոյանի վիճակագրական նյութերն Արևմտյան Հայաստանի բնակավայրերի վերաբերյալ.- «Բանբեր Հայաստանի արխիվների», Եր., 2005, N 1 (105), էջ 212-220:

7 Տե՛ս **Սաֆրաստեան Ա.**, Խոյթ-Բոնաշեն գաւառները. Ուղևորական տեղեկագրություններ.- «Հանդէս ամսօրեայ», Վիեննա, 1933, N 1-2, 9-10, 1934, N 1-2, 5-7:

8 Տե՛ս **Սրվանձոտյան Գ.**, Երկեր, հատ. 2, Եր., 1982: Խուլփի և Խիանքի եկեղեցիների ոչ-լրիվ ցանկը տե՛ս նաև «Էջմիածին», Սր Էջմիածին, 1965, N Բ-Գ-Դ:

թյունը, որտեղ, կարելի է ասել, եզակի տվյալներ կան **Խույթ-Բռնաշենի, Շատախի, Ծովասարի, Գավառի և Մոսկանի** գյուղական եկեղեցիների մասին⁹: Բացառիկ են բնիկ սասունցի **Մկրտիչ քահանա Մուրադյանի** տեղեկությունները՝ սվիդված հայրենի Փասնքի ուխտատեղիներին և այլ սրբավայրերին¹⁰: Հարկ է նկատի ունենալ, որ դրանք հիմնականում եզակի են և չեն հանդիպում որևէ այլ աղբյուրում: Սասունի վանքերի մասին ուշագրավ տվյալներ են հաղորդում **Գեղամ Տեր-Կարապետյանի** երկերը¹¹ և Մխիթարյան միաբան **Համազասպ Ոսկյանի** հանրահայտ մատենաշարը¹²: Հողվածը կազմելիս մեր ուշադրությունից չեն վրիպել նաև **Ղ. Ինձիձյանի** հայտնի աշխատությունը¹³, ինչպես նաև ձեռագրական այլևայլ նյութեր, որոնցից հարկ ենք համարում առանձնացնել **Խույթի Սուրբ Աղբերիկի** և **Տարոնի Սուրբ Հովհաննեսի** կամ **Եղորտի** նշանավոր վանքերի կոնդակները¹⁴:

Ավելացնենք նաև, որ հողվածում օգտագործել ենք Սասունի տարբեր բնակավայրերի մասին մեր կողմից հավաքված մի շարք տեղագրական բնույթի նյութեր: Այս առումով առանձնանում են հեթինքցի **Արշակ Հովհաննեսի Բաղդասարյանի** (1906–1996) հայրենի գյուղի վերաբերյալ անձամբ մեզ հաղորդած հազվագյուտ և խիստ արժեքավոր տվյալները, որոնք գրանցել ենք Պռոշյան ավանի (նախկին Նաիրիի շրջան) նրա տանը 1995 թվականին: Նույն ձևով 2002 թ. Աղբի գյուղի մասին տվյալներ ենք հավաքել վերին բազմաբերդցի **Հայկ Պարույրի Խամոյանից** (ծնվ. 1930 թ.), որն արմատներով **Գյալառաշ** բնակավայրից է (**Ծովասարի** գավառակ): Սասունի հետեղեռնյան ժամանակաշրջանի վերաբերյալ արժեքավոր տվյալներ ենք հայթայթել 2011 թ. հուլիսին Երևանում կայացած համահայկական խաղերի ընթացքում Ստամբուլից ժամանած սասունցիների պատվիրակության անդամ օրիորդ **Քեսան Կարակի** հետ հանդիպման ժամանակ: Վերջինս միաժամանակ ուշագրավ տվյալներ փոխանցեց նաև իր հայրենի Կուսգետ գյուղի վերաբերյալ¹⁵:

1. Առաջավոր գյուղեր

Սասունի ծայր հյուսիսային մասում բարձրացող **Սիմ** կամ **Կուռտիկ** (ինաստավորված՝ **Կորդուք**, 2729 մ) լեռնագագաթից հարավ տարածվող բնակավայրերը մտնում էին «**Առաջավոր գյուղեր**» հավաքական անունը կրող գավառակի մեջ (հանդիպում է նաև **Առաջավորաց Սասուն** ձևը): Այն կազմում էր Սասունի առաջապահ պաշտպանական շրջանը, որը մշտապես առաջինն է դիմակայել թշնամուն և հակահարված հասցրել նրան: «**Առաջավոր գյուղերն**» աշխարհագրական առումով կարելի է բաժանել 2 խմբի: 1-ին խմբի մեջ էին մտնում **Կողբաջրի** կամ **Խուլվիի** ակունքների շրջանում (այդ մասում՝ **Սեմալ**) գտնվող **Ալիանք**, **Գյալեգյանման** (քրդ.՝ «Ցորնաձոր»), **Շենիկ**, **Մարաձոր (Գյալեմսուր)** և **Սեմալ** գյուղերը: 2-րդ խումբն ամբողջությամբ զբաղեցնում էր **Վերին** Սասունի կենտրոն **Ընկուզաձոր-Գյալեզուզանը**, որի գյուղակները («թաղերը») սփռված էին **Անդոկ** լեռնագագաթի արևելյան լանջերից

9 Տե՛ս **Արիստակես Տևկանց**, Այցելություն ի Հայաստան: 1878 թ., Եր., 1985:

10 Տե՛ս **Մկրտիչ քն Մուրատեան**, Սասնոյ սրբավայրերն ու ւանդությունները.– «Բազմավեպ», Վենետիկ–Ս. Ղազար, 1934, N 2-3: **Նույնի**՝ Սասնոյ աշուղները.– Ն. տ., N 11-12: Նույնի՝ Գրուագներ Սասնոյ յուշերէս.– Ն. տ., 1936, N 1-2: **Նույնի**՝ Գայլ Վահանի բերդը.– Ն. տ., 1938, N 4-5: Պահպանվել է նաև Մ. Մուրադյանի կողմից կազմված վիճակագրական նյութերը հայրենի գավառի մասին: Տե՛ս «Պատմութիւն Տարոնի աշխարհի», պատմագրեց **Կ. Սասունի**, Պէրյուք, 1957, էջ 382:

11 Տե՛ս **Գեղամ Տեր Կարապետեան (Մշոյ Գեղամ)**, Տարոնի վանքերը: Ուղևորի յիշատակներ, Եր., 2003:

12 «Տարոն–Տուրուբերանի վանքերը», գրեց դկտր. **Հ. Համազասպ Ոսկեան** Մխիթարեան ուխտէն, Վիեննա, 1953:

13 Տե՛ս **Ինձիձեան Ղ.**, Աշխարհագրութիւն չորից մասանց աշխարհի, մասն Առաջին: Ասիա, հատ. Ա, Վենետիկ–Սբ Ղազար, 1804:

14 Տե՛ս **Գարեգին Ա. Կաթողիկոս**, Յիշատակարանք ձեռագրաց, հատ. Ա (Ե. դարից մինչև 1250 թ.), Աթիլիաս, 1951, էջ 179/180–189/190: **Սահակ Ա. Մուրատեան, Նազարէթ Պ. Սարսիբոսեան**, Ցուցակ ձեռագրաց Մշոյ Ա. Առաքելոց–Թարգմանչաց Վանքի և շրջակայից, Երուսաղէմ, 1967, էջ 199–204:

15 Այս տեսակետից որոշակի հետաքրքրություն է ներկայացնում նաև հետևյալ աշխատությունը. **Аванесов С.С.**, Положение национальных меньшинств в Турции, Ереван, 1963:

սկիզբ առնող և **Տավորիկի ջրի** ակունքները համարվող «**Պայթող աղբյուրի**» (**Պայթակն**, քրդ.՝ Qaniya Bâhjin) ձորահովիտներում (տե՛ս ստորև): «**Առաջավոր գյուղեր**» գավառակի ընդհանուր սահմաններն էին հյուսիսից **Հայկական Տավրոսի** կենտրոնական հատվածը կազմող **Սիմսարի** (նաև՝ **Խաչառաջ**) լեռների արևմտյան ճյուղավորումներով՝ **Մուշ-Տարոնը**, արևելքից՝ **Խուրթ-Բոնաշենը**, հարավից՝ **Ծովասարը** և **Տավորիկը** (վերջինիս **Գյալեսան-Շնաձոր** լեռնագագաթով), հարավ-արևմուտքից, **Անդոկ** (2812 մ) և **Կեփին** կամ **Կապան** (2734 մ) լեռնագագաթներով՝ **Իշխանձորը**, իսկ հյուսիս-արևմուտքից՝ **Խուլփը**: Գավառակը Սասունի սիրտն էր, **Հոլոյան** իշխանների կենտրոնը: Այս տոհմի ներկայացուցիչները, որոնք հայտնի էին **Պետոյան** տոհմանունով, այստեղ էին ամրապնդվել 17-րդ դ. սկզբներին՝ տեղափոխվելով հարևան **Խուլփի** հյուսիսային **Շենի** և **Գարովարտի (Կապրինի)** շրջաններից: Ընդհուպ մինչև 20-րդ դ. սկիզբը տեղի հայերն ունեին կիսանկախ կարգավիճակ և գինված պաշտպանում էին իրենց իրավունքները: Որոշ տվյալներով՝ «**Առաջավոր գյուղերի**» գինված ուժը կազմված էր 1000 ռազմիկներից: Տեղի հայ բնակչությունն ամենագործուն մասնակցությունն է ունեցել Սասունի 1894 և 1904 թթ. ապստամբություններին: Չնայած ծանր կորուստներին՝ «**Առաջավոր գյուղերի**» հայերն իրենց արտոնյալ կարգավիճակը հիմնական կողմերով կարողացան պահպանել ընդհուպ մինչև Առաջին աշխարհամարտ: Գավառակի գյուղերն աչքի էին ընկնում բազմամարդությամբ և ավելի շուտ, գյուղախմբեր էին՝ կազմված մի քանի «թաղ»-գյուղակներից: 1914 թ. «**Առաջավոր գյուղերի**» հայ բնակչության ընդհանուր թիվը հասնում էր 6000-ի: Սասունի հերոսամարտի ընթացքում ևս «**Առաջավոր գյուղերի**» բնակիչներն անվեհեր կերպով դիմակայեցին դարավոր ռոխիսի մինչև 1915 թ. օգոստոս՝ շարունակելով դիմադրությունը **Անդոկի** լանջերին: Հերոսամարտի անկումից հետո էլ տեղի վերապրած հայերը դժոխսային պայմաններում անգամ շարունակեցին դիմակայությունը մինչև 1916 թ. փետրվար, երբ տեղափոխվեցին ռուսների կողմից գրավված Մուշ, որտեղից էլ՝ Արևելյան Հայաստան: Նշված գյուղերի բնակիչների սերունդներն այժմ բնակվում են **ՀՀ-ի Արագածոտնի** մարզի մի շարք գյուղերում (**Ավան, Դիան, Զովասար, Իրինդ, Լեռնարոտ, Ոսկեթափ, Սասունիկ** ևն):

#	Բնակավայր	Եկեղեցի	Դպրոց	Այլ տեղեկություններ
1	Ալիանք (Ալիանցիք, Ալիանց, Այլանց)	Եկեղեցի	1	Ալիանքը մինչև 19-րդ դ. վերջը համարվում էր Գյալեգուգանի «թաղերից» մեկը: Սակայն 1890-ական թթ. առանձնանայով՝ այն դիտվում էր ինքնուրույն բնակավայր: Իր հերթին Ալիանքը բաժանվում էր մեկ տասնյակից ավելի «թաղ»-գյուղակների, որոնք սփռված էին Կողբաջուրի կամ Խուլփի (Բաթմանաջուր-Քաղիթթ ակունքների շրջանը), մասամբ՝ Տավորիկիջրի ձորակներում: Այդ գյուղակներն էին՝ Ալիանցոց-գյալի (ձոր), Բալոյի արտեր կամ Բլոյի գեղ, Բողնցի, Բոնկե հովիտ, Գյառքսար (Գեռհասար), Կյավռեսայի (քրդ. «սպիտակ քար»), Մամքան (քրդ. Nâwâle Mamikan), Մերկեխորք, Շանփե (քրդ. Newele Şânpe), Չայ, Սուք, Տափե (Տաթե), Քոփ (Քոթ) : Հայտնի է նաև Ալիանքի մեկ այլ՝ ըստ տոհմերի, ներքին բաժանումը՝ Ավոյի տներ, Հովհաննեսի տներ, Մրգոյի (Մարգարի) տներ, Շարկեի Օվիտ, Սոյի (Սանասարի) տներ :
2	Գյալեգյանման (Գելիեգենման, Ցորնաձոր)			Այս և Մերաձոր գյուղերը վարչականորեն երբեմն մտել են Խուլփի գավառի մեջ:

3	Գյալեզուզան (Գելիեզուզան, Ընկուզանը)	Սբ Թուխ Մանուկ	3	Եկեղեցում պահվել են ձեռագիր մատյաններ: Գյուղում կար ևս 3 ավերակ եկեղեցի, որոնք ուխտավարեր էին՝ Սբ Կարապետ, Սբ Կիրակոս և Սբ Սարգիս : Գյուղախմբի ծայր արևելյան մասում՝ Տավորիկիչի (Պայթող
				<p>աղբյուր) և Շատախի (Մուսանաչուր) միախառնման մոտակայքում պահպանվել էին քարաշեն (բրբռ. «քարկապ») կամուրջի ավերակներ: Գյալեզուզանը կազմված էր 3 տասնյակից ավելի մանր «թաղ»-գյուղակներից, որոնք շուրջ 20 կմ երկարությամբ սփռված էին արևմուտքից արևելք՝ Անդոկ լեռան ստորոտից մինչև Տավորիկիչուր գետի գլխավոր հունը: Գյալեզուզանի հիմնական «թաղերն» էին՝ Արշակ, Ամբար կամ Ամբարներ (բրբռ.՝ Ամբրնին), Բունգեղ կամ Եկեղեցութաղ (ուր գտնվում էր գործող եկեղեցին), Գիող կամ Գեհոյներ, Խարիբջան կամ Ղարիբջան, Խարձնգոմ(եր), Խասոյ մզրե (Մզրե Խասո), Խոշոք(ներ), Կավրտի(կ) կամ Գաբրդիկ, Հարմոզոմեր կամ Գյալեսան (բրբռ. «Շնաձոր»), Հոսել կամ Հոսլներ (բրբռ. «ոսկորներ»), այստեղ էր հին գերեզմանատունը), Հուսնցիք, Մագրեսա(ս), Մերգեր, Մխիթար, Պալո գոմեր (բրբռ. Փալո գոմանին), Ռաշրկ կամ Ռաշրքներ, Տաղվրնիկ կամ Գաղբրնիկ: Գոյություն ունեին նաև ավելի փոքր «թաղեր», որոնք ավելի շուտ վերոհիշյալների մասերն են եղել՝ Ավիախանի, Բայարներ (բրբռ. Բայարնին), Գեռիկ կամ Գյառիկ, Լխարկ, Խաշրկ, Կյավոեսայի (բրբռ. «Մայիտակ քար»), Մաժդրկ, Միջելներ (Միջնին), Միրդաուր, Շիրնիկ, Ռաշալներ (Ռաշալնին), Վերի Գյալին, Տալաս կամ Տահլաս: Եվս 2 «թաղ»՝ Կատվի գաժը և Շամոյ գաժը՝ անբնակ էին (բրբռ. «գաժ»-«սար»): Իր ողջ գյուղակներով Գյալեզուզանը 1914 թ. ուներ ավելի քան 2000 բնակիչ (250-300 տուն, կա ավելի բարձր ցուցանիշ՝ 350 տուն):</p>
4	Մնրաձոր (Ներքին Գելի, Գյալեմսուր, օտար հորջորջմամբ՝ Gelimansur կամ Kelimosur)	Սբ Աթանաս (Սբ Անթանիա) Ս. Կիրակոս		2 եկեղեցիներն էլ կիսավեր էին:
5	Շենիկ (Շենրկ)	Սբ Աստվածածին, Սբ Գևորգ	1	<p>Շենիկի շրջակայքը հարուստ էր պատմական հուշարձաններով: Գյուղից շուրջ 1 կմ հս-արևմուտք՝ բլրի վրա, երևում էին Սբ Աստվածածին վանքի (բրբռ. «Տեր Մայրամ» < բրբռ. Dera Mâryam) ավերակները: Ոչ շատ հեռու Սբ Գևորգ մատուռն էր, ուր ուխտի էին գալիս նաև քրդերը: Շենիկից արմ Շեղդանցիք և Գուռճոկնին հողամասերի միջև ընկած մի բարձունքի վրա գտնվում էր անայի Սբ Կարմրակ (Կարմիրակ) վանքը: Մինչև 1915 թ. պահպանվել էր հին գերեզմանատունը՝ կանգուն խաչքարերով: Մեկ այլ՝ Սբ Թեոդորոս վանքի ավերակները տեսանելի էին գյուղի հվ-արևմտյան կողմում: Այստեղ ևս պահպանվել էին խաչքարեր, շենքերի մնացորդներ: Վանքից մինչև Կուռտիկ լեռան Սևքար տեղամասը երևում էին ժողովրդի շրջանում «Քառասուն մանկանց առու» անունը կրող հին ջրանցքի հետքերը: Ուշագրավ հուշարձան էր նաև գյուղից շուրջ 4 կմ արևմուտք Սեմախի և Ալիանցից ջրերի միախառնման վայրում, եռանկյունաձև դժվարանատյեղի քարաժայռի վրա կառուցված</p>

				<p>«Սկունյաց բերդը» (բրդ. Qalā Siling): Շենիկը ևս կազմված էր 4 «թաղ»-գյուղակներից՝ Բուն Շենիկ, Գուռնոք(նին), Սգրեստրք (այլ տարբերակով՝ Սգրեստրփ), Տապե կամ Տարի: Տեղանվանագիտության տեսանկյունից որոշակի հետաքրքրություն են ներկայացնում գյուղի հողակտորների (բրբռ. «գդորնի») և արտավայրերի անվանումները՝ Ալրջեք, Ախոյի արտ, Բաբրջանցից արտեր, Բաժեք, Գազգազկընին, Գեղաղբյուր (գյուղի կենտրոնական աղբյուրը), Գյուլու արտեր, Գուռնոքնին, Խրժկըկնին, Մերգենոզան, Շեղտանցիք, Ջուլըկնին, Սարու արտեր, Վարի և Վերի ձամ (բրդ. çâm-«գետ»), Տապեի արտեր, Քրնֆանու արտեր (համանուն աղբյուրի շրջանում): Շենիկը Սասունի բազմամարդ գյուղերից էր՝ 1914 թ. շուրջ 100 տուն բնակչով (ավերի քան 900 անձ):</p>
6	Սենալ	Սբ Գևորգ	1	<p>Սենալում և շրջակայքում պահպանվել էին մի շարք սրբավայրերի մնացորդներ: Գյուղից մի փոքր հս գտնվում էին Սբ Հռիփսիմե (Սբ Հռիփսիմյանց) եկեղեցու ավերակները: Սենալից շուրջ 3.2 կմ հս-արևմուտք՝ Ծիծառնուձոր (բրբռ.՝ Ջիգանու գյալի) գետակի ափին գտնվում էին պատմական Ծիծառնու վանքի ավերակները և մեկ տասնյակ խաչքարեր, որոնք հայտնի էին Ներքին Ջիգանու խաչեր՝ անունով (ուխտատեղի էր): Ոչ շատ հեռու՝ Կուտոսիկ լեռան ստորոտին ընկած երբեմնի բնակավայրի (ժողովուրդն այն կոչում էր «քաղաք») տեղում, գտնվում էր «Դրքանե գիվկրան» (բրդ.՝ «ոսկերիչների խանութ») կոչվող վայրը, ուր արհեստանոցներ են եղել (ոսկերիչների շարքեր, դարբնոցներ): Սենալը նույնացվում է պատմական Սերենավայրի հետ: 1904 թ. հերոսամարտի ծնունդից հետո գյուղի վերապրած բնակիչները տեղափոխվել են Սենալի գետի ափին (Բաթմանաչրի ակունքները) ընկած Գաշտոքի հովիտ՝ հիմնելով նոր բնակավայր: Հին Սենալում, որ տեղացիները կոչում էին Ֆատագուրմ, շարունակել է ապրել 3 գերդաստան (որոնցից մեկը հայտնի Քոթաննեց տունն էր): Հին գյուղը ժամանակին կազմված է եղել Վերին, Միջին և Ներքին թաղերից: Նոր գյուղը ևս ուներ մի քանի թաղ՝ Վերին և Ներքին Գաշտոք, Բլուրիկ (բրբռ. Պլուրիկ) և Բշարատկան կամ Բշարեթկան: Ընդ որում, վերջինս գտնվում էր հարևան Գեղաշենից (Շատախի գավառակ) գրավված հողակտորում, և տեղի Պոլկնու տուն գերդաստանի բնակիչները Սենալի հասարակության անդամ չեն դիտվել: Սենալը Սասունի առավել բազմամարդ բնակավայրերից էր՝ 1914 թ. 1300-1400 հայ բնակիչներով:</p>

2. Շատախ և Ծովասար

Այս 2 գավառակներն ընկած էին «Առաջավոր գյուղերից» հարավ: Առաջինը համապատասխանում է հնագույն «Արջուց կողմն» գավառակին, որը, ժողովրդական ավանդագրույցի համաձայն, տեղի **Գևորգ Շատախոս** իշխանի անունով վերանվանվեց **Շատախ**: Շատախի գյուղերը՝ **Գեղաշենը, Գերմավը (Ջերմաջուր), Իրիցանքը (Երիցանք), Շուշամեղկը, Տափիկը, Քոփը** և **Զայնըկցիքը** (վերջինս **Քոփի** «մեզրե»-ագարակն էր), գրավում էին **Սիմսար (Սևսար, նաև Խաչառաջ)**

լեռների հարավային ստորոտներից բխող **Շատախ** կամ **Սուսանաջուր** գետակի հովիտը՝ **Սուսանքի ձորը**: Կենտրոնը **Տափիկ** կամ **Տափքը** գյուղն էր, որը, ի դեպ, 20-րդ դ. սկզբին պաշտոնական վարչական բաժանմամբ **մտնում էր Սշո** գավառի կազմի մեջ և այսպես կոչված **Գյալեզուզան** գյուղախմբի (թրք. nahıye) կենտրոնն էր: Նշված վարչամիավորի մեջ էր ընդգրկված նաև «**Առաջավոր գյուղերի**» գավառակը:

Ծովասարը տարածվում էր **Շատախից** հարավ՝ ընդգրկելով համանուն սրբացված լեռնագագաթի (2721 մ, քրդ. Zupsâr < հյր. «Սուրբ սար») արևմտյան լանջերից բխող **Տավորիկիչքի Աղբի (Աղբու ջուր)**, **Գյալառաշ (Սևձոր)** և **Հեթինք (Հիթնից ջուր)** վտակների ձորահովիտները: Գավառակի հիմնական գյուղերը՝ **Աղբին** և **Հեթինքը**, կառուցվածքով հիշեցնում էին **Գյալեզուզանը** կամ «**Առաջավոր գյուղերի**» բնակավայրերը, քանի որ վերջիններիս նման կազմված էին «թաղ»-գյուղակներից: **Ծովասարի** կենտրոնական բնակավայրն էր **Աղբին** (տես ստորև):

1914 թ. վերոհիշյալ գավառակներն ունեին ավելի քան 5000 հայ բնակիչ (550-580 տուն): Բոլոր գյուղերը զուտ հայաբնակ էին՝ բացառությամբ **Իրիցանք** և **Տափիկ** գյուղերի, ուր բնակվում էին փոքրաթիվ քրդեր (շուրջ 200 մարդ):

Շատախի և **Ծովասարի** հայերը նույնպես մեծ ավանդ են ունեցել 19-րդ դ. վերջին-20-րդ դ. սկ. հայ ազատագրական շարժման մեջ: 1915 թ. Սասունի հերոսամարտի ընթացքում քաջարի դիմադրության շնորհիվ տեղի հայերի զգալի մասին հաջողվեց խուսափել լիակատար բնաջնջումից և հետագայում ապաստանել Արևելյան Հայաստանում: Նրանց սերունդներն այժմ ապրում են **ՀՀ-ի Արագածոտնի** մարզի **Ագարակ, Վերին** և **Ներքին Բազմաբերդ, Դիան, Զովասար** ու **Կարավաձոր** գյուղերում:

#	Բնակավայր	Եկեղեցի	Դպրոց	Այլ տեղեկություններ
1	Աղբի (Աղբիկ, Աղպիգ)	Սբ Թորոս	1	Աղբին կազմված էր Վերին և Ներքին թաղերից, որոնք իրենց հերթին բաժանվում էին ավելի մանր «թաղիկների»: Դրանք էին՝ Զիվրոշ կամ Սևարտ, Իսախ կամ Իսախու հովիտ (Շառռ տներ), Խաջնար կամ Խաժնարտ (կոչվել է նաև Խաչզըրտ, Հովհաննեսի տներ), Շըլֆեք (Շըրֆո տներ), Շեկար կամ Թորիկ (Թորկըցի, իմա՝ Թորիկյան-Թորոսյաններ , տոհմի մի մասը բնակվում էր Զիվրոշում), Փարսեղցի (իմա՝ Բարսեղյաններ), Ֆերոկներ: Ներքին Աղբիում գտնվում էր Խումարավանքը (քրդ. Dera Xima կամ Deyri), որն այդպես է կոչվել Գյալառաշ և Աղբի գյուղի հիմնադիր, Խիանքի Հեղին գյուղացի (որոշ տվյալներով՝ խուբեցի) մի կնոջ՝ Խումարի պատվին: Մեկ այլ ավանդության համաձայն Աղբիի Մեթուկի տներ տոհմի հիմնադիրը գյուղում հաստատվել էր Կիլիկիայի Ջեթունից : Գյուղից հս՝ Հողսորթիկ վայրում, ոսկու հանք կար: Աղբին Սասունի բազմամարդ բնակավայրերից էր և իր «թաղ»-գյուղակների հետ 1914 թ. ուներ 1250 հայ բնակիչ (150 տուն):
2	Գյալառաշ (Կելռաշ)	եկեղեցի		Գյալառաշը, Թխիկը և Խատան Աղբիի «թաղ»-գյուղակներն էին: Այս գյուղակներում եղել են Սբ Մարիամ և Սբ Սարգիս եկեղեցիներ, սակայն անորոշ է, թե նշված սրբավայրերը որ բնակավայրում են գտնվել:
3	Գեղաշեն	Սբ Ստեփաննոս	1	Գեղաշենի դպրոց էին հաճախում նաև հարևան Շուշանների երեխաները:

4	Գերմավ (Ջերմաջուր)	Սբ Թուխմանուկ		Գերմավից շուրջ կես կմ արլ երևում էին Տապե (քրդ. Çilhâvîrûni-«Քառասուն ձվածեղ») գյուղի ավերակները: Գյուղի անունը (քրդ. gârmav կամ avagârm-«տաք ջուր» կամ «ջերմուկ») առաջացել է մոտակա հանքային աղբյուրից:
5	Թխիկ	եկեղեցի		Թխիկում հաստատվել էր Քունացի տոհմը , որի ներկայացուցիչները բնակվում էին նաև բուն Աղբիում :
6	Խատան			
7	Իրիցանք (Երիցանք)	Սբ Աստվածածին		Եկեղեցին նախկինում վանք է եղել՝ կառուցված ինքնատիպ ճարտարապետությամբ: Սիրված ուխտատեղի էր: Ավանդության համաձայն, գյուղի անվան առաջացումը կապվում է Սասունցի Դավթի «իրիցանք» [իմա՝ «այրվեցինք (բարկ արևից»)] արտահայտությունից:
8	Հեթինք (Հիտինք)	Սբ Մինաս		Հեթինքը կազմված էր Վերին և Ներքին թաղերից (բնակչության մեծ մասը կենտրոնացած էր վերջինում): Գյուղն ուներ էլ ավելի փոքր «թաղ»-գյուղակներ և «մեզրեններ»՝ Ավարակա , Գյալառաշ , Գոզըվտիք (Կոկվըտիք), Թխիկ (Ավեր Թխիկ), Լեռնգոմեր , Կանաչ գըղոբ (իմա՝ «հողակտոր»), Հաքըրվունք , Չորուտ : Հեթինքի «թաղերից» էր նաև Նոնան (տե՛ս ստորև): Ինքնատիպ և ուշագրավ են Հեթինքի շրջակա ամառանոցների («գայլաների») անունները՝ Աբրնի , Բրագովշաշ , Գյառագունի , Գրանեզ , Խորկուփ (քրթ. «խոր գուբ կամ փոս»), Կիշկանք , Ճոխիր , Շոնանք , Սար կամ Ծովասար (Հեթինքն ընկած էր վերջինիս հս-արևմտյան լանջերից սկզբնավորվող ձորահովտում), Օձով գոհար , Օղընիր են: Հեթինքը Սասունի բազմամարդ գյուղերից էր և 1914 թ. իր գյուղակներով ուներ շուրջ 1000 բնակիչ:
9	Նոնա			Նոնան Հեթինքի գյուղակն էր և իր հերթին նույնպես կազմված էր Վերին ու Ներքին «թաղերից»:
10	Շուշամերկ	Սբ Մինաս		Գյուղի հս-արևելյան կողմում՝ Շատախ կամ Մուսանաջուր գետակի Աթանիուջուր օժանդակի ափին գտնվում էր Սբ Աթանագինեի (Աթանիա) հինավուրց վանքը: Վերջինս հիմնադրվել էր Կապադովկիայից (Գամիքք) Սուրբ Գրիգոր Լուսավորչի կողմից այստեղ փոխադրված Սուրբ Աթանագինեի (Աթանիա) մասունքներն ամփոփող վկայարանի տեղում: Պատմիչ Ագաթանգեղոսի տվյալներով՝ այստեղ էլ տեղի է ունեցել Հայքի մկրտության առաջին խոշոր արարողությունը (19 «բիւր», իմա՝ 190000 մարդ): Վանքը հայտնի էր մոտակա բուժիչ ջերմուկի աղբյուրով: Մենաստանը գործել է մինչև 19-րդ դ. 70-ական թթ., երբ ավերվել է քրդերի կողմից: Կարևոր ուխտատեղի էր:
11	Տափիկ (Տափըք)	եկեղեցի (ավերակ)		Տափըկից հարավ՝ Ծովասարի հյուսիսային լանջերին գտնվում էր Մուսանց (Մուսնաց, Զոզկանց) ավերակ բերդը: Փաստերը թույլ են տալիս ենթադրել, որ այն կառուցված էր կիլիկյան ամրոցի հիմքի վրա: Ժողովրդի մեջ շրջանառվող ավանդության համաձայն՝ բերդի մոտ գտնվում էր Մուսանք «քաղաքը»: Ավելի բարձրադիր մասում պահպանվել էին Մուսնաց (Մուսանց) կամ Զոզկանց (Զոզկնաց) վանքի ավերակները:

				Այն հայտնի էր նաև Բարձր Սբ Աստվածածին (քրդ. Dera Soradâri – «Կարմրադուր վանք») անունով, որը, ըստ տեղացի հայերի շրջանում պահպանված ավանդապատում գրույցի, կառուցել էր տաղանդավոր «մեկթևանի» լեզենդար վարպետ Կուտար կամ Գերթոն՝ Բաթմանաջրի վրա գտնվող « Գերթոյի կամրջի » ճարտարապետը: Այլ պատումի համաձայն՝ Մուսնաց (Ջոզկանց) վանքը կառուցվել է հայ «թագավորի» կողմից: Ծովասարի հյուսիսային լանջերին գոյություն ունեւր Կուլեդի անունով ևս մեկ ավերակ բերդ:
12	Քոփի և Զայնրկցիք (Զայնրքնին)	Սբ Կարապետ		Քոփի մոտ Շատախ գետի վրա, պահպանվել էին քարաշեն կամրջի մնացորդներ:

3. Տավորիկ (Քարակ)

Մասունի գրեթե կենտրոնում՝ **Տավորիկիցրի** աջափնյա խիստ դժվարամատչելի ձորահովիտներում, տարածվում էր Մասունի «սիրտը»՝ **Տավորիկը (Քարակ)**: Գավառակը սահմանակից էր հյուսիսից՝ **Սլատորքար** լեռներով՝ **Իշխանձորին** և **Ընկուզաձորին (Գյալեզուզան)**, արևելքից՝ **Տավորիկիցրի** կիրճով՝ **Գավառին**, հարավ-արևելքից՝ նույն գետի ձախափնյակում ձգվող **Զանդուսի ձորով՝ Փսանքին**, հարավ-արևմուտքից՝ **Սպիտակ սարով՝ Խիանքին**: Տավորիկի կենտրոնն էզուտուն ավաններ էր, որից էլ, ըստ ավանդության, առաջացել էին մյուս գյուղերը (հաճախ դրանք համարվում էին **էզուտուն-«Բուն» Տավորիկի** արվարձանները կամ «թաղերը»): Զուտ հայաբնակ Տավորիկը մինչև 20-րդ դ. սկիզբը գրեթե ինքնիշխան էր: Պահպանված ավանդագրույցների համաձայն՝ տեղի հայ իշխանները սերում էին գեյթունցի **Ծուռ Ղազարի** (կամ դարձյալ գեյթունցի **Մուքիասի**) տոհմից: Որպես կանոն նրանք տասնամյակներով հարկ չեն մուծել թրքական իշխանություններին և շրջակա քուրդ ցեղապետերին: Որոշ տվյալներով՝ Տավորիկի կովող ուժը հասնում էր 500 մարտիկի: Միևնույն ժամանակ տավորիկցիները հմուտ դարբիններ և զինագործներ էին, իրենք էին պատրաստում իրենց զենքերը, ինչի համար հումք էին ծառայում շրջակա երկաթի հանքերը: Գավառակի բնակչությունն ամենագործուն մասնակցությունն է ունեցել Մասունի 1894 և 1904 թթ. հերոսամարտերին: Թրքական բանակը կարողացել է միայն ծանր կորուստներով ներխուժել Տավորիկ և վայրագաբար ավերել վերջինիս բնակավայրերը, եկեղեցիներն ու դպրոցները: Դրա հետևանքով Տավորիկի հայ բնակչության թիվը, որը 1890-ական թթ. սկզբին կազմում էր շուրջ 5000 մարդ, 1914 թ. հասնում էր 3500-ի: Տավորիկը դիմադրության կարևոր կենտրոններից էր նաև 1915 թ. Մասունի հերոսամարտի ժամանակ: Վերապրած հայերն իրենց մյուս հայրենակիցների հետ 1916 թ. տեղափոխվել են Մուշ, որտեղից՝ Արևելյան Հայաստան: Տավորիկցիների սերունդներն այժմ բնակվում են **ՀՀ-ի Արագածոտնի** մարզի **Աջնակ, Ավան, Իրինդ, Լեռնարոտ, Շղարշիկ, Պողոյան, Մասունիկ** և այլ գյուղերում:

#	Բնակավայր	Եկեղեցի	Դպրոց	Այլ տեղեկություններ
1	Արտխոնք (Հարթխոն)	Սբ Մարիամ		Գյուղում և շրջակայքում կային մեծ թվով սրբավայրեր՝ մի քանի ավերակ եկեղեցի, Սբ Թալրուկ, Մարտարուս, Սբ Խազ-օղլան ուխտավայրերը: Արտխոնքից հս՝ Կորածքար լեռնագագաթի ստորոտին, ընկած էր Շլեմիր քաղաքատեղին, որը ենթադրաբար նույնացվում է պատմական Քոլիմար (սեպագրային՝ Կուլիմարա) քաղաքի հետ:
2	Դվալենք (Տվալինք)	Եկեղեցի		
3	Եղգարդ (Էղկարթ)	Սբ Կույս Մարիամ (ավերակ)		

4	Էգուտուն (Այգուտուն, Բուն Տավորիկ)	Սբ Սարգիս	1	Էգուտունը բաղկացած էր Էրած (Այրած) և Կոտրած թաղերից: Մար Սմունկա վայրում ժամանակին վանք է եղել: Նրա «թաղ»- գյուղակներն էին դիտվում Կտանքը, Մերգերը և Վերինգեղը : Որոշակի հետաքրքրություն են ներկայացնում Էգուտուն ավանի մանրատեղանունները (ազարակ-«մեզրե», հանդամաս, աղբյուր են): Աղբրդուռ (գլխավոր աղբյուրի մոտ), Դանդամուր, Դաուդիկ, Մրձուց, Պաղաղբյուր, Պողնուտ, Վերսկուտ: Տավորիկի գլխավոր բնակավայրը հռչակված էր խաղողի այգիներով և գինեգործության կենտրոն էր:
5	Խլիովիտ			
6	Կտանք	Սբ Կարապետ		Կտանաց Սբ Կարապետը հայտնի ուխտատեղի էր:
7	Հագմանք (Հըքմանք)	Սբ Կարապետ		
8	Հավկունք (Հավկոնք)	Եկեղեցի (ավերակ)		Հոյունց իշխանական տոհմի նախնական կենտրոնն էր:
9	Հարթթ		1	Հարթթի մոտ Տավորիկի ջրի անդնդախոր ծեռուտ քարափներին, ցցված էր տավորիկցիների կարևոր մարտական դիրքերից մեկը՝ « Արծվի բույն » ծայրը: Գետի հանդիպակաց ափին գտնվող Ներքին Հարթթ թաղամասի վրա իշխում էր « Ձկնգոլ » քարանձավը, որի միջից հորդացող աղբյուրի ջուրը հոսում և թափվում էր Տավորիկիջուր: «Ձկնգոլում» վտանգի պահին ապաստանում էին Հարթթի ծերերը, կանայք և երեխաները:
10	Հլոդիսք (Հլորիսք)	Սբ Մամաս	1	Հնում այստեղ եղել է բերդ, որը 7-րդ դ. բյուզանդացի պատմիչ Գևորգ Կիպրացին հիշում է աղավաղված Ֆլորիանոն (հունարեն՝ Φλωριανών) ձևով:
11	Հոսնուտ			
12	Չորեր (Ծորիբ)			
13	Մեգրե (Մգրեն)			
14	Մերգեր (Մարգեր)			
15	Վերինգեղ			
16	Սպաղանք (Սբղանք, Ասպականք)	Սբ Մարութե (Սբ Մարութա Ճգնավոր, Մար-Ապպա)		Նախկինում եղել է վանք: Սպաղանքից արևելք՝ Տավորիկիջրի վրա, կառուցված էր գավառակի երկրորդ նշանավոր՝ « Մագի կամուրջը », որը Տավորիկը կապում էր Գավառի (Բուն Մասուն) հետ: Աշխարհացույցյան Տուրուբերանի Ասպակունյաց ձոր գավառի կենտրոնն էր:
17	Փուրխ (Փորխ)	Սբ Ստեփաննոս (վանք)	1	Փուրխ և Խլիովիտ գյուղերի միջև Տավորիկի ջրի ծեռուտ ափերն իրար էր կապում նշանավոր « Մատանի կամուրջը », որն այդպես էր կոչվում իր դժվարամատչելի և սարսափազդու դիրքի համար: Բանն այն է, որ կամրջի համար հենակ կամ խել ծառայող ժայռը 10 մ-ով ցածր էր աջից: 1904 թվականից հետո տավորիկցի նշանավոր վարպետներ Հագոյի Դավիթ (Դավիթ) և Ոստա Գասպարը գետի ձախսափնյա մասում քարե պատ են շարել և հավասարեցրել աջին: « Մատանի կամրջով » Տավորիկը հարավից միանում էր արտաքին աշխարհին: Գյուղի հյուսիսում Հոսնուտի ձանապարհին՝ ուղիղ գետի ափին, գտնվում էր ամեհի Ֆրֆրոքարը , որն այդպես է կոչվել համախակի քամիներից առաջացող ձայներից: Այս ժայռը ևս տավորիկցի ռազմիկների կարևոր պաշտպանական դիրքերից էր:

18	Քորախու	Եկեղեցի (ավերակ)		Գտնվում էր Տավորիկի ջուր գետի ձախ ափին և համարվում Արտխոնքի «թաղ»-ը: Մոտակա Բորնջիկ երկ-գագաթանի լեռան վրա գտնվում էր Բորնջիկի կիսավեր վանքը, որը հայտնի ուխտատեղի էր: Ի դեպ, սրբավայր էր նաև լեռը՝ իր նշանակությամբ հավասար հռչակավոր, դարձյալ երկկատար Մարաթուկին :
----	---------	------------------	--	----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------

4. Իշխանձոր

Սասունի առավել անառիկ շրջաններից էր **Իշխանձորի** գավառակը (բրբռ. **Իշխանձոր**), որը գրավում էր կենտրոնական Սասունի արևմտյան հատվածը: Գավառակի բնակավայրերը սփռված էին **Տավորիկիջրի** վերին հոսանքի **Իշխանձոր (Սևիթու ջուր)** և **Մեղրաձոր** (բրդ. Galiyehingiv) օժանդակների ձորահովիտներում, որոնք միախառնվելով՝ կազմում են **Քալորոնքի** (բրդ. Balurka) վտակը, որն էլ **Ղայսեր** կամ **Խայսեր** գյուղից հարավ թափվում էր մայր գետ: Պաշտոնական վարչական բաժանմամբ թեև **Իշխանձորն** ընդգրկված էր **Խուլփի** գավառի (թրք. kaza) **Խիանքի** գյուղախմբի մեջ, բայց իրականում կապված էր հարևան **Տավորիկի** հետ (ի դեպ, պատահական չէ, որ որոշ աղբյուրներում հիշվում է վերջինիս կազմում): Սահմանակից էր արևմուտքից և հյուսիսից **Կողքի** կամ **Խուլփի** լեռներով՝ **Խուլփին**, հյուսիս-արևելքից սասունցիների պաշտելի **Անդոկ** (2812 մ) և **Կեփին (Կապան)** կամ **Սուրբ Հակոբ** (2734 մ) լեռնագանգվածներով՝ **Ընկուզաձոր-Գայե-գուզանի** գյուղախմբին, հարավ-արևելքից՝ **Մխտորքար** լեռնապարով՝ **Տավորիկին**, իսկ հարավից՝ **Խիանքին**: Կենտրոնը համանուն ավանն էր, որը կազմված էր մի քանի «թաղ»-գյուղակներից (տե՛ս ստորև): **Իշխանձորի գավառակը** կառավարվում էր հայ իշխանների կողմից և մինչև 20-րդ դ. սկիզբն օժտված էր լայն ինքնավարությամբ: Տեղի հայերն ամենագործուն մասնակցությունն են ունեցել Սասունի 1894 և 1904 թթ. հերոսամարտերին: Թուրքական բանակի և քրդական համիդիեների վայրագությունները զգալի կորուստներ պատճառեցին նաև տեղի բնակչությանը: Խիստ տուժեցին մասնավորապես **Սևիթ** և **Կռանոս** գյուղերը, ուր 1894 թ. ապրում էր 65 տուն բնակիչ, մինչդեռ 1914 թ. մնացել էր միայն 11-ը: Նկատելիորեն նվազեց նաև գավառակի մյուս գյուղերի բնակչությունը: Դրանով հանդերձ **Իշխանձորը** Մեծ եղեռնի նախօրեին զուտ հայաբնակ էր՝ ավելի քան 2700 բնակչությամբ (300-310 տուն): Գավառակի բնակիչները մասնակցեցին նաև Սասունի 1915 թ. հերոսամարտին: Չնայած նոր, սարսափելի կորուստներին, տեղի հայերի մի մասին հաջողվեց վերապրել և 1916 թ. անցնել ռուսների կողմից գրավված **Մուշ**, որտեղից՝ տեղափոխվել Արևելյան Հայաստան: Այժմ **Իշխանձորի** գավառակի տարբեր գյուղերից դուրս եկած բնակիչների սերունդները գերազանցապես բնակվում են **ՀՀ Արագածոտնի մարզի Աշտարակի** շրջանի **Ավան** գյուղում:

#	Բնակավայր	Եկեղեցի	Դպրոց	Այլ տեղեկություններ
1	Արտկունք (Արտկոնք)	Սբ Հակոբ	1	Եկեղեցուն պահվել են ձեռագիր մատյաններ: Կազմված էր մի շարք «թաղ»-գյուղակներից, որոնք սփռված էին Իշխանձոր (Սևիթու ջուր) գետակի միջին սվազանի ձորահովիտներում: Այդ գյուղակներն էին. Դաղբլրնիք (բրբռ. Դաղբլրնիք), Ընկուզեք , Ծակձոր , Կուպ (< Գուք. «փոս»), Կպովիտ (< Գուրովիտ), Հեղինկապագ , Չորեք , Միջին թաղ (Բուն Արտկունք), Միքանգեր (բրբռ. Միքանգին): Արտկունքի գյուղակներից էր նաև Խաչուկները : Որոշակի հետաքրքրություն են ներկայացնում Արտկունքի

				«մեզրե»-ագարակների և հողակտորների անվանումները՝ Ազդարնիկ, Ամուց ձոր (քրդ. Ámoka), Առնձիկ, Արողալեն, Դարմ կամ Դարմոյի գոմ Զարդուզ, Ծոռիկ, Կաժիկույ (բրբռ. «լեռ-սափոս»), Կոշիկ, Կարթակ, Կոմա, Գուրեր (բրբռ.Կուպեր), Հորակ, Պարաղոզ, Փայվուզիկ, Սանադ են: Այս տեղավայրերը հիմնականում ընկած էին Արտկունքից արլ՝ Տավորիկի սահմանագլխին գտնվող Ամուց ձոր գետակի հովտում:
2	Ընկուզնակ (Ընկուզտիսակ)	Սբ Մամաս		Գյուղից շուրջ 2 կմ հարավ՝ Իշխանձոր (Անիթու շուր) գետակի ափին, անտառոտ վայրում գտնվում էր Ապաղթու կամ Աբեղթու (Ապաղաթ) ավերակ վանքը՝ Սբ Հակոբ և Սբ Ստեփանոս մատուռներով («լուստուն»), որոնք ուխտատեղիներ էին: Շրջակայքում ևս հանդիպում էին բազմաթիվ՝ սրբազան 7 թվով, մատուռների ավերակներ և բնակատեղի (ավանդաբար՝ «քաղաք»): Վերոհիշյալ սրբավայրի անունով Ընկուզնակի շրջանը 15-րդ դ. կոչվել է «Աբեղթու գառա» : Հայտնի սրբատեղիներ էին նաև գյուղի շրջակայքում բխող Թղնա և Մեծակ աղբյուրները:
3	Իշխանձոր (Իշխնձոր)	Սբ Աստվածածին, Սբ Մամաս	1	Իշխանձորը բաղկացած էր համանուն գետակի վերին ավազա նի ձորահովիտներում ցրված հետևյալ «թաղ»-գյուղակներից՝ Բունգեղ կամ Միջին թաղ, Գալինք կամ Կալիք, Խրվարդ, Նորհան, Խզրկու արտեր (վերջինիս մասին տես ստորև): Գյուղում կային 4 սրբավայր-«լուստուններ»՝ Սբ Թլըլա, Սբ Թուխ Մանուկ, Խոռուս Մամաս (Խորուս Մամաս) և Սբ Մամաս , որոնք ավանդաբար կոչվել են Իշխանձորում ապաստանած 4 քրիստոնյա միանձնուհի քույրերի անուններով (հիշեցնում է Սբ Հոփսիսիանց կույսերի ավանդագրույցը): Ավելի ուշ վերջիններս տեղափոխվել են Անդոկ լեռան Սբ Անտոն ձգնավորի ձգնարան: Սբ Մամասի հարևանությամբ՝ «Օսկի թրի տեղ» վայրում, կար մեկ այլ ավերակ եկեղեցի: Ըստ ժողովրդի շրջանում տարածված գրույցների, ավերակի դիմաց գտնվող ժայռի տակ թաղված էր «ոսկե թուր», ինչը, կարծում ենք, որոշակի աղերսներ ունի Սասունցի Գավթի առասպելական «Թուր Կեծակիի» հետ: Իշխանձորից շուրջ 6 կմ հս բարձրացող Կեփին (Կապան) լեռնագագաթի լանջին գտնվում էր Սբ Հակոբ վանքը: Վերջինիս անունով սարը կոչվում էր նաև Սբ Հակոբ: Իշխանձորը Սասունի առավել բազմամարդ բնակավայրերից էր՝ 1914 թ. ավելի քան 1300 բնակչությամբ:
4	Խզրկու արտեր			Գյուղը համարվել է Իշխանձորի «թաղերից» մեկը:

5	Հեղին	Սբ Աստվածածին	Գյուղի մոտակայքում գտնվում էր Սասունի առավել նշանավոր վանքերից մեկը՝ Սբ Եղիա Մարգարեն , որը միաժամանակ սիրված ուխտատեղի էր: 7 տարին մեկ անգամ՝ Խաչվերացի (Սբ Խաչ) տոնի օրն այստեղ էին ժամանում բազմաթիվ ուխտավորներ ոչ միայն հարևան գյուղերից, այլև Սասունի մյուս գավառակներից: Հարևան սուրբ անտառակից կտրված և կանաչ տերևներով պատված ճյուղերով ուխտավորները ծածկում էին («թամբում էին») վանքի գմբեթն այն պատճառաբանությամբ, որ Սբ Եղիան համբարձել է երկինք, հետևաբար՝ չի թաղվել և հող չի ընդունում: Ուշագրավ է, որ ուխտագնացության ընթացքում Սբ Եղիա մենաստան արգելված էր կանանց մուտքը:
6	Սևիթ	Սբ Մինաս	Գյուղի մոտ գտնվում էր Սբ Աստվածածին (Սևիթի կամ Սևթաս Սբ Մամաս) վանքը, որը հայտնի ուխտատեղի էր: Սևիթի «թաղ»-գյուղակն էր Կոանոսը (Կոնոս) :

5. Գավառ (Կավառ) կամ Բուն Սասուն

Սասունի կենտրոնական գավառակն էր, որը տարածվում էր **Սասնաջրի** ակունքների շրջանում, ինչպես նաև վերջինիս **Ծովասարի** (2721 մ) հարավային լանջերից սկիզբ առնող **Կապածգետ (Կապաս, քրդ. Qâvâstîk)** և **Կուսգետ** (քրդ. Bozîkan) աջակողմյան վտակների ձորահովիտներում, որոնք կազմում էին **Հոնցվարի** բարձրավանդակի հյուսիսային հատվածը: Սահմանակից էր հյուսիսից **Ծովասարի** լեռնազանգվածով՝ համանուն գավառակին, մասամբ՝ **Խուրթ-Բոնաշենին**, արևելքից՝ **Սասնաջրի** վերին հունով՝ **Մարաթուկին**, հարավից՝ **Փսանքին**, արևմուտքից՝ **Տալվորիկին**: Կենտրոնը հնագույն **Սասուն (Սասնա)** կամ «**Գավթի**» բերդն էր (քրդերը ևս նույն ձևով են կոչել՝ «Berde Davit»): Վերջինս կառուցված էր վերոհիշյալ 2 վտակների միախառնման դժվարամատչելի վայրում՝ **Քաղքիկ** գյուղի մոտ, որը միջնադարում բերդի արվարձանն է եղել: Պահպանվել էին այս հնագույն բերդաքաղաքի տների և այլ շինությունների ավերակները, սալարկված փողոցների մնացորդները ևն: Ինչպես հայտնի է, «Սասնա ծռեր» դյուրագնավեպում **Սասունի** հիմնադիր են համարվում **Սանասար** և **Քաղդասար** երկվորյակ եղբայրները: Նրանց պատմական իրական նախատիպերը հայրասպան **Շարաշարա** (=Սանասար) և **Ադրամելեք** կամ **Աբամելիք** (=Քաղդասար) եղբայրներն են, որոնք պետական հեղաշրջում կատարելու նպատակով սպանել էին իրենց հայր, Ասորեստանի **Սինախերիբ (Սենեբերիմ)** արքային և փրկվելով պատժից՝ ապաստանել էին Հայոց երկրում (Ք. ա. 7-րդ դ. սկ.): Իրականում **Սասունը** (հնագույն ձևը՝ **Սանասունը**, ինչպես արձանագրված է «Աշխարհացոյց»-ում որպես գավառանուն) Հայաստանի հնագույն բնակավայրերից է և չի բացառվում, որ կառուցվել է կիլիկյան ամրոցի հիմքի վրա: Ուշագրավ է, որ մինչև 1915 թ. տեղի հայերի մոտ պահվում էր բերդի «Հիշատակարանը», որը Եղեռնի ժամանակ **Գենջո** և **Հակոբ Գրիգորյան** եղբայրները թաքցրել էին **Կապածգետի** ափին գտնվող «**Մուրադի քար**» քարանձավում (հետագա ձակատագիրն անհայտ է): Բերդաքաղաքը **Սանասնյաջր** կամ **Սասունցի** նախարարական տոհմի իշխանանիստ կենտրոնն էր, որի ներկայացուցիչները **Սանասարին** համարում էին իրենց նախահայր: Նրանք այստեղ կառավարել են մինչև 17-րդ դ., երբ հարևան շրջաններից («**Առաջավոր գյուղեր**», **Ընկուզաձոր**, տես վերը) մուտք գործած **բոզկցի (բոզըկի)** քրդական ցեղը տիրացել էր **Սասնա բերդին** և հաստատվել **Գավառի** տարածքում: Սրա հետևանքով նրանք ժամանակի ընթացքում սկսեցին զգալի թիվ

կազմել մասնավորապես **Կապածգետի** ձորահովտում՝ **Գավառի** հյուսիսարևմտյան հատվածում: Հատկանշական է, որ **Գավառի** բնակավայրերի մի մասը դիտարկվում էր որպես **Սասուն** բերդաքաղաքի արվարձաններ (**Անձղանք**, **Բոզկանք**, **Դարբնկանք**, **Ծառկանք** կամ **Սարեկան**, **Ճախրկանք** կամ **Ճախրակ**, **Մաղենք**, **Մթորբանք**): Ինչպես ցույց են տալիս որոշ գյուղանուններ, այստեղ բնակվել են համապատասխան մասնագիտության տեր արհեստավորները: Ի դեպ, **Սասուն** բերդաքաղաքի բնակիչների մի մասը եղել են բոշաներ, ինչպես ցույց են տալիս **Մթորբանք (Մորրբան)** և **Մաղենք** (իմա՝ «մաղագործների գյուղ») անվանումները:

1915 թ. Գավառի 1000-1200 հայ բնակչության մի զգալի մասը կարողացել է փրկվել և հետագայում տեղափոխվել Արևելյան Հայաստան: Նրանց սերունդները հաստատվել են **ՀՀ Արագածոտնի** մարզի **Դավթաշեն**, **Լեռնարոտ**, **Ներքին** և **Վերին Սասնաշեն** գյուղերում: Ի դեպ, փոքրաթիվ հայեր մինչև 1960-ական թթ. դեռ բնակվում էին Գավառի **Անձղանք**, **Քաղքիկ** և այլ գյուղերում:

#	Բնակավայր	Եկեղեցի	Դպրոց	Այլ տեղեկություններ
1	Անձղանք			
2	Արքիկ (Արգիկ)	եկեղեցի (ավերակ)		
3	Բոզկանք (Բոզըկան)	եկեղեցի (ավերակ)		
4	Բրդանք			
5	Դարբնկանք			
6	Խան	եկեղեցի (3, ավերակ)		Գյուղը գտնվում էր Ծովասարի արևելյան բարձրադիր ստորոտին: Այստեղ կառուցված էր քարե իջևանատուն («խան»), ուր բնության արհավիրքներից ապաստանում էին ճանապարհորդները:
7	Խոծոձվանք (Խոցոցվանք, Խողց)			Գյուղն այդպես է կոչվել Սասունի նշանավոր Խոծոձվանք կամ Սբ Աստվածածին (Սբ Թումա Առաքելո) բարձրավետ ճարտարապետությամբ կառուցված վանքի անունով:
8	Ծառկանք (Սարեկան)			
9	Հարկուրք (Հարկորք)	եկեղեցի (ավերակ)		Միտակայքում պահպանվել էին Գոմեր գյուղի և վերջինիս եկեղեցու ավերակները:
10	Ճախրկանք			Գյուղում էր գտնվում « Դավթի ջրաղացը », որի «անմաշ» քարը, ըստ ավանդության տեղադրել է սիրելի դյուցազուներ: Այս գյուղից էր «Սասնա ծեղերի» ասմունքող Թամո Դավթյանք :
11	Մաղենք (Վերին և Ներքին)			
12	Մթորբանք (Մորրբան)	եկեղեցի (ավերակ)		
13	Քաղքիկ			
14	Քաշքշենք			

6. Փասնք (Փասնաց կամ Բուսանաց գավառ)

Փասնքը (Փասնաց կամ Բուսանաց գավառ) գտնվում էր Սասունի կենտրոնում՝ զբաղեցնելով **Ծովասարից** սկզբնավորվող գեղատեսիլ **Հոեցվար** լեռնապարի հարավային ճյուղավորումների ձորահովիտները: Ժողովուրդը գավառի անունը բացատրում էր անտառապատ, ճոխ բուսականություն ունեցող տարածքի առկայությամբ: Սահմանակից էր հյուսիսից **Գավառին (Բուն Սասուն)**, արևելքից՝ **Սասնաջրի** միջին ձորահովտով՝ **Մարաթուկին** և **Հազո-Խարյջոզին**, հարավից և հարավարևմուտքից՝ **Խիանքին**, հյուսիս-արևմուտքից, **Ջանդուսի ձորով**՝ **Տավորիկին**: Կենտրոնը **Գոմոց** կամ **Մատին Առաքելո** վանքն էր՝ Սասունի առավել նշանավոր

ուխտավայր-մենաստաններից մեկը (տե՛ս ստորև): **Փասնքի** տարածքը հռչակված էր բազմաթիվ սրբացված լեռներով և քարաժայռերով, երևույթ, որը հատուկ էր ընդհանրապես ողջ Սասնա աշխարհին: Տեղացի հայրենասեր քահանա **Մկրտիչ Մուրադյանի** շնորհիվ պահպանվել են դրանց մեծագույն մասի ուշագրավ անունները՝ **Արծվիքար, Դեղինքար, Խոսունքար, Կիրակնոխքար** (կազմված էր օրվա ժամերը խորհրդանշող 24 քարակարկառներից, «կիրակնուտ» – բրբռ. «շաբաթ»), **Կործովքար, Կոնկիքար, Հեղթի քար, Հիթոցքի քար** («խիթերը» բուժող), **Պոլոգքար, Մսկթոր, Սուրբ Թորոսի քար, Սուրբ Հեղինեի քար, Փարախքար, Փեթակքար** (ավանդության համաձայն՝ այստեղ էին փակված Դավթի Քուռկիկ Ջալալի «հրեղեն» նժույգն ու «անժանգ» Թուր Կեծակին), **Քառորիքար** և այլն: Մեծ եղեռնի նախօրեին ավելի քան 5000 հայերը կազմում էին **Փասնքի** բնակչության գերակշիռ մեծամասնությունը: Քրդերը բնակվում էին միայն առանձին գյուղակնեքում կամ հայերի հետ խառն:

Փասնքը հայ ազատագրական շարժման կենտրոններից էր: 1890-ական թթ. սկզբին **Փասնքի Խնձորիկ** և **Միջգեղ (Մըշկեղ)** գյուղերի հայերը մի քանի անգամ հետ են մղել թրքական կանտնավոր ուժերի և քրդական հրոսակների հարձակումները: Գավառի **Մկթենք (Մկթինք)** գյուղում է ծնվել լեգենդար **Գևորգ Չավուշը (Ղազարյան, 1870–1907)**: 1915 թ. գավառը, հատկապես **Գոնոց վանքի** շրջանը («**Յորթ թաղ գավառ**») Սասունի պաշտպանության հարավարևմտյան ուղղության կենտրոնն էր: Մեծաթիվ թշնամական ուժերի դեմ մայիս–հունիս ամիսներին այստեղ ծավալված մարտերը ղեկավարում էին **Միջգեղի (Մըշկեղ)** գյուղապետ, իշխան **Շառռ Մրտիկյանը (Մրտկա Շերրո)**, **Գոնոց վանքի** վանահայր **Ստեփան** վարդապետ **Քաղդասարյանը, Միջգեղի** տեր **Գասպար քահանա Սիմոնյանը, Քելլո Աղջեն, Գենջո Մուրադյանը, Միծո Միսաքը, Դավիթ Երեցյանը** և ուրիշները: Մինչև ատամները զինված թշնամու գերակշիռ ուժերի ճնշման տակ **Փասնքի** ինքնապաշտպանական ջոկատները հարկադրված էին մարտերով նահանջել **Անդոկ**, ուր հավաքվել էին Սասունի մյուս շրջաններից կենտրոնացած մարտիկները և խաղաղ բնակչությունը: Սակայն զինամթերքի և սննդի խիստ անբավարարությունը, որնէ կողմից օգնության հույսի իսպառ բացակայությունը, թշնամական անընդհատ սեղմվող օղակն ի վերջո խեղդեցին նաև տեղի դիմադրության վերջին օջախները: Իրենց մյուս հայրենակիցների հետ ահավոր կորուստներ կրեցին նաև **Անդոկում** հավաքված փասնցիները: Հարկ է նշել, որ **Փասնքից** հեռանալ չհասցրած հարյուրավոր բնակիչներ (ծերեր, կանայք, երեխաներ) ապաստանել էին **Տավորիկի** սահմանագլխին գտնվող **Գոնիկ** հսկա քարանձավում: Ցավոք, նրանք գրեթե ամբողջությամբ բնաջնջվեցին ջարդարարների կողմից: Միայն 1916 թ. փետրվարին վերապրածներին հաջողվեց տեղափոխվել ռուսական բանակի կողմից գրավված Մուշ, որտեղից էլ՝ Արևելյան Հայաստան: Ներկայումս **Փասնքի** այլևայլ գյուղերից փրկվածների սերունդներն ապրում են **ՀՀ Արագածոտնի** մարզի **Աջնակ, Ներքին Բազմաբերդ** և **Ներքին Սասնաշեն** գյուղերում, որոշ ընտանիքներ կան նաև **Սիրիայի Հալեպ** քաղաքում: Հարկ է նշել, որ կոտորածից փրկված փոքրաթիվ հայերի, այնուամենայնիվ, հաջողվեց վերահաստատվել ամայացած որոշ գյուղերում (**Գոնք, Դալիոր, Թաթանք, Թարուք, Խնձորիկ, Միջգեղ, Փշուտ, Փասնք** ևն), ուր լիակատար մեկուսացման պայմաններում ապրում էին մինչև 1970-ական թթ.: Հետագայում նրանց մեծագույն մասը ևս ստիպված էր վերջնականապես լքել բնօրրանը՝ տեղափոխվելով Ստամբուլ:

Գոնոց կամ Մատին Սրբո Առաքելո Պետրոսի վանք

Մսկթոր լեռնագագաթից շուրջ 4 կմ հարավ-արևելք գտնվում էր Սասունի առավել նշանավոր վանքերից մեկը՝ **Գոնոց կամ Մատին Առաքելո Սրբո Պետրոսի** վանքը: Կոչվում էր նաև **Ճկույթ վանք** (ժողովրդի շրջանում՝ «Ոսկեձկույթ»), **Սուրբ**

Աստվածածին կամ **Գոմրնձայրո վանք**: Նշանավոր և սիրելի ուխտավայր էր: Ի դեպ, հարգի էր նաև քրդերի շրջանում, որոնք այն կոչում էին Bukê Jânnâtê (քրդ. «Դրախտի հարս», թերևս՝ Աստվածածնի քրդերեն պատվանունը): Մենաստանի անվանումը կապվում է տեղացիների շրջանում լայնորեն տարածված ուշագրավ մի ավանդազրույցի հետ, որի համաձայն՝ **Գոմրի** ոմն «մեղավոր» տանուտեր, ի նշան ապաշխարության, **Հոռո** քաղաքից Սասուն է տեղափոխել Սուրբ Պետրոս Առաքյալի ձկույթը՝ այն ի պահ տալով մենաստանում: Ուշագրավ է, որ այդ ավանդությունը դեռ 1622 թ. տաղի է վերածել գրիչ **Հակոբ** եպիսկոպոս **Արծկեցին** (գրանցված է ներկայումս **Երուսաղեմի Սրբոց Հակոբյանց** վանքի ձեռագրատանը պահվող գրչագիր մի Տաղարանում): Վանքը միաժամանակ Փսանքի և **Քաջարենց** («**Քաջայրենց**») տոհմի պարոնտերության կենտրոնն էր, որի ներկայացուցիչները միջնադարում նույնիսկ ժառանգաբար էին ստանձնում **Սասունի** առաջնորդության պաշտոնը: **Գոմոց վանքի** թեմը Սասունում և հարևան **Բշերիկում** ժամանակին ունեցել է ավելի քան 100 (որոշ տվյալներով՝ անգամ 200) հարկատու գյուղ: Առաքյալի ձկույթից բացի՝ որպես պաշտելի սրբություն մենաստանի զանազանում պահվել է նաև **Վահան Մամիկոնյանի** «պողպատե» վահանը: Վանքում կար փոքր ձեռագրատուն՝ շուրջ 3 տասնյակ մատյաններով, վանական դպրոց: Իր հայրենանվեր գործունեությամբ հայտնի է **Գոմոց վանքի** վերջին վանահայր **Ստեփան** վարդապետ **Բաղդասարյանը**, որին հաջողվել էր Մեծ եղեռնի նախօրեին զգալիորեն բարելավել մենաստանի տնտեսական դրությունը՝ վերանորոգելով վանքի ջրատար խողովակաշարը, ինչպես նաև կասեցնել շրջակա քուրդ աղաների նկրտումները վանական կալվածքների և հողատարածքների նկատմամբ: Հայրենասեր հոգևորականն իր անմիջական մասնակցությունը բերեց նաև Սասունի 1915 թ. հերոսամարտին և նահատակվեց հայրենի լեռներում:

#	Բնակավայր	Եկեղեցի	Դպրոց	Այլ տեղեկություններ
1	Բվի	Սբ Աստվածածին (նախկին վանք)		Գյուղում հռչակված էր Մուրադատուր Սբ Սարգիս սրբավայր-ուխտատեղին: Հայտնի էր նաև մեկ այլ ուխտատեղի՝ Շեղդարը : Բվիից հվ գտնվող Բողքար լեռնագագաթը նույնպես համարվում էր սիրելի սրբավայր, քանի որ ժողովրդի պատկերացմամբ նրա վրա «դրոշմված էին» Սասունցի Դավթի երկաթե կոշիկների հետքերը:
2	Գոմր	Սբ Քառասուն Մանուկ		Եկեղեցին նշանավոր ուխտատեղի էր: Հայտնի ուխտավայր էր նաև գյուղից շուրջ 3.5 կմ արմ. բարձրացող Սնկթոր լեռը: Գոմրի շրջանը հայտնի էր « Յոթը թաղ գավառ » անունով:
3	Զանդուս			
4	Թաթանք			
5	Թալիոր (Դալիոր)	Եկեղեցի (ավերակ)		Գյուղից հարավ բարձրանում է Տղամանուկ լեռնագագաթը (1610 մ), ուր գտնվում էր նույնանուն սրբավայր-ուխտատեղին: Այստեղ ուխտի էին գալիս անպտուղ կանայք:
6	Թաջպատրիկ (Թաշպատրիկ)			
7	Թարուք (Թարոնիկ)	Եկեղեցի (2)		Գյուղի մոտակայքում էր Սբ Հակոբի (Սբ Էկոբ) բուժիչ ջերմուկը, որը միևնույն ժամանակ հայտնի ուխտատեղի էր:
8	Լըսոնք			
9	Խնձորիկ (Խնձորենք)	Սբ Աստվածածին		Ժողովրդի կողմից Խնձորեց Սբ Աստվածածին կոչվող եկեղեցին ուխտատեղի էր:
10	Կոռնգես (Կորնկես)	Եկեղեցի (ավերակ)		
11	Կրեձոր (Կրիձոր)			Կրեձորը , Ճամը և Մեգրեն Գոմոց վանքի ազարակներն էին:

12	Հոսներ	Սր Եղիա		Գյուղում և շրջակայքում պահպանվել էին ևս 3 եկեղեցիների ավերակներ:
13	Ճամ (ձրմ, Ձորնթափ)			
14	Մարրսթ	Սր Խաչ		
15	Մեգրե (Սըգրեն, Վանից թաղ)	եկեղեցի (ավերակ)		
16	Միջգեղ (Սըշկեղ)	Սր Գևորգ	1	եկեղեցին հայտնի ուխտատեղի էր: Միջգեղի արևմուտքում բարձրացող Սուլթանաղբյուրի սարը (1979 մ) նույնպես ուխտագնացության վայր էր:
17	Մկթինք	Սր Աստվածածին	1	
18	Պագեխտուն (Պսետուն)			
19	Պալոյենք (Բալոյենք)	Սր Վարվառա		եկեղեցին հայտնի ուխտատեղի էր:
20	Զամալենք (Զմալենք)			Գյուղի մատուռը («լուստուն») սրբավայր-ուխտատեղի էր նաև տեղի քրդերի համար (քրդ. zivarâ):
21	Ջոջենք			
22	Ջրթնիկ (Ջրթինք)	Վիշապասպան Սր Գևորգ		եկեղեցին հայտնի ուխտատեղի էր, ուր այցելում էին նաև քրդերը:
23	Սիսոնք			
24	Ցեցնքար (Ցիցքար, Քարերերման)			Գյուղն անվանումը ստացել է մոտակա՝ ուղիղ Սասնաջրի աջ ափին շուրջ 60 մ բարձրացող ժայռաբարից:
25	Փշուտ	եկեղեցի (ավերակ)		
26	Փսանք	եկեղեցի (2, ավերակ)		Կից պահպանվել էին համանուն՝ ժողովրդի կողմից «քաղաք» կոչվող, բնակավայրի ավերակները:
27	Քաջառենք (Քաջոինք)	եկեղեցի	1	
28	Քարավանք			Գյուղում գտնվում էր ամայի Սր Գևորգ վանքը (Քարավանք):
29	Քիսթաղ (Քիստախ)	Սր Քրիստափոր		Մի հազվագյուտ հիշատակարանի համաձայն՝ 1623 թ. եկեղեցուն ձեռագիր Ավետարան է նվիրաբերվել: Սր Քրիստափորը սիրված ուխտատեղի էր:
30	Քսրոնք			
31	Քրղամանք	եկեղեցի (ավերակ)		

Ծնթ.- **Լքսոնք, Ջոջենք, Սիսոնք** և **Քսրոնք** բնակավայրերի տեղադրությունը վերջնականապես չենք ձշտել: Չի բացառվում, որ դրանք ավելի բազմամարդ գյուղերի «թաղ»-գյուղակներ են եղել և չեն արտացոլվել ժամանակի քարտեզագրական նյութերում:

7. Խուր-Բոնաշեն

Գավառը գտնվում էր Սասունի հյուսիսարևելյան մասում **Սիմասրի (Սևսար, նաև Խաչատաջ)** հարավային ստորոտներից սկիզբ առնող **Խուրաջուր** գետի (այդպես էր կոչվում **Խարզանաջուր-Արզանն** ակունքների և վերին հոսանքի հատվածում) ձորահովտում: Սահմանակից էր հյուսիսից **Սիմասրի** լեռնաշղթայով՝ **Մուշ-Տարոնին**, արևելքից՝ **Վերին Չուխուրին**, հարավից՝ **Մոտկանի** լեռների հյուսիսային ճյուղերով և **Խարզանաջրի** ձախակողմյան **Գգելսի (Երախու)** վտակի հունով՝ **Մոտկանին**, հվ-արևմուտքից՝ **Խուրի** լեռներով՝ **Մարաթուկին** և **Գավառին (Բուն Սասուն)**, իսկ արևմուտքից՝ **Շատախին (Մուսանք)**: Կենտրոնը **Ռարաթ**

կամ **Խուրթա Դատվան** (նաև **Խուրթաբերդ**) գյուղն էր: Գավառը համապատասխանում է աշխարհացույցյան **Տուրուբերան** աշխարհի **Խոյթ** գավառին: Ավելի ուշ վերջինիս տարածքի հս-արևմտյան հատվածը սկսեց կոչվել **Բոնաշեն** (Ժողովրդական ստուգաբանությամբ անունը կապում են գավառի լեգենդար իշխան **Բոնիկի** հետ): **Խուրթ** զբաղեցնում էր հվ-արևելյան հատվածը: 2 գավառակների մոտավոր սահմանը ձգվում է **Միմսար (Սևսար)-Ռաբաթ-Թաղական-Աստվածածնի լեռներ** գծով:

Խուրթ-Բոնաշենի հայերը մինչև ուշ միջնադար պահել էին իրենց թե՛ էթնիկական, թե՛ քաղաքական գերակայությունը: Գավառի տարածքը թեև 15-րդ դ. ընդգրկված էր ռոժդեկիների Բիթլիսի (Բաղեշ) իշխանության կազմում, սակայն տեղի հայ իշխանները պահպանել էին իրենց ինքնավարությունն ու արտոնությունները: Խուրթ-Բոնաշենում հատկապես մեծ հռչակ ունեին **Արծվիք-Կրպնիկ** ավանի «Կարմիր իրիցու տան» ներկայացուցիչները: Չի բացառվում, որ այստեղ ևս գոյություն է ունեցել հայկական պարոնտերություն (կամ վերջինիս մոտ հոգևոր-աշխարհիկ իշխանություն), որը կապված էր գավառի հռչակավոր **Սուրբ Աղբերիկ** կամ **Վանդիր վանքի** հետ: Հատկանշական է, որ մինչև 1870-ական թթ. հայերը և քրդերը (խուրթեցի և բալաքցի ցեղերից) հավասար իրավունքներ ունեին, և գավառի կառավարիչները փոխնիփոխ ընտրվում էին մերթ հայ իշխաններից, մերթ քուրդ բեկերից: Օսմանյան առաջին պաշտոնյաները (մյուդիր-գյուղապետ) **Խուրթ-Բոնաշենում** հայտնվել են 1870-ական թթ. կեսերին: Թրքական գերիշխանության հաստատումը խիստ բացասական հետևանքներ ունեցավ գավառի համար՝ խարխլելով և աղճատելով հայ-քրդական երբեմնի հարաբերությունները: 1877-1878 թթ. ռուս-թուրքական պատերազմին հաջորդող ժամանակաշրջանում, հատկապես 1890-ական թթ. համիդյան «գուլումի» տարիներին, **Խուրթ-Բոնաշենից** սկիզբ առած արտագաղթի հետևանքով հարյուրավոր հայ ընտանիքներ տեղափոխվեցին **Մուշ, Բուլանուխ, Մանազկերտ, Խնուս, Վարդո** կամ Արևելյան Հայաստան: Հետևանքները, անշուշտ, ծանր էին: **Խուրթ-Բոնաշենի** մի շարք հատվածներում սկսեցին գերակշռել քրդերը, ավերվեցին կամ ամայացան հայկական բազմաթիվ եկեղեցիներ: Միայն 1908 թվականից հետո օգտվելով ստեղծված համեմատաբար տանելի պայմաններից՝ շատ խուրթեցի հայեր վերադարձան հայրենի բնօրրան՝ վերականգնելով ավերված օջախները: Առաջին աշխարհամարտի նախօրեին **Խուրթ-Բոնաշենի** հայ բնակչության թիվը կազմում էր շուրջ 5000 մարդ: Եղեռնի տարիներին խուրթեցիները ևս ծանր կորուստներ ունեցան: Այնուամենայնիվ, որոշ քուրդ ցեղապետերի և աղաների մարդասիրական վերաբերմունքի շնորհիվ գավառի հայ բնակիչներից շուրջ 2000 հոգի կարողացավ փրկվել բնաջնջումից և 1916 թ. անցնել Արևելյան Հայաստան: Նրանց սերունդների հիմնական մասն այժմ բնակվում է **ՀՀ Արագածոտնի** մարզի **Ագարակ, Աջնակ, Ավան, Իրինդ, Կաթավաձոր, Ներքին Բազմաբերդ, Վերին Սասնաշեն** գյուղերում: Մեծ թվով խուրթեցիների ժառանգներ կան նաև **ՀՀ Շիրակի** մարզի **Ոսկեհասկ** գյուղում:

Սուրբ Աղբերիկի (Աղբերկա, Աղբյուրիկի) կամ Վանդիր վանք

Սասունի առավել նշանավոր մենաստաններից էր: Գտնվում էր Խուրթ-Բոնաշենի հյուսիսարևմտյան հատվածում՝ **Օշուտ** և **Կծանք** գյուղերից շուրջ 2 կմ հյուսիս՝ **Միմսարի (Սևսար)** լեռների ստորոտին: Վանքի հիմնադրումն ավանդաբար վերագրում են Սուրբ Թաղևոս Առաքյալին, որը, քարոզչությամբ հասնելով գավառի տարածք, ապագա մենաստանի մոտ հրաշագործությամբ բուժիչ աղբյուր է բխեցրել: Այնուհետև առաքյալը բուժել է գավառապետ **Բոնիկ** իշխանի (Ժողովրդական ավանդագրույցում՝ «ամիր») անդամալույծ որդուն, որը թույլատրել է տեղում վանք կառուցել: Առաքյալի պատվին աղբյուրը կոչվեց **Սուրբ Թաղևոսի**, իսկ վանքը վերջինիս անունով կոչվեց **Սուրբ Աղբերիկի** կամ **Աղբերկա**: Ավելի

ուշ մենաստանը վերականգնել է **Սուրբ Գրիգոր Լուսավորիչը**, իսկ 9-րդ դ. այն հիմնովին վերակառուցվել է: Վանական համալիրի մեջ էին մտնում **Սուրբ Աստվածածին**, **Սուրբ Կարապետ**, **Սուրբ Հոգի**, **Սուրբ Ստեփաննոս**, **Սուրբ Փրկիչ** (ի դեպ, վանքը հայտնի էր վերջին անվամբ ևս) եկեղեցիները: Մենաստանի հռչակի մասին են խոսում այստեղ հնուց պահվող մի շարք պաշտելի սրբություններն ու մասունքները՝ **Սուրբ Խաչ** կամ **Գործելիարույց Սուրբ Նշան** (կոչվում էր նաև «**Աղբայրիկ**» կամ «**Պողե խաչ**», որը, մի ավանդագրույցի համաձայն, այստեղ ի պահ էր տրվել Հակոբ Տյառնեղբոր կողմից), **Սուրբ Խաչափայտի** գամբը (քնեները, որոնցից մեկը Թադևոս Առաքյալը նետել էր իր սքանչելաբուղխ աղբյուրի մեջ՝ ջրին հաղորդելով հրաշագործ բուժիչ հատկություն), **Սուրբ Գեղարզը** (sic!), Հիսուսի արյունով սրվակը ևն: Պահպանվել էին մի շարք խաչքարեր: Տարածքում կար նաև սեպագիր արձանագրությամբ քար: **Սուրբ Աղբերիկը** եպիսկոպոսանիստ էր և ուներ ընդարձակ ու հարուստ թեմ, որը, համաձայն մեզ հայտնի վանական կոնդակի տեքստի (ոչնչացել է Մեծ եղեռնի տարիներին), հաստատվել է դեռ Հայոց **Սմբատ Ա Բագրատունի** արքայի կողմից: Մինչև Մեծ եղեռն մենաստանի թեմի կազմում են եղել **Խութ-Բռնաշենը**, **Մոսկանը**, **Ջորկանը** (**Դերզնի** կամ **Տերզնի**), **Շիրվանը** (**Շերվանք**), **Սղերզը** (քաղաքը), **Մանազկերտը**, առանձին շրջաններ **Բուլանուխում** և **Մուշ-Տարնում**:

Վանքը պարսպապատ էր (Ղ. Ինձիձյանի խոսքերով՝ «բերդանման») և 18-րդ դ. 40-ական թթ. խութեցիների կենտրոնն էր Մուշի **Ալադին բեկի** դեմ կռիվների ընթացքում, որի պատճառով խիստ տուժել էր: Ի դեպ, Սուրբ Աղբերիկը հաջորդ հարյուրամյակին ևս ժամանակ առ ժամանակ կողոպտվել և ավերվել է քրդերի կողմից: Սրանով հանդերձ, այն չի դադարեցրել իր գործունեությունը: Վանքում կար վանական գիշերօթիկ դպրոց, փոքրիկ ձեռագրապահոց (միջնադարում գրչության կենտրոն էր): Վանքը նշանավոր ուխտավայր էր: 1915 թ. **Սուրբ Աղբերիկը** հիմնովին կործանվել է, իսկ միաբաններն ու դպրոցի սաները՝ գոհվել: Բարբարոսաբար ոչնչացվել կամ կողոպտվել են նաև մենաստանում պահվող ձեռագրերը, սրբություններն ու եկեղեցական սպասքը:

ա) Բռնաշեն

#	Բնակավայր	Եկեղեցի	Դպրոց	Այլ տեղեկություններ
1	Արինոք (Հարինոք)	Եկեղեցի		
2	Արուք (Արունք)	Սբ Մինաս (նախկին վանք)		Հիշվում է նաև Սբ Ստեփաննոս եկեղեցին:
3	Բլուկանք (Պլուկանք)			
4	Բլուկանք (Պլուկանք), Ներքին			
5	Բլրիկ (Բլուրիկ)	Սբ Կարապետ		Գյուղում պահպանվել էր Բերդգոռ ամրոցը: Ինչպես այս, այնպես էլ Ընկուզիկի (տե՛ս ստորև) բերդերը գտնվում էին Դեղկանց ջուր վտակի ծաղկավետ ձորահովտի հանդիպակաց ափերին: 2 ամրոցների կառուցումը վերագրվում է լեգենդար Բռնիկ իշխանին:
6	Դաշտաղեն	Սբ Մինաս		Գյուղում է ծնվել հայտնի գրող և թարգմանիչ Խաչիկ Դաշտենցը (1910-1974)
7	Դաշտամիրան (Մեզրե)	Սբ Կարապետ		Քրդերեն նշանակում է «իշխանաց բերդ», որը գտնվում էր գյուղի շրջակայքում:
8	Եզիանք			
9	Ջորավա(ր)	Սբ Թորոս		Եկեղեցուն կից կային կանգուն խաչքարեր:
10	Ընկուզիկ	Սբ Ստեփաննոս		Պահպանվել էր միջնադարյան ամրոցը (Ընկուզկա բերդ):

11	Կծանք	Սր Գևորգ, Սր Կարապետ		
12	Կոստ	Սր Աստվածածին		Գյուղի շրջակայքում հայտնի էին ավանդական 7 թվով հայկական ավերակ վանքեր և եկեղեցիներ, այդ թվում՝ Սր Թալիա, Սր Կարապետ, Սր Ստեփաննոս, Սր Տյառնեղբայր ևն:
13	Հնդրկծոր (Հինդծոր)	եկեղեցի		
14	Մահբուրանք (Մահբրանք)	Սր Կարապետ (ավերակ)		Գյուղի մոտ գտնվում էր Մահբուրանքի կամ Ամիրի բերդը , որի կառավարիչը, ժողովրդական ավանդության համաձայն, Բոնիկ իշխանն էր:
15	Շահվերդի			
16	Շամիանք (Շամիրան)	Սր Հարություն		Եկեղեցին կառուցված էր ինքնատիպ ճարտարապետական ոճով: Գյուղից հյուսիս՝ Սինսարի ստորոտին գտնվում էին Գոմրկանք, Արծվիք (Կրպնիկ) և Քնոտ (Կիրթնոտ) երբեմնի հայաբնակ գյուղերը, ուր պահպանվել էին եկեղեցիների մնացորդներ: Չի բացառվում, որ Արծվիքը խույթի պարոնտերության կենտրոններից մեկն էր, ուր պահվում էր «Կարմիր իրիցանց» սրբացված տոհմական « Կոճղեգ » Ավետարանը, որով երդվել են հայ ռազմիկները, և, ընդհանրապես՝ բոլոր խույթեցիները:
17	Շամիանա մեզրե			
18	Շենիստ (Շնիստ), Վերին			Գյուղի մոտակայքում գտնվում էր Սր Կարապետ վանքը:
19	Ուշտափ (Հուշթափ)			
20	Օշուտ (Հուշուտ)	Սր Կարապետ, Սր Ստեփաննոս		
բ) Խույթ				
1(21)	Ագրակ	Սր Առաքյալ (ավերակ), Սր Աստվածածին		Գյուղի մոտ գտնվում էր Ագրակա մեզրե երբեմնի հայկական գյուղը:
2(22)	Այախ(Այախ)			
3(23)	Ավարք (Հավրք)	եկեղեցի (կիսավեր)		
4(24)	Բարբթաղ (Պապթաղ)	Սր Կիրակոս		Գյուղում կար ևս մի ավերակ եկեղեցի՝ Սր Կարապետ անունով:
5(25)	Գելոնք (Գեղոնք)	Սր Աստվածա- ծին, Սր Կարապետ		
6(26)	Գործվար			
7(27)	Թաղավանք (Թաղվանք, Անդիի թաղ)	Սր Աստվածածին, Սր Ստեփաննոս		Գյուղում կային ևս 2 ավերակ եկեղեցիներ՝ Սր Զիկրաշեն և Սր Սարգիս :
8(28)	Թաղվու	Սր Հակոբ		
9(29)	Թաղվրծոր (Թաղիծոր)	Սր Աստվածածին, Սր Կարապետ		
10(30)	Լորտնծոր	Սր Հովհաննես		Մոտակա լեռան գագաթին պահպանվել էին վանքի ավերակներ:
11(31)	Կոռ (Կորդ)	Սր Քառասուն Մանուկ		Շուրջ 5 կմ արևելք Բոնաշեն երբեմնի հայաբնակ ավանն էր: Հարավում՝ Մոտկանի հետ սահմանագլխին, գտնվում էին Թաղ, Թաղվիկ (Թխպիկ) և Խաչթաղ (Խաշթաղ) երբեմնի հայաբնակ գյուղերը: Կոռում է ծնվել Գլաճորի միջնադարյան հռչակավոր համալսարանի հիմնադիր Ներսես Մշեցին :

12(32)	Շեն	Սբ Ստեփաննոս		Գյուղում պահպանվել էին Սբ Աստվածածին, Կուրանա Սբ Ձիավոր և Սբ Մարծմեա ավերակ եկեղեցիները, որոնք հայտնի ուխտավայրեր էին: Եվ մեկը՝ Սբ Հակոբը , գտնվում էր գյուղի շրջակայքում: Շենի մոտ պահպանվել էր նաև բնակատեղի: Գյուղը հայտնի էր բուժիչ ջերմուկով: Շենը Խութ-Բռնաշենի համեմատաբար մեծ գյուղերից էր՝ 1914 թ. 80-100 տուն հայ բնակչով: Շեն և Ագրակ գյուղերի միջև գտնվում էր երբեմնի հայաբնակ Տափ գյուղը:
13(33)	Շենիստ (Շնիստ), Ներքին	Սբ Աստվածածին		
14(34)	Պարծղենք (Պարզղինք)	Սբ Սարգիս		
15(35)	Ռաբաթ (Խուլթա Դատվան)			Պահպանվել էր ավերակ բերդը (Խուլթաբերդ):
16(36)	Սալապոս(տ)	եկեղեցի (ավերակ)		
17(37)	Սարեգոլե (Սարրնգոլե, Սարեկան)			
18(38)	Փիճոնք	Սբ Թովմաս (Կիսավեր)		
19(39)	Փղոնք (Փեղոնք)			
20(40)	Փրեվանք (Փրիիվանք)			Գյուղանունը հուշում է, որ մոտակայքում ժամանակին եղել է մենաստան:
21(41)	Քեովու (Բերվու)	Սբ Սիոն (Սիոնաշեն)		Գյուղում կար ևս մի ավերակ եկեղեցի՝ Սբ Սարգիս անունով: Վերջինս հիշատակվում է գրիչ Մելքիսեֆի կողմից 1428 թ. ընդօրինակված 2 ձեռագիր Մաշտոցներում («ընդ հովանեա Սրբոյն Սարգսի և որդւոյ նորա Սարտիրոսի և Սրբոյն Շամօսի): Ի դեպ, ձեռագրերից մեկում Քեովուն նշվում է որպես գյուղաքաղաք, ինչը վերջինիս նշանակալի բնակավայր լինելու ապացույց է:
22(42)	Օխին (Հոխին)			

Ծնթ. Խութ-Բռնաշենի գյուղական դպրոցների մասին տվյալներ բացակայում են:

8. Մոտկան

Մոտկանը գրավում էր Սասունի ծայր արևելյան հատվածը՝ **Խարզանաջրի** վերին, մասամբ՝ միջին ավազանը (այդ մասում՝ **Մեղանի ջուր**): Սահմանակից էր, հյուսիսից, **Մոտկանի** լեռներով՝ **Խուլթ-Բռնաշենին**, արևելքից, **Հորմորի** լեռնազանգվածով՝ **Բիթլիսի** կենտրոնական գավառին, հարավից՝ **Խարզանին**, իսկ արևմուտքից, **Մարաթուկի** և **Քարմլեձի** լեռնազանգվածներով՝ **Մարաթուկին** ու **Հազո-Խարլջոզին**: 20-րդ դ. սկզբին տեղացիների շրջանում պահպանված հնագույն մի ավանդազրույցի համաձայն, գավառի կենտրոնական հատվածում՝ **Գուլանց (Քուլանիս)** գյուղից արևմուտք բարձրացող **Խալամսու** լեռան գագաթին է ապաստանել Նոյան տապանը:

Կենտրոնը **Դատվան** ավանն էր (որոշ տվյալներով՝ **Մցուն**), որը 20-րդ դ. սկզբին ամբողջովին գրկվել էր հայ բնակչությունից: Մոտկանը վաղ միջնադարում գտնվում էր պատմական Աղձնիքի կազմում: Նրա տարածքում գոյություն ուներ 2 գավառ: Արևմտյան մասը զբաղեցնող **Սալնոձորը** գրավում էր **Խարզանաջրի** աջափնյա **Շինա** կամ **Մրջանաց** գետ և **Երկանգոտի** կամ **Բողնուտի (Բոկնոտու)** գետ վտակների ձորահովիտները: Ուշ միջնադարում գավառը՝ նոր կենտրոնի անունով կոչվում էր «**Բողնաբդու (=Բողնուտ) երկիր**»: Արևելյան հատվածը զբաղեցնող **Գզելս (Գզելխ)** գավառն ընդգրկում էր նույն գետի ձախափնյա **Գզելսի** կամ **Երախու**, **Մցու** կամ **Քաշախի**, **Գուլանից**, **Եղիկի** կամ **Եղգիկի** (<**Եղեգիք**) վտակների ձորահովիտները: Այս վարչական բաժանումը գոյատևեց մինչև ուշ միջնադար: Գլխավոր ցեղախմբի՝ մոտկցիների (թրդ. motiki, թրք. mudaki) անունով վերոհիշյալ

վարչամիավորներն աստիճանաբար ստացան **Մոտկան** հավաքական անունը:

15-րդ դ. վերջինիս տարածքում էլ ձևավորվեց քրդական ռոժըլի (ռուզափ) ցեղային միության կիսանկախ իշխանությունը, որի կենտրոնը հետագայում դարձավ Բիթլիս կամ Բաղեշ քաղաքը: Քրդական այլևայլ ցեղերի մուտքը զգալիորեն աղձատել է տեղի ազգացեղային նկարագիրը: Պարբերաբար կրկնվող ցեղամիջյան ընդհարումներն ու կռիվները ծանր հետևանքներ են ունեցել հայ բնակչության համար: Ընդ որում, այս վիճակը շարունակվեց նաև ռոժըլիների՝ Բիթլիսի իշխանության վերացումից հետո: Ընդհուպ մինչև 20-րդ դ. սկիզբը Մոտկանի ռազմատենչ ցեղերն ապրում էին կիսանկախ կյանքով, և թուրքական իշխանությունն այստեղ գրեթե անվանական էր: Շարունակվող միջցեղային կռիվների և օսմանյան պատժիչ ռազմերթերի հետևանքով Մոտկանի մի շարք շրջաններ լիովին հայաթափվել էին: Առաջին աշխարհամարտի նախօրեին հայ բնակչությունը կենտրոնացած էր հիմնականում գավառի արևելյան և հյուսիսարևմտյան հատվածներում: Հայերի թիվը մեծ էր նաև Մոտկանի հարավարևմտյան Կրխու-**Ջրտուի** գյուղախմբում, որը գրավում էր հյուսիսում՝ **Շնագ** (2405 մ) և **Փորակ** (2255 մ), իսկ հարավում՝ **Արծիվ** լեռնազանգվածներով եզերված շրջանը: 1914 թ. **Մոտկանի** հայ բնակչության թիվն անցնում էր 5000-ից (1850-ական թթ. 8000-ի փոխարեն):

Գավառակի հայ բնակչությունը ևս անմասն չմնաց Եղեռնի սարսափներից: Վերապրած մոտկանցիները տեղափոխվել են Արևելյան Հայաստան, և այսօր նրանց սերունդները բնակվում են ՀՀ **Արագածոտնի** մարզի **Ագարակ**, **Շղարշիկ** և **Ուջան**, ինչպես նաև Արմավիրի մարզի **Ապագա** գյուղերում: Հարկ է, սակայն, նշել, որ Մոտկանի հայերին մասամբ հաջողվեց խուսափել կոտորածից և չգաղթել: Փրկված ընտանիքները մինչև 1960-ական թթ. դեռ ապրում էին **Արփի**, **Բողնուտ**, **Կնձու**, **Մերեթաղ**, **Սցու**, **Նիչ**, **Շեն**, **Ջրտու** ևն գյուղերում: Սակայն թուրքական իշխանությունների և Քրդական բանվորական կուսակցության (PKK) միջև սկսված բացահայտ զինված առձակատումը նրանց հարկադրել է աստիճանաբար տեղափոխվել Ստամբուլ: Որոշ տվյալներով, միայն Նիչ գյուղից այժմ Ստամբուլում ապրում է 100 ընտանիք (տե՛ս նաև Մարաթուկի մասում):

#	Բնակավայր	Եկեղեցի	Դպրոց	Այլ տեղեկություններ
1	Ասպնջեր (Աշըբներ), Ներքին	Սբ Մտեփանոս		Շուրջ 3 կմ արևմուտք՝ Գզեխի վտակի ափին պահպանվել էր Մեղիքարի կամ Մաղիքարի (Մեղվաքար) ավերակ բերդը:
2	Ասպնջեր (Աշըբներ), Վերին	Սբ Թուխ Մանուկ		Երկու Ասպնջերների շրջակայքում հայտնի էր Սբ Դանիելի վանքը: Մոտկանի առավել հայաշատ բնակավայրերն էին և 1914 թ. միասին ունեին շուրջ 130 տուն բնակիչ (ավելի քան 1000 մարդ):
3	Արդրեր (Հարդրեր)			
4	Արծվիք (Արծիվ)			
5	Արփի (Հարփի)	Սբ Թուխ Մանուկ		
6	Բողնուտ (Բողնարդ, Բուկնուտ, Պուզնուտ)	Սբ Աստվածածին		Գուղում կար ևս մեկ եկեղեցի: Մոտակայքում գտնվում էր Բողնուտի կամ Բուկնուտի ավերակ բերդը: Վերջինս ուշ միջնադարում պատմական Սալնոձորի կենտրոնն էր, որի համար էլ Խարզանաջուր (Արզան) գետի աջափնյակը մինչև Մոտկանի և Սասնո լեռներ կոչվել է « Բողնարդու » (= Բողնուտ կամ Բուկնուտ) երկիրը:
7	Բրուտք	Սբ Հակոբ		
8	Գզեխ (Նիզեն, Գզեղխ)	Սբ Կիրակոս	1	Մոտակայքում պահպանվել էր կիսավեր վանք: Պատմական Աղձսիքի Գզեղխ կամ Գզեխ գավառի հնագույն կենտրոնը (ուշ միջնադարում՝ « Գզեկու երկիր »): Գզեխի շրջանում մեծ համբավ ուներ Սբ Կիրակոս վանքը, որը հայտնի ուխտատեղի էր: Մոտակայքում երևում էին Գզեխի բերդի (« Գզխուբերդ ») ավերակները:

9	Խուր (Խուրտյանք)	Սբ Էջմիածին		Գյուղում կար մատուռ՝ Սբ Ստեփանոս :
10	Ծրտուտ (Ցրտուտ)			
11	Կարք (Կորք)	Եկեղեցի		
12	Կնձու (Գնձու, Կձու)	Սբ Գևորգ	1	Գյուղի դպրոց էին հաճախում նաև հարևան Քաշախի երեխաները:
13	Կրխու (Գրխու)	Սբ Հակոբ, Սբ Տյառնեղբայր (Սբ Տերնակ)		19-րդ դ. 60-ական թթ. Կրխուն Մոտկանի առավել բազմամարդ գյուղերից էր՝ 100 տուն հայ բնակչով: Սակայն քրդերի վայրագությունների հետևանքով սկիզբ առած արտագաղթը բացասաբար անդադարձավ նաև Կրխուի վրա, որի բնակչությունը 1914 թ. կազմում էր ընդամենը 60 տուն:
14	Կոր			
15	Հավութաղ (Աբութաղ)	Սբ Աստվածածին		
16	Հաշկաղարան (Ըշկրդարա)			Գյուղի անունը քրդերեն նշանակում է «չոր ծառեր»:
17	Հրոք	Սբ Կիրակոս		Գյուղի շրջակայքում պահպանվել էին մի քանի վանքերի և եկեղեցիների ավերակներ (Սբ Մար-հանա, Սբ Մանկաս, Սբ Եղիա, Սբ Կիրակոս): Հրոքի մոտ տեսանելի էր մեծ բնակատեղի (տեղացիների շրջանում հայտնի էր որպես «քաղաք»):
18	Մարմանդ (Նարմանդ)	Եկեղեցի (2)		
19	Մեծձոր			1532 թ. Մահոտեի («Մուղտափ») Ղազարը գյուղի Սբ Աստվածածին եկեղեցուն է նվիրաբերել մի ձեռագիր Ավետարան: Ցավոք, գյուղի եկեղեցու մասին այլ տվյալներ չեն հանդիպում:
20	Մերեթաղ (Միրթաղ, Վերին-գեղ)	Սբ Քրիստափոր		
21	Մերքոխ (Վերքոխ)			
22	Մզուք (Սզոք)	Սբ Ստեփանոս		Մզուքում նույն 1452 թ. ընդօրինակվել է 2 ձեռագիր (պահպանվել են հիշատակարանները), ինչը խոսում է միջնադարում գյուղի հայ գրչության կենտրոն լինելու մասին:
23	Միձանք (Միզանք)	Սբ Գևորգ		
24	Մցի (Մձու)	Սբ Սարգիս		Մոտակայքում երևում էին մենաստանի ավերակներ:
25	Նիչ	Սբ Գևորգ, Սբ Սարգիս		Հայտնի էր նաև Կարմրախաչ սրբավայրը (վանք ⁶): Նիչը 13-րդ դ. նշանավոր փիլիսոփա Նսայի Նչեցու ծննդավայրն է, որը Գլաձորի հոշակավոր միջնադարյան համալսարանի հիմնադիրներից մեկն էր: Գյուղից մի փոքր հվ-արևմուտք գտնվող Փսխտուր քարաժայռի (հոշակված էր իր ամեհի ջրվեժով) շրջակայքում էր գտնվում երբեմնի հայաբնակ Գոմք ամայի գյուղը, որի քարաշեն եկեղեցին կանգուն էր մինչև 1915 թ.: Նիչի հվ-արևելյան կողմում գտնվող Տափլեր գյուղում պահպանվել էր համանուն (Տարլի) ավերակ բերդը: 1674 թ. Նիչի շրջանի Նահիայի ձորի Կորկստոց գյուղում ծնված Պողոս Գծողն Ավետարան է ընդօրինակել:
26	Շեն (Շենքք)	Սբ Աստվածածին		Գյուղից հյուսիս համանուն (կոչվել է նաև Սարեր) փոքր լեռնապարի վրա էր գտնվում Սբ Աստվածածին կանգուն վանքը: 19-րդ դ. 60-ական թթ. Շենը Մոտկանի առավել բազմամարդ գյուղերից էր՝ 200 տուն հայ բնակչով: Սակայն հետագա տասնամյակներին տեղ գտած արտագաղթի հետևանքով գյուղի բնակչությունը նկատելիորեն նվազել էր և 1914 թ. կազմում էր 50-60 տուն:
27	Որձենք (Օրձանք, Հորսենք)	Սբ Գևորգ		Գյուղի մոտ պահպանվել էր նույնանուն ամայի վանքը (Եթե գյուղի նույն եկեղեցին չէր):
28	Ուսխա (Օխսա)			
29	Ուրուս	Եկեղեցի (կիսավեր)		Գյուղի մոտակայքում գտնվում էին համանուն բերդի ավերակները:
30	Ջրտու (Ճրտու)	Եկեղեցի (կիսավեր)		

31	Սալնձոր (Սրաձոր, Սալնո-ձոր)			Պատմական Աղձնիքի Սալնձոր կամ Սալնաձոր գյուղը գավառի երբեմնի վարչական կենտրոնն էր՝ Խարզան (Արզան) գետի ձախակողմյան Գատվանի կամ Երախի (Էրախու) օձանդակի ձորահովտում:
32	Սիսաղ (Մետոբ)			
33	Սղունդ (Սլընտ)	Սբ Հակոբ, Սբ Շմանիկ		Հիշվում է նաև Սբ Գևորգ եկեղեցին: Սղունդ և Հրոբբ գյուղերի շրջակայքում ժամանակին մեծ համբավ է ունեցել մեկ այլ Սբ Աստվածածին վանքը: Ժողովրդական գրույցների համաձայն հատուկ խողովակաշարով Մարութասարից ջուր էր մատակարարվում մենաստանին: Անգամ Սբ Աստվածածնի զանգակատնից մինչև Գոնոց վանք (Փսանաց գավառ) ձգված էր բարակ մետաղե շղթա, որով 2 մենաստաններում զանգահարությունը միաժամանակ էր տեղի ունենում: Սակայն Սղերդին ենթակա Ջոխի քուրդ բեկերից մեկն ավերել է Սբ Աստվածածինը , իսկ միաբաններին, ի թիվս որոնց՝ 2 վարդապետի, գերի տարել, որից հետո մենաստանը վերջնականապես անայացել ու լքվել է: Նույն ձակատագրին է արժանացել Մոտկանի Սբ Լուսավորիչ վանքը, որը հայերի համար շարունակում էր մնալ սիրված ուխտատեղի: Ցավոք, լրացուցիչ տվյալների բացակայությունը հնարավորություն չի տալիս ճշտելու վերջինիս տեղադիրքը:
34	Տանձի (Տանձիկ)			Գյուղից շուրջ 2-2.5 կմ արևելք՝ Խարզանի աջ ափին գտնվող Կալոբ (Կալահոկ, Կեղոկ) և Քերուցիք (Քերվու) գյուղերում պահպանվել էին ավերակ բերդեր:
35	Քաշախ	Սբ Հակոբ		

9. Մարաթուկ կամ Խարզանք (Վերին Խարզան)

Գավառակն ընկած էր **Սասնաջրի** վերին ավազանի ձախափնյակում՝ ընդգրկելով վերջինիս բազմաթիվ մանր վտակների (**Արև** կամ **Տագետ**, **Արծվից ջուր**, **Գետերու ջուր**, **Փիրշնից** կամ **Հաղթի ջուր** են) ձորահովիտները: Սահմանակից էր հյուսիսից **Աստվածածնի** և **Խուլթի** լեռներով՝ **Խուլթ-Բոնաշենին**, արևելքից՝ **Սասունի** լեռներով՝ **Մոտկանին**, արևմուտքից, **Սասնաջրի** հունով (այդ հատվածում՝ **Հորասնք < Հորձանք**)՝ **Գավառին** կամ **Բուն Սասունին** և **Փսանքին**: Գավառակի հարավային սահմանը հասնում էր մինչև **Խարլջոզի** շրջակայքը: Անունը կապվում է Սասունի առավել նշանավոր և սրբացված լեռնագագաթի՝ երկկատար **Մարաթուկի** կամ **Մարութասարի** (2967 մ) հետ, որի պաշտամունքն արմատներով հասնում է վաղնջագույն հայկական դիցաբան: 7-րդ դ. բյուզանդացի հեղինակ **Գևորգ Կիպրացու** կողմից գրանցված մի հազվագյուտ, բայց արժեքավոր ավանդազրույցի համաձայն՝ տեղի հայերը համոզված էին, որ Նոյան տապանը հանգրվանել է **Մարութասարի** գագաթին (հեղինակը լեռնանունը գրանցել է **Մարաթկեն** - հունարեն՝ *Μαραθκέν*, ինչը բխում է ժողովրդական **Մարաթուկ** տարբերակից): Լեռան վրա առ այսօր պահպանվել է **Սուրբ Աստվածածին** մատուռը, որը նախկինում խոշոր վանական համալիր էր: Ըստ «Սասնա ծոեր» դյուցագանավեպի՝ վանքի կառուցումը վերագրվում է **Մեծ Միերին (Այուծ Միեր)**: Թեև 20-րդ դ. սկզբին սրբավայրը նկատելիորեն անշքացել էր, սակայն չէր կորցրել իր ժողովրդականությունը: Ամեն տարի Վարդավառի տոնակատարությանը այստեղ քառօրյա ուխտի էին գալիս հազարավոր մարդիկ ինչպես Սասունից, այնպես էլ հարևան գավառներից: Առաջին օրը տեղի էր ունենում Մեծ կամ աջ գագաթի, իսկ երկրորդ օրը՝ Փոքր կամ ձախ գագաթի «ուխտը»: Հաջորդ 2 օրերին տեղի էր ունենում պարերով և լարախաղացությամբ ընթացող մեծ տոնակատարություն, կազմակերպվում էր հրաձգություն և այլն: Մարութասարի լանջին գտնվում էր «**Շարան քարեր**» անունը կրող քարակույտը, որը ժողովրդական ավանդազրույցի համաձայն՝ Աստծո հրամանով քարացած երդմնագանց մի հովիվ է՝ իր հոտի հետ:

Միջնադարում **Մարաթուկի** տարածքում գոյություն ունեին 2 վարչամիա-

վորներ՝ **Արծվյաց (Արծվեց) գավառ** և **Հորասնք**: Քրդական **բալաբցի** (քրդ. biliki) արաբախոս ցեղի առանձին ստորաբաժանումների (քրդ. qâbilâ) մուտքը նկատելի փոփոխություններ մտցրեց տեղի ազգացեղային նկարագրում: Հարկ է նշել, սակայն, որ նորեկները հիմնականում գերծ էին մահմեդական մուլեռանդությունից (անգամ չունեին մզկիթներ, թյալատություն չէին կատարում), տիրապետում էին հայերենին: Ըստ այդ ցեղերի բնակության՝ **Մարաթուկի** գավառակը 20-րդ դ. բաժանվում էր 3 գյուղախմբի՝ **ջալալի (ջալալիք)**, **շեկո** (հայկական աղբյուրներում՝ «Շեկո տուն» կամ «Շեկոյի տներ») և **բդրցի**: Տեղի քուրդ աղաների համեմատաբար հանդուրժողական վերաբերմունքն էր պատճառը, որ **Մարաթուկի** հայ բնակչությունը խուսափեց 19-րդ դ. վերջի-20-րդ դ. սկզբի զանգվածային կոտորածներից: Սակայն 1915-1916 թթ. երիտթուրքական իշխանությունների հանցագործ հայատյաց քաղաքականությունն այստեղ ևս հայկական կոտորածներ հրահրեց: Տեղի 3000-ի հասնող հայությունը թեև ծանր կորուստներ կրեց, սակայն կարողացավ իր գործուն մասնակցությունը բերել Սասունի հերոսամարտին (ինքնապաշտպանության ղեկավարներից հայտնի է **Քելլո Աղձեն՝ Գումարտեր** գյուղից): 1916 թ. տեղի վերապրած հայերի հիմնական մասը նույնպես հարկադրված էր հեռանալ բնօրրանից և հաստատվել Արևելյան Հայաստանում: Նրանց սերունդներն այժմ բնակվում են **ՀՀ Արագածոտնի** մարզի **Աջնակ**, **Ներքին Բազմաբերդ**, **Ներքին և Վերին Սասնաշեն** ևն գյուղերում: Հարկ է նշել, որ առաջնորդվելով սեփական տնտեսական շահերով՝ քրդական ավագանու որոշ ներկայացուցիչներ, այնուամենայնիվ, պաշտպանեցին հայերին թուրքական և հարևան ցեղակիցների բարբարոսություններից: Դրա շնորհիվ մինչև 1960-ական թթ. վերջը զգալի թվով հայ բնակչություն կար գավառակի **Արեգղեն**, **Գոմեք**, **Խաստփի**, **Կոշակ**, **Կուռթեր** կամ **Կորդեր**, **Հոուտ**, **Ձորաղբի**, **Ճակուտ**, **Վարդենց**, **Փիրշենք** և այլ գյուղերում: Սակայն իրավիճակի վատթարացումը, թուրքական իշխանությունների և Քրդական բանվորական կուսակցության (PKK) միջև սկսված բացահայտ զինված առձակատման հետ կապված, հարկադրեց եղեռնը վերապրած ընտանիքների աստիճանաբար տեղափոխվել ավելի «ապահով» Սոսմբուլ, ուր մեր օրերում ասունցիների բավական սովոր համայնք է ապրում: Բնօրրանի հետ կապը հիմնականում պահվում է **Սուրբ Մարաթուկ** ամենամյա ուխտագնացության և հայրենակցական միության շնորհիվ:

#	Բնակավայր	Եկեղեցի	Դպրոց	Այլ տեղեկություններ
1	Արջոնք (Արջնոց, Հառչոնք)			Գյուղում հայտնի էին Սբ Քառասուն Մանուկ և Մեղոք քար սրբավայր-ուխտատեղիները: Վերջինս մի հսկա ապամած էր, որը ծառայում էր մեղանշած անձանց «դարձի բերելու» համար: Քարաժայռի վերին, ամառաչելի մասում մարդկային էակների տեսքով խորաքանդակներ էին նշմարվում, որոնք կարծես անոթահար փորձում էին թաքնվել մարդկանցից: Ժողովրդական ավանդության համաձայն դրանք հարագատներ են եղել («սանիկ և սանամայր»), որոնք հանցավոր կապի մեջ են եղել: Մեղոք քարը լեռնականների շրջանում ընտանեկան սրբությունն ու բարոյականությունը պաշտպանելու և մեղսագործությունը կանխարգելելու յուրատեսակ սրբավայր էր:
2	Առվտնոց (Առվտոց, Արևտոց)	Եկեղեցի		
3	Արեգղեն	Եկեղեցի (ավերակ)		
4	Արծվիք	Եկեղեցի (2)		Մոտակայքում պահպանվել էին Սբ Դանիել (ասոր. Մար Դանել) վանքի ավերակները:
5	Բաղրմուտ	Եկեղեցի		
6	Գետեր (Գետկից)			

7	Գումարտեր (Գումրդդեր)	եկեղեցի (ավերակ)		Շուրջ 1.5 կմ հս գտնվող Ազվո (Ազվի) գյուղում 1534 թ. Աբրահամ քահանայի ձեռքով ընդօրինակված Ավետարանի հիշատակարանում պահպանվել է բնակավայրի նախնական անունը՝ Աղունք (սխալ ընթերցմամբ՝ «Աղունք»):
8	Գումեք (Գումեր)			Մինչև 1890-ական թթ. հայաբնակ էին գյուղի հարևան Վերին և Ներքին Զալալիք (Զալալեք) գյուղերը:
9	Դալարձոր (Դալրձոր)	եկեղեցի (ավերակ)		
10	Թզի			
11	Իրգանք	եկեղեցի		
12	Խաստփի (Խաստրի)	եկեղեցի (ավերակ)		
13	Խարվեր (Խավվեր, Խարվինք)			
14	Խնձորտա (Խնձորտանք)			
15	Խոփեր (Էրուր)			
16	Խուջարինք (Խոճարենք)			
17	Կոշակ (Գոշակ)	եկեղեցի (ավերակ)		
18	Կորով	եկեղեցի (ավերակ)		
19	Կուղթեր (Կորդեր)	եկեղեցի (ավերակ)		Գյուղում է ծնվել հայ ազգային-ազատագրական շարժման ռահվիրա Արարոն (Առարել, 1863-1893)
20	Հաթնի			Գյուղում պահպանվել էր ավերակ Սբ Կարապետ վանքը (Հաթնովանք): Մի փոքր արևմուտք՝ Սասնաջրի ձախ ափին, գտնվում էր Ժրենց կամ Ժոնց վանքը, որը հայտնի ուխտատեղի էր:
21	Հաղթ (Հաղտ)			
22	Հապշտափ (Հապշտուղ)			
23	Հոեկոնք (Հրեկոնք)	եկեղեցի (ավերակ)		
24	Հոուտ (Հրուտ, Հրունտ)	եկեղեցի (2, ավերակ)		
25	Ձորաղբի (Ջրաղբի)			
26	Ձորք (Ծորք, Ձորիկ)			Գյուղում (« Ծորք ») Մելքիսեթ սարկավագի կողմից 1493 թ. ընդօրինակված Ավետարանի հիշատակարանից պարզվել է տեղի եկեղեցու անունը՝ Մարսխակ («ընդ հովանեաւ սուրբ տաճարին Մարսխակայ », ասորերեն, հայերեն՝ Սբ Սահակ): Այլ տեղեկություններ չեն հանդիպում:
27	Ճակուտ (Ջակուտ)			
28	Շնխեղդ			
29	Շիկալենք (Շիկալինք)			
30	Ռըմկանք (Ռըմխանք)			
31	Ռշնիկ			
32	Վարդենոց (Վարդինոց, Վարդինանց)	եկեղեցի (ավերակ)		Հայտնի էր մոտակա Վարդինանց Սբ Քառասուն Մանկանց և Սբ Խաչ ուխտատեղիներով: Գյուղի անմիջական հյուսիսարևմտյան հարևանությամբ գտնվում էր երբեմնի հայաբնակ Մանչկուտ գյուղը:
33	Վիժանք (Վիժակ)			
34	Տագետ(ք)	եկեղեցի (ավերակ)		
35	Փիրշենք	Սբ Խաչ	1	
36	Քարկից			

10. Հազո-Խարլջոզ կամ Հազվան

Այս գավառը գրավում էր Սասուն պատմաաշխարհագրական մարզի արևելյան խոշոր հատվածը **Խարզանաջրի (Արզան)** և **Սասնաջրի** միջագետքում: Սկզբնաղբյուրներում կոչվել է նաև **Հազու** կամ **Սուրցվոց երկիր**: Սահմանակից էր հյուսիսից **Մարութասարի** լեռնազանգվածով՝ **Մարաթուկին**, արևելքից՝ **Քարմլեձ** լեռնագագաթով և **Խարզանաջրի** գետահովտով՝ **Մոտկանին** և **Խարզանին**, հարավից՝ վերջինիս **Քառնջ** գյուղախմբին (թրք. nahıye), արևմուտքից՝ **Սասնաջրի** հունով՝ **Խիանքին** և **Փասնքին**: Գավառը հռչակված էր իր մեծաթիվ աղահանքերով (հիմնականում հեղուկ տեսքով): Կենտրոնը **Խարզան** գետից 3.2 կմ արևմուտք, վերջինիս աջակողմյան **Շաթ (Շատ)**, նաև **Մարջու** կամ **Մերգիի գետ** օժանդակի ափին՝ լեռնային տեղանքում, կառուցված **Հազո** կամ **Հզու (Խզու)**, նաև **Հզվա քաղաք**) բերդաքաղաքն էր: Մինչև 15-րդ դ. **Հազոն**՝ իր շրջակայքով, **Թոռնիկյան-Չորդվանեյան** իշխանների տիրույթներից էր: Սակայն քրդական ցեղերի աստիճանական ներթափանցումը բացասական հետևանքներ ունեցավ: Քուրդ պատմիչ **Շարաֆ-խան Բիթլիսիի** կողմից գրանցված ավանդազրույցի համաձայն՝ Բիթլիսի քուրդ ավագանու ներկայացուցիչներին (ամենայն հավանականությամբ՝ **Այյուբյանների** շառավիղներից) 15-րդ դ. հաջողվել է տիրանալ Սասունի արևելյան շրջաններին՝ քաղկեդոնական **Դավիթ** իշխանից խլելով նաև **Հազո-Հզուն** (ըստ **Շարաֆ-խանի՝ Սասունի բերդը**): Հետադրու այն դարձավ **Սասունի (Հազո)** կիսանկախ իշխանության (օտար հորջորջմամբ՝ հյւկւմետ) կենտրոնը: Վերջինս, որը տարածվում էր **Մարութասարից** մինչև **Արևմտյան Տիգրիս**՝ ներառելով նաև վերջինիս աջափնյակում տարածվող **Հիսն-Քեյֆի** շրջանը, 16-րդ դ. կեսերից ընդգրկվեց նորաստեղծ **Դիարբեքիի նահանգի** (թրք. eyalet) կազմում: Օտար տիրապետության հաստատումը, սակայն, հայերին լիովին դուրս չնդեց կառավարման ոլորտից: **Սասունի** կամ **Հազոյի** իշխանությունում նրանք օգտվում էին լայն արտոնություններից, ազատված էին հարկերից, գերծ էին կրոնական հալածանքներից: Ավելին, այստեղ, ինչպես նաև հարևան Մարաթուկում հաստատված քրդական **բալաքցի** կամ **բլքքի** ցեղի ստորաբաժանումները (թրք. qabilâ, գլխավորները՝ **մուսեցի, սառմնցի, սասունցի** կամ **սուսանի**) բարեկանական հարաբերությունների մեջ էին տեղաբնիկ հայերի հետ, գերազանցապես արաբախոս էին, շատերը լավ գիտեին նաև հայերեն և գերծ էին կրոնական մոլեռանդությունից: Ընդ որում, որոշ տվյալներ թույլ են տալիս ենթադրելու, որ նրանց ցեղային վերնախավն ուներ հայկական ծագում: Համանման իրավիճակ էր նաև **Հազո-Խարլջոզին** հարավից սահմանակից և իշխանության կազմի մեջ մտնող **Խարզանում (Արզան)**, ուր մինչև 19-րդ դ. 1-ին կեսը գոյություն ուներ եզդիահայկական ինքնավարություն (տես իր տեղում): **Հազո (Հզու)** բերդաքաղաքը 18-րդ դ. վերջին ուներ 1000 տուն բնակիչ՝ կեսը հայեր: Սակայն 19-րդ դ. 40-ական թթ. օսմանյան պետության կողմից քրդական և հայկական իշխանությունների ոչնչացման հետևանքով այն զգալիորեն անշքացավ, իսկ բնակչության մեծ մասը հեռացավ այլևայլ վայրեր: Մինչև 19-րդ դ. 70-ական թթ. վերջը **Հազոն (Հզու)** Դիարբեքիի նահանգի (թրք. vilâyet) **Մղերդի** սանջակի **Սասուն** գավառի (թրք. kaza) վարչական կենտրոնն էր: 1878 թ. վերջինս անցավ նորակազմ Բիթլիսի (Բաղեշ) նահանգին, բայց իր նախկին կարգավիճակը պահպանեց մինչև 1890-ական թթ.: Ճիշտ է, Սասունի 1894 թ. հերոսամարտից հետո վերոհիշյալ նահանգի Մուշի սանջակի կազմում ընդգրկված Սասունի գավառի կենտրոնը՝ հեռահար որոշակի նպատակներով, փոխադրվեց հայկական ինքնավար գավառների սահմանագլխին գտնվող **Ղարլջոզ** կամ **Խարլջոզ** ավան (թրք. Kabilcevaz, այժմ՝ Sason), սակայն **Հազոն** չկորցրեց իր կարևորությունը: Ըստ էության՝ այն երկրամասի միակ քաղաքային բնակավայրն էր, արհեստագործական կենտրոնը: Բարձր ժայռոտ վայրում գտնվում էր **Հազոյի Սուրբ Աստվածածին** հսկա եկեղեցին: Վերջինս կոչվում էր նաև «**Քաջ Մուշեղ**» ի պատիվ այստեղ թաղված մի հայ իշխանավորի

(տապանաքարը գտնվում էր եկեղեցու խորանի առջև): **Հագոյում (Հզու)** գործում էր Կ. Պոլսի **Միացյալ ընկերության** կողմից դեռ 1880-ական թթ. բացված վարժարան՝ տղաների և աղջիկների համար նախատեսված բաժիններով: Այն Սասունի ամենամեծ ուսումնական հաստատությունն էր, ուր Մեծ եղեռնի նախօրեին դասավանդում էին շուրջ մեկ տասնյակ մանկավարժներ: Ճարտարապետական ուշագրավ կառույց էր **Հագոյի** ժայռափոր բերդը, որին կից պահպանվել էին կիսավեր 2 մատուռներ: Բերդաքաղաքի մոտ կար **«Հաջր-էլ-բեկ»** անունով մի հսկա քարակարկառ, որի վրա երևում էին ջրհորդանների հետքեր: Ժողովրդի կարծիքով՝ ինչպես այս, այնպես էլ ոչ շատ հեռու ցցված **«Սլըմբուկ քարը»** «երկնքից էին ընկել» (արդյո՞ք երկնաքարեր էին): 1914 թ. բերդաքաղաքն ուներ շուրջ 500 տուն բնակիչ, որի գերակշիռ մեծամասնությունը կազմում էին հայերը՝ 250-300 տուն (այլ տվյալներով՝ 350 տուն) կամ 2000-2500 անձ:

Մեծ եղեռնի նախօրեին **Հագո-Խարլոզոյի** գավառակի հայ բնակչության թիվը՝ բերդաքաղաքի հետ, անցնում էր 8000-ից: Հայաշատությամբ աչքի էր ընկնում մասնավորապես **Կուսգետ** կամ **Կուցգետ** գյուղախումբը, որի 1 տասնյակի հասնող գյուղակ-«թաղերը» սփռված էին **Խարզան** գետի (այդ հատվածում՝ **«Ջոջ» կամ Մղունդա գետ**) **Կուսգետ** (բրբռ. **Գուսկետ**) կամ **Կուցգետ** վտակի վերին ձորա-հովտում: Ընդ որում, **Կուսգետի** գյուղախմբի անբաժան մասն էր համարվում նաև նույն գետակի ստորին հովտում (այդ մասում՝ **Ասու գետ**) ընկած **Ասիին**: Տեղի ռազմունակ հայերը և քրդերը համարվում էին միասնական ցեղի (**«աշիրեթ»**) անդամներ՝ օգտվելով զգալի ներքին ինքնուրույնությունից և ազատությունից:

1915 թ. Հագո-Խարլոզոյի գավառակի հայ բնակչությունը ենթարկվեց զանգվածային բնաջնջման: Առանձնակի ծանր կորուստներ կրեց **Հագո (Հզու)** բերդաքաղաքի հայությունը: **Հագո-Խարլոզոյի** վերապրած բնակիչների զգալի մասը ստիպված էր տեղափոխվել Արևելյան Հայաստան: Նրանց սերունդներն այժմ բնակվում են **ՀՀ Արագածոտնի** մարզի **Ուջան, Ներքին Բազմաբերդ** և այլ գյուղերում: Սակայն գավառակի ոչ բոլոր հայերն են լքել բնօրրանը: Մինչև 1960-ական թթ. վերջը **Ասի, Գունք, Կուսգետ** (առանձին թաղերում), **Հով, Նադոբան, Նորշեն** գյուղերում և **Ղարլոզոյ (Խարլոզոյ,** այժմ՝ Sason) քաղաքում դեռ ապրում էին զգալի թվով հայ ընտանիքներ: Հետագա տասնամյակներին, սակայն, նրանց մեծագույն մասն աստիճանաբար տեղափոխվեց **Ստամբուլ**, թեև առ այսօր պահել է կապը հայրենի եզերքի հետ:

#	Բնակավայր	Եկեղեցի	Դպրոց	Այլ տեղեկություններ
1	Ամերիկ (Ամարո)			
2	Ասի (Ասի, Ասու)			Հայտնի էր Ասիի (Ասու) բերդը: Գյուղից շուրջ 3.5 կմ հյուսիս՝ Կուսգետի ձախ ափին, գտնվում էր Չողուտ (Ջողուտ) երբեմնի հայաբնակ գյուղը: Արձեկցի Գրիգոր արեղան 1502 թ. Ասիի տանուտերերի համար («աստուածասեր տանուտէրքն գեղջին Ասոյ») մի ճարտեսիր է ընդօրինակել:
3	Բաշտրբան (Պաշտրբան), Ներքին	Սբ Հակոբ		
4	Բաշտրբան (Պաշտրբան), Վերին	Սբ Մինաս		
5	Բնունիկ (Բինունիկ)			
6	Գեյհասանան			
7	Գունք (Գոմրք)			
8	Դերա			
9	Դերջոջ (Տերձուձ, Ջոջվանք)			Գյուղի անունը հուշում է, որ այստեղ ժամանակին գործել է մենաստան:
10	Ջնգովիկ			
11	Ջոնախեթ			
12	Լրփներ (Ալլրբան՝)			
13	Խարլոզոյ (Ղարլոզոյ), ավան	Սբ Ստեփաննոս	1	Ավանում եղել է ևս 1 եկեղեցի, որի մասին տեղեկությունները բացակայում են: Սասունի առավել բազմամարդ բնակավայրերից էր՝ շուրջ 400 տուն բնակչով, որից ավելի քան 100-ը՝ հայ: Տեղանունը քրդերեն նշանակում է «բնկուզագոմ» :

14	Խորան (Հորանք)			
15	Կգրլա			
16	Կող	Սբ Քառասուն Մանուկ		
17	Կուսգետ (Կուցգետ, Գուսկետ, քրդ. Xizixta)	Սբ Աստվածածին		<p>Կուսգետի «թաղ»-գյուղական էին՝ Արևկոնք, Արմոքնին, Գոնք, Լիբլանք, Կոտրծեր, Ներքիթաղ, Վերիթաղ կամ Վերընթաղ, Քարծեր, Օղնգեջ: Գյուղախմբի հայ և թուրք բնակչության թիվը Մեծ եղեռնի նախօրեին հասնում էր 2600 մարդու, որից հայեր՝ տարբեր տվյալներով, 1200-1500 մարդ (100-150 տուն): Կուսգետի արևելյան կողմում բարձրացող Քարվեճ լեռան (2054 մ) գագաթին կար սրբացված աղբյուր-ուխտատեղի, որի հորդացած ջուրն ավազան էր գոյացրել: Կուսգետի ակունքների շրջանում Մարութասարից արևելք, բխում էր Վանդիր հորդ աղբյուրը, որը հայտնի ուխտատեղի էր: Ըստ ավանդության՝ այն առաջացել էր կայծակի հարվածից: Վանդիր աղբյուրի մոտ ժամանակին գործել է մենաստան, որի հետքերը չէին պահպանվել:</p>
18	Հով			
19	Զման (Ծման)			
20	Մանկիկ			
21	Մատղի (Միթղի)			
22	Մերգի (Մարջի, Մերկա)			
23	Մզրեխալք			
24	Մլքեշա(ն)			
25	Մչկատար			
26	Նադոբան			
27	Ներքիթաղ			
28	Նորգեղ (քրդ. Göndênu)	Եկեղեցի		Գյուղում կար ևս 1 ավերակ եկեղեցի:
29	Նորշեն			<p>Գյուղը գտնվում էր Հազոյից շուրջ 3 կմ հարևելք՝ Խարզանի միջին ձորահովտում (այս հատվածում գետը կոչվել է նաև Նորշինաջուր): Գյուղում էր գտնվում Սասունի նշանավոր վանքերից մեկը՝ Սբ Կոնոնոսը (Կանանոս, Ժողովրդի շրջանում՝ Յոթողոտ Կոնոնոս), որը հայտնի էր նաև Սբ Խաչ կամ Նորշինավանք անուններով: Մենաստանում պահվել է Քրիստոսի Խաչափայտի մի կտորը, որի հասնար այն կարևոր ուխտատեղի էր: Ընդ որում, ուխտի էին գալիս նաև քրդերը, քանի որ այստեղ էր գտնվում ժամանակին Սբ Կոնոնոսը հարևան թուրք բեկերից և ավազակաբարո ցեղերից պաշտպանած, բարերար Շեյխ Օմարի (Շեյխ Ամար) շիրիմը: Այդ պատճառով քրդերի շրջանում վանքը հայտնի էր որպես Dera Şex Amîr: Սբ Կոնոնոսը 18-րդ դ. ուներ ընդարձակ թեմ, որի մեջ մտնում էր 200 գյուղ Խարզան, Ռեղվան (Ռնդվան) Գուրդիլան (Կերտուլան) և Հին-Քեյֆ գավառներում: Սակայն 19-րդ դ. 2-րդ կեսին ազդեցությունը կորցրած և նկատելիորեն անշքացած մենաստանը ենթարկվում էր Սասունի Մատին Սրբո Առաքելո Պետրոսի կամ Գոնոց վանքի վերատեսչությանը: Սբ Կոնոնոսից հագիվ 2 կմ հարավ՝ նույն Խարզանի և Շաթի միախառնման մոտ պահպանվել էին սրբատաշ քարերով կառուցված Սբ Առովմյանց վանքի ավերակները (Ժողովուրդը կոչում էր Քամատուն): Ըստ ավանդության՝ այստեղ էին նահատակվել նախարարներ Ատոմ Գանունին և Մանածիիր Ռշտունին: Նորշենի մոտ պահպանվել էին նաև 11-րդ դ. քարաշեն կամրջի ավերակներ:</p>

30	Շելմն			
31	Շելխան(ք)			
32	Պելլավ (Բիլլավ), Ներքին			
33	Պելլավ (Բիլլավ), Վերին			
34	Ռարա (Ռարաթ)			Ռարաթը հաճախ հիշվում է Խիանքի կազմում: Գյուղի շրջակայքի երբեմնի հայաշատության առավելագույն կարող են հանդիսանալ 19-րդ դ. 70-ական թթ. պահպանված 5 եկեղեցիները (ավերակ կամ ամայի): Գյուղի մոտ՝ իշխող մի բարձունքի վրա կառուցված բերդը տեղացիները վերագրում էին Գայլ Վահանին : 20-րդ դ. սկ. Ռարաթը Բաքրան (համանուն վաչկատուն բուրդ ցեղի անունով) գյուղախմբի միակ հայաբնակ գյուղն էր: Շուրջ 2 կմ հվ-արևելք գտնվում էր Բախտնաս երբեմնի հայաբնակ գյուղը: Նախկինում հայաբնակ 1 ուրիշ գյուղ՝ Ջավգիլը (Ճազիկ) , գտնվում էր Ռարաթից շուրջ 3 կմ հս-արևմուտք: Նշված բնակավայրերը հիշատակվում են Տարոնի Աբ Հովհաննես (Եղորդոտի) վանքի 1445 թ. նշանավոր կոնդակում:
35	Փափուր(ա)			

Ծնթ. Որոշ աղբյուրներում **Գեղիասանան, Խորան (Հորանք), Նորգեղ, Շելխան(ք), Ներքին** և **Վերին Պելլավ (Բիլլավ)** գյուղերը նշվում են **Փանքի** կազմում:

11. Խիանք

Գրավում էր Սասունի հարավարևմտյան հատվածը՝ տարածվելով հիմնականում **Սասնաջրի** և **Տավորիկիջրի** միջագետքում: **Խիանքի** մեջ էր մտնում նաև **Տավորիկիջրի** միջին ավազանի ձախսափնյակը՝ **Սպիտակաարից** (արևելքում) մինչև **Կողբի** կամ **Խուլփի** լեռներ ընկած **Փռակայի** ենթաշրջանը: Սահմանակից էր հյուսիսից **Իշխանձորին**, արևելքից՝ **Տավորիկին**, հարավ-արևելքից՝ **Հոնգվարի** լեռների հարավային ձյուղավորումները կազմող **Բերմի** բլրաշարով՝ **Փասնքին**, հարավից, **Բաթմանաջրի (Քաղիթթ)** **Սանիկ** օժանդակի հունով՝ **Սլիվանին** (Դիարբեքիի նահանգ), իսկ արևմուտքից՝ **Խուլփին**: Ուշ միջնադարում **Խիանքը** մտել է **Կողբի (Խուլփ, Նահիա)** գավառի մեջ՝ զբաղեցնելով վերջինիս արևելյան հատվածը: Սակայն վերջինիս տարածքում **Սլիվանից (Մուփարդին)** քրդական ցեղերի ներթափանցման հետևանքով այդ շրջանն աստիճանաբար առանձնանացավ և գլխավոր՝ խիանցի ցեղի անունն ընդունելով՝ սկսեց կոչվել **Խիանք (Խիան)** ու 19-րդ դ. 80-ական թթ. մտնում էր Դիարբեքիի նահանգի մեջ: 1880-ական թթ. սկզբին նորաստեղծ Բիթլիսի (Բաղեշի) նահանգի կազմում **Խուլփի գավառի** հետ ներառվեց նաև **Խիանքը**, դառնալով վերջինիս գյուղախումբը (թրք. nahiyе): Կենտրոնը **Փռակա** ավանն էր՝ գավառակի արևմուտքում (տես ստորև):

Ուշ միջնադարում, հատկապես 16-17-րդ դդ., քրդերի ներթափանցումը այստեղ ևս բացասական հետևանքներ է ունեցել: Առանձնապես տուժել է **Խիանքի** հյուսիսարևմտյան **Ջաջասի (Ճաճանք) գյուղախումբը** (բնակավայրերը սփռված էին **Բազմաբար** (1552 մ) և **Մեղդան** (2078 մ) լեռների միջև ընկած **Տավորիկիջրի** միջին հովտում): Հայ բնակչությունը հարկադրված հեռացել է նաև գավառակի հարավում ընկած **Խազալիկի դաշտի** գյուղերից: Սրանով հանդերձ, հայերը (6500-7000 մարդ) մինչև Մեծ եղեռն կազմում էին **Խիանքի** բնակչության մեծամասնությունը: Հատկանշական է, որ հայկական բնակավայրերը որպես կանոն ունեին ազգային միատարր կազմ և աչքի էին ընկնում բազմամարդությամբ: Հայաբնակ գյուղերի շարքում առանձնանում էր **Բերմ** կամ **Պերմ** ավանը՝ զգալի ինքնավարությամբ օժտված **Բերմցի (Պերմցի)** իշխանական տոհմի կենտրոնը: Հենց **Բերմի** և շրջակա մի շարք այլ գյուղերի հայերի (**Արխունդ, Բացի, Ռարաթ**

նն) մի մասը կարողացավ ինքնապաշտպանության շնորհիվ փրկվել և տեղափոխվել Արևելյան Հայաստան: Ներկայումս նրանց սերունդները գերազանցապես բնակվում են ՀՀ **Արագածոտնի** մարզի **Թալինի շրջանի Դավթաշեն (Դավիթաշեն)** գյուղում:

#	Բնակավայր	Եկեղեցի	Դպրոց	Այլ տեղեկություններ
1	Արխունդ (Հերենթ)	Սր Աստվածածին (Սր Թովմաս)	1	Արխունդը հայտնի էր հեղուկ աղի հանքերով: Գյուղից շուրջ 6.5 կմ հս-արևմուտք՝ Տավորիկիջրի ձախ ափին գտնվող Հրիպ կամ Հարիպ երբեմնի հայաբնակ գյուղը հիշվում է Տարոնի եղբորուտի Սր Հովհաննես վանքի 1445 թ. կոնդակում՝ « Սրէպա » ձևով:
2	Արսրկ (Արծվիք, Արքս)	Սր Աստվածածին		Արսրկից շուրջ 5 կմ հվ-արևելք՝ Տավորիկիջրի աջ ափին, գտնվում էր Սնդա երբեմնի հայաբնակ գյուղը, որը հիշվում է Տարոնի եղբորուտի Սր Հովհաննես վանքի 1445 թ. կոնդակում՝ « Սանտայ » անունով:
3	Բահնդղանք (Բահնդղա, Պը-համտա)	Սր Կիրակոս, Սր Քառասուն Մանուկ	1	1890-ական թթ. ուներ 100 տուն հայ բնակիչ: Համիդյան կոտորածները բացասական հետևանքներ ունեցան նաև այս գյուղի համար, որի բնակչությունը 1914 թ. կազմում էր ընդամենը 30-40 տուն:
4	Բացի	Սր Աստվածածին		
5	Բերմ (Պերմ, Պարմըզ)	Սր Աստվածածին, Սր Գևորգ	1	Գյուղում և շրջակայքում կար ևս 3 անայի կամ ավերակ եկեղեցի: Հայտնի ուխտատեղիներ էին Սր Խաչը («անծրևաբեր» կոչված) և Քունկանք լեռը, որի ստորոտին էր կառուցված գյուղը: Բերմը Սասունի առավել բազմամարդ գյուղերից էր՝ 1914 թ. ավելի քան 1100 բնակչով (120-130 տուն, 1895 թ.՝ 180 տուն): Բերմից հս-արևմուտք՝ մինչև Տավորիկիջուր , տարածվում էր Ջաջասի գյուղախումբը, որը ժամանակին զուտ հայաբնակ էր: Սակայն 18-19-րդ դդ. վերջինիս բնակավայրերը խիանցի քրդերի կողմից աստիճանաբար բռնազավթվել և հայաթափվել էին: Գյուղախմբի նույնանուն կենտրոնը հիշվում է Տարոնի Սր Հովհաննեսի (եղբորուտի) վանքի 1445 թ. կոնդակում՝ « Ճաճանք » անունով (Ճաճանք ՝ Ճաճանց ՝ քրդ.՝ թըք. Jajas կամ Çačas): 20-րդ դ. սկ. այստեղ պահպանվել էին քարաշեն եկեղեցու ավերակներ: Ճաճաս-Ճաճանքի շրջակայքի հայտնի գյուղերից էին՝ Գեղանի , Հեշտեր կամ Վանք , Հլիս կամ Հելիս (Հոիկ), Շեխրկան կամ Շելսոմք (պահպանվել էր ավերակ եկեղեցին), Սինոռ : Այս շարքում հարկ է առանձնացնել Հեշտերը կամ Վանքը , ուր պահպանվել էին ավերակ մենաստանի մնացորդներ, և Հլիս-Հոիկը : Վերջիններս հիշվում են Տարոնի Սր Հովհաննեսի (եղբորուտի) վանքի 1445 թ. կոնդակում:
6	Գրեխտիսի			
7	Խաչուկներ			
8	Կանիփամբու (Գյանջերամիա, Բամբակաղբյուր)			
9	Հրրդա (Արտա, Հարատ)			
10	Հովեր և Ներքիթաղ			
11	Ջմար (Շմանակ)	Եկեղեցի (ավերակ)		
12	Սաղտուն (Սըլտըն)	Սր Աստվածածին	1	Մինչև համիդյան կոտորածները գյուղն ունեցել է 80-100 տուն հայ բնակիչ: Հետագա տարիներին, սակայն, Սաղտունը նկատելիորեն ամայացել էր և 1914 թ. գյուղում ապրում էր 60-70 տուն հայ (շուրջ 600 բնակիչ):
13	Սլոխ (Սլոք, Սլուկ)			
14	Տանծիկ)			

15	Փառկա (Մեծ Փառկա, Ֆըրկե)	Սբ Կիրակոս	1	Գյուղում կար ևս 2 եկեղեցի, որոնց մասին լրացուցիչ տվյալները բացակայում են: Գյուղը՝ որպես վարչական կենտրոն, 19-րդ դ. 70-ական թթ. բազմամարդ ավան էր (շուրջ 400 տուն հայ բնակիչ): Սակայն համիդյան կոտորածների և զանգվածային արտագաղթի հետևանքով հայերի թիվը խիստ կրճատվել էր՝ 1914 թ. կազմելով ընդամենը 100 տուն:
16	Քարիկ (Խարզրկա)			Չենք բացառում, որ Տարոնի Սբ Հովհաննեսի (Եղորդուտի) վանքի 1445 թ. կոնդակում հիշատակվող «Փառկա» գյուղն է:

12. Խուլփ

Գրավում էր Սասունի արևմտյան ընդարձակ հատվածը՝ տարածվելով **Բաթմանաջրի** (պատմական՝ **Քաղիթթ**) ձախակողմյան **Կողբաջուր** կամ **Խուլփիջուր** վտակի ավազանում: Սահմանակից էր հյուսիսից **Հայկական Տավրոսի Արջիբար (Արջքարեր)** ու **Խոզմոսար** ճյուղավորումներով՝ **Մուշին** և **Գենջին**, արևելքից՝ **Անդոկ** լեռնազանգվածից (2812 մ) սկզբնավորվող և դեպի հարավ ձգվող **Կողբի** կամ **Խուլփի** լեռներով (գլխավոր գագաթները՝ **Թաղիգլուխ**, **Սպիտակ Խազաթ**)՝ **Իշխանձորին**, հարավ-արևելքից՝ **Հազո-Խաբլջոզի Բաբրան** կամ **Բաբրան** գավառակին (նահիե-գյուղախումբ), հարավից, **Բաթմանաջրի Մանիկ** օժանդակի հունով՝ **Հազրոյին** և **Սլիվանին (Գիարբեթրի նահանգ)**, իսկ արևմուտքից՝ **Հավեդիկի** կամ **Հավեդանի** լեռնապարով՝ **Փեշարին** և **Հրդոյային (Գենջի սանջակ)**: Կենտրոնը **Կողբաջրի** աջափնյակում գտնվող **Փասուր** կամ **Բասուր** գյուղն էր, որը միաժամանակ Բիթլիսի (Բաղեշ) նահանգի Գենջի սանջակի **Խուլփ գավառի** (թրք. kaza) կառավարիչ-կայմականի նստավայրն էր: **Խուլփը** հռչակված էր որպես խաղողագործության և գինեգործության կենտրոն:

Խուլփի առաջին հիշատակումը (Սևսա) հասնում է սեպագրական դարաշրջան: Վաղ միջնադարում այն եղել է Մեծ Հայքի **Աղձնիք** աշխարհի **Սանասունք (Սասունք)** գավառի կազմում: 8-րդ դ. կեսերից գավառը կազմել է առանձին վարչամիավոր՝ կենտրոն-բերդի (**Կողբաջրի** վերին հովտում գտնվող **Շեն** ավանի մոտ) անունով կոչվելով **Կողբ** կամ «**Կողբայ երկիր**» (արաբ. Կուլբ-Չուլբ, ասոր. Չուլաբ): Ընդ որում, 15-րդ դ. գավառը կոչվել է նաև **Նահիա**: 12-րդ դ. գավառի տարածքում նշանավոր **Թոռնիկ Մամիկոնան** իշխանի **Մամիկոն (Մամկո)**, **Նիկո** և **Սերգո** որդիների կողմից ձևավորվել է հայկական անկախ իշխանություն: Ժողովրդի շրջանում նշված եղբայրները հիշվում էին **Էկին**, **Կիկին** և **Ֆեկին** անուններով, որոնց էին պատկանում **Կողբի** 3 բերդեր: Ի դեպ, գավառում 15-րդ դ. հայտնի էր նաև **Գրբցի** կամ **Ալեքսնցի** իշխանական տոհմը, որի ներկայացուցիչները տիրում էին **Կողբաջրի** վերին ավազանում գտնվող **Գաբով արտ** կամ **Կապրնին (Գաբոնին)** ավանին և սերում էին էրզրումցի լեգենդար իշխան **Հուլոյից**: Սակայն 15-րդ դարի կեսերից սկսած գավառի տարածք ներթափանցած քրդական ցեղերն աստիճանաբար կարողացան տիրել **Կողբին**, որի հետևանքով տեղի հայության մի զգալի մասը հարկադրված էր տեղափոխվել ավելի անառիկ **Շենիկի**, **Սեմալի** և **Ընկուզաձորի (Գյալեզուզան)** շրջաններ՝ այստեղ կազմավորելով **Հուլոյանների** մի նոր ուժեղ հայկական իշխանություն: Այդ գաղթը բացասական հետևանքներ ունեցավ մասնավորապես գավառի հյուսիսային շրջանների համար (**Գաբով արտի** և **Շենի** գավառակներ): Նորեկների կողմից **Կողբի** տարածքում արդեն 16-րդ դ. սկ. ձևավորվեց **Խուլփի** իշխանությունը (օսմանյան թրք. hükmət-i Kulp), որը թեև ընդգրկված էր Գիարբեթրի նահանգի կազմում, սակայն իրականում անկախ վարչամիավոր էր (որոշ տվյալների համաձայն՝ կենտրոնը **Շուղեթի բերդն** էր՝ **Կողբաջրի** միջին ավազանում, գետի ձախափնյակում): 19-րդ դ. 80-ական թթ. կեսերին **Խուլփը**՝ հարակից մի շարք գավառների հետ, անցել է նորաստեղծ Բիթլիսի (Բաղեշ) նահանգին: Քրդական չղաղարող ներհուսքը թեև էապես աղձատել էր գավառի ժողովրդագրական նկարագիրը,

սակայն 20-րդ դ. սկզբներին այստեղ ապրում էր հոծ հայություն: Հատկանշական է, որ գավառում պահպանվել էր միջնադարյան հայ ավագանին, որի ներկայացուցիչները շարունակում էին կրել «իշխան» տիտղոսը և օգտվում էին լայն արտոնություններից: Համիդյան կոտորածների հետևանքները ծանր էին **Խուլփի** հայ բնակչության համար: Մեծ ծավալներ ստացավ արտագաղթը այլ շրջաններ, գլխավորապես Մշո դաշտ: Մեծ եղեռնի նախօրեին հայերի թիվն անցնում էր 5000-ից: Նրանց մեծ մասը գոհ դարձավ թուրքական ցեղասպան քաղաքականությանը: Փոքրաթիվ փրկված ընտանիքների է միայն հաջողվել 1916 թ. անցնել ռուսական բանակի կողմից գրավված Մուշ, որտեղից էլ՝ Արևելյան Հայաստան: Նրանց սերունդներն այժմ ապրում են **ՀՀ Արագածոտնի** մարզի **Զովասար** և **Ոսկեթաս** գյուղերում: Ի դեպ, վերապրած սակավաթիվ հայեր մնացին բնօրրանում, որոնց ժառանգները մեր օրերում ևս ապրում են գավառի կենտրոն **Փասուրում** (այժմ՝ **Կուլփի** < **Կողբ** քաղաք):

#	Բնակավայր	Եկեղեցի	Դպրոց	Այլ տեղեկություններ
1	Ահարոնք (Աիրոնք, Հանձե, օտար հորջորջմամբ՝ Hinzi)	Սբ Յոթն Սանկանց	1	Եկեղեցու պատերին եղել են թռչնաքանդակներ: Ահարոնքի դպրոցի դիմաց գտնվում էր 1880-ական թթ. կառուցված 2-րդ եկեղեցին (ցավոք, լրացուցիչ տվյալներ չունենք): Մոտակայքում գտնվում էր կիսավեր Էզնհարաբերդը : Գյուղի մերձակայքում նշանավոր էր նաև Էղինակի կամ Հատինակի բերդը (« Հեթումի բերդ »): Կողբաջրի ափին գտնվել է ևս մի ամրոց՝ օտարախույզ Կանդայա Հեշին անունով: Մինչև 1895-1896 թթ. Ահարոնքը Սասունի առավել բազմամարդ գյուղերից էր՝ շուրջ 200 տուն հայ բնակչությամբ: Սակայն համիդյան կոտորածների և դրանց հաջորդած գաղթի հետևանքով տեղի բնակչությունը խիստ նվազել էր՝ 1914 թ. կազմելով ընդամենը 70-80 տուն (շուրջ 600 մարդ): Ահարոնքում են ծնվել հայ ազատամարտի երևելի դեմքերից Հրայր Դժոխքը (Արմենակ Ղազարյան , 1864-1904) և Կարո (Կարապետ) Սասունին (1889-1977): Շուրջ 2 կմ հվ գտնվող Գրնդիս (Գիրինդիս) գյուղը հիշվում է Տարոնի Սբ Հովհաննես (Եղրդոտի) վանքի 1445 թ. կոնդակում « Կէրէնտիկ » անունով:
2	Բանոկ (Փանոկ)			
3	Բերոկ (Պեյրոկ)			
4	Գեղերվանք (Գեղրվան)	Սբ Ստեփաննոս (նախկին վանք)	1	Գյուղում հայտնի էին Սբ Գևորգ , Սբ Թովս Մանուկ և Սբ Սարգիս մատուռ-ուխտատեղիները («լուստուն»): Գյուղը կազմված էր 4 «թաղից»: Մինչև համիդյան կոտորածները, Գեղերվանքն ուներ ավելի քան 100 տուն հայ բնակիչ: Սակայն հետագա տարիներին գյուղի բնակչությունը խիստ նվազել է՝ 1914 թ. կազմելով ընդամենը 50 տուն (400 անձ): Գեղերվանքի շրջակայքում գտնվող « Փոփրաղբրան գաղեն » քարանձավում մի քանի տասնյակ գյուղացիներ դիմադրել են ջարդարարների և փրկվելով՝ տեղափոխվել Մուշ, ապա՝ Արևելյան Հայաստան:
5	Գոման (Կրման)			
6	Գրեմորի			Առանձին աղբյուրներում գյուղը նշվում է Խիանքի կազմում:
7	Դավավաքածե (Տալավեգոմ)			Գյուղից հարավ, Անդոկի ստորոտին փոված գեղատեսիլ դաշտում գտնվում էր երբեմնի հայաբնակ Շեն ավանը, որի «թաղ»-գյուղակները սփռված էին Կողբաջրի վերին հոսանքի (այդ հատվածում՝ Բլուր), ձորահովիտներում: Դավավաքածեն ևս Շենի «թաղերից» էր:
8	Դուդարիան (Դուդերվան)			

9	Էնուբ (Ինուպ)	Սբ Աստվածածին, Սբ Սարգիս	1	Գյուղից շուրջ 4 կմ հս-արևմուտք բարձրացող Ռախման կամ Ռահանիկ լեռան արևելյան ստորոտին գտնվում էին Ռախմանասարի բերդի ավերակները: Նույն լեռից արևմուտք գտնվում էին Արխադին և Կակվաս կամ Գագվաս երբեմնի հայաբնակ գյուղերը: Դրանցից վերջինը հիշվում է Տարոնի Սբ Հովհաննես (Եղրդուտի) վանքի 1445 թ. կոնդակում (« Կակուաս »):
10	Ընձբար	Սբ Գևորգ	1	Ընձբարը բաղկացած էր մի քանի «թաղ»-գյուղակներից, որոնց հիմնական մասը սփռված էր Կողբաջրի աջակողմյան Ընձբարիջուր օժանդակի ձորահովիտներում: Որոշ «թաղեր» ընկած էին Կողբաջրի ձախափնակում: Ընձբարի գյուղակներն էին՝ Բանոկ (համարվել է նաև առանձին բնակավայր), Խեչեր կամ Խաչուկներ (քրդ. Xaçuka), Ձմաթաղ , Ձորավանք (քրդ. Sorevank), Մազրեք , Սարըձոր (որպես առանձին գյուղ հիշված է Տարոնի Եղրդուտի կամ Սբ Հովհաննես վանքի 1445 թ. հայտնի կոնդակում), Ռմբիկ , Վանք (քրդ. Derik, նույնպես հիշված է վերոհիշյալ կոնդակում), Յուրտնակ : Վանք «թաղում» էր ուշագրավ ճարտարապետությամբ կառուցված Սբ Գևորգ վանքը (քրդ. Ընցքրա Սբ Գևորգ), որի տաճարի ներսում էր գտնվում Սբ Գևորգ զորավարի մարմարակերտ շիրիմը: Սբ Գևորգ ուխտի էին գալիս ոչ միայն հայերը, այլև քրդերը: Գյուղի մոտ գտնվել է մի ծակված մեծ քար, որին ուխտի եկած ամուլ կանաչք պարտավոր էին «անցնել» վերջինիս անցքով՝ գավակ ունենալու նպատակով: Ընձբարը Մատունի առավել բազմամարդ բնակավայրերից էր՝ 1914 թ. 1200 հայ բնակչով:
11	Խճրք (Կրժիկ)			
12	Կապրնին (Գարոնին, Գարով արտ)			
13	Կոկնածոր (Կոյնածոր)			Համարվում էր Ընձբարի «թաղ»-գյուղակներից:
14	Մալա Ավդո			
15	Շուղեք (Շուղիկ, օտար հորջորջ-սմամբ՝ Şinaz)	Սբ Աստվածածին	1	Գյուղի մոտ կար կիսավեր բերդ: Մինչև համիդյան կոտորածները Շուղեքը բավական բազմամարդ գյուղ էր և որոշ տվյալներով՝ ուներ 70 տուն հայ բնակիչ: Սակայն կորուստների և գանգավածային արտագաղթի հետևանքով 1914 թ. գյուղում մնացել էր ընդամենը 22 տուն: Շուղեքի շրջակայքում հայտնի էին հայասուն որոշ բնակավայրեր, ինչպես՝ Խնձորակ (օտարահունչ՝ Hinzirak), Ձորթաղ (քրդ. Tağa Nâwâle), Նեխիկ : Շուղեքից շուրջ 3.8 կմ հս-արևմուտք՝ Կողբաջրի ձախ ափին գտնվում էր 1870-1880-ական թթ. Խուլվիի վարչական կենտրոն Ներջիք (Ներջքի) ավանը (նախկինում՝ հայաբնակ):
16	Փասուր (Բասոր)	Սբ Հակոբ	1	Փասուրի շրջակայքում կային մի քանի երբեմնի հայաբնակ գյուղեր՝ Բերդան (քրդ. Gâliye Ahiyan), Հարբաթ (« Հարուիթոյ ») ձևով հիշվում է Տարոնի Եղրդուտի կամ Սբ Հովհաննես վանքի 1445 թ. հայտնի կոնդակում), Մասրթո (Մարթո): Թե՛ Փասուրում և թե՛ շրջակայքում պահպանվել էին 7 եկեղեցիների ավերակներ:
17	Փոշկանցիք (Գյալեպոշկանց)			
18	Քնե (Քուն, Քնակ)			Գտնվում էր Ընձբարիջուր վտակի աջակողմյան օժանդակի ձորահովտում՝ Գոմձորի փոքր լեռնապարից հվ: Գյուղի շրջակայքում կային հայասուն գյուղակներ, ինչպես Ծմակ (օտար հորջորջսմամբ՝ Zimak), Կից (օտարահունչ՝ Kiz, հանդիպում է Տարոնի Սբ Հովհաննես վանքի բազմիցս հիշատակված կոնդակում) ևն:

Ծնթ. Խուլփի հարավային սահմանագլխին՝ վարչականորեն հարևան **Սլիվանի (Մուփարդին, Միյաֆարկին)** գավառի կազմում գտնվող **Մալաբերի** կամ **Մալաբադո** գյուղի մոտ՝ **Քաղիրթ** կամ **Քաթմանաջուր** գետի վրա, կառուցված էր հռչակավոր **Քաթմանի** միաթռիչք հսկա կամուրջը: Վերջինիս անունը կապվում է լեգենդար **Քաթման** շինարարի հետ: Ավանդության համաձայն՝ վարպետը կամուրջի հիմքում վերջինիս մեծ ամրություն տալու նպատակով, «շարել» է իր սիրելի կնոջը, որից հետո նետվել է գետը, որն իր պատվին սկսել է կոչվել **Քաթմանաջուր**:

13. Գազկու գավառ (Գավառ) կամ Հավեղան (Հավեղիկ)

Գազկու գավառը գտնվում էր **Քաթմանաջրի Կողբաջուր (Խուլփիջուր)** և **Մառում** օժանդակների միջագետքում, **Խուլփից** արևմուտք: Համարվում էր վերջինիս գավառակներից մեկը: Հարավում **Գազկու գավառի** սահմանը հասնում էր մինչև վերոհիշյալ 2 վտակների միախառնման շրջան, ուր **Մանիկի** վրա՝ **Քաղբլան** գյուղակամրի **Գրմհոկ** գյուղի մոտ, կառուցված էր Մասունի 2-րդ նշանավոր բարաշեն **Գերթոյի կամուրջը** (քրդ. Pira Gerto): Հարավ-արևմուտքից **Գազկու գավառը** սահմանակցում էր Դիարբեքիրի նահանգի **Հազրո-Միհրանիկի**, իսկ հս-արևմուտքից, **Հավեղիկի** կամ **Հավեղանի** փոքր լեռնապարով՝ Բիթլիսի նահանգի **Փեչար** գյուղակամրերին: Գավառակի կենտրոնը **Հավեղիկի** լեռնապարի հարավային ստորոտին գտնվող **Գազկե (Գասկե)** կամ **Կասգե** ավանն էր: Ուշ միջնադարում այն բավական բազմամարդ բնակավայր էր: 17-րդ դ. թուրք ճանապարհորդ Էվլիյա Չելեբիի տվյալներով՝ վերջինս («**Ջեակե**») 2000 տուն բնակչությամբ գյուղաքաղաք էր, զինագործության կենտրոն: Ավելին, 17-18-րդ դդ. **Գազկեն Իսյան** կամ **Իսքյան** (անվանումը բխում է արաբ.-թրք. «ապստամբություն» բառից) հայ-դալիկ-քրդական միացյալ ինքնիշխան համադաշնության (կոչվել է նաև «**Պանօքոց երկիր**») կենտրոնն էր: Այս ուշագրավ կառուցվածքով իշխանությունը, Ղ. Ինձիձյանի տվյալների համաձայն, **Գազկու գավառից** բացի 18-րդ դ. վերջին ընդգրկել է նաև հարևան **Հազրո-Միհրանիկի** և **Լրձեի (Իլիջե)** շրջանները: Այն կառավարվում էր «**Իսքյան-աղա**» տիտղոսը կրող կառավարչի կողմից, որը չէր ենթարկվում Դիարբեքիրի թուրք բեյլերբեյ-փաշային: Ուշագրավ է, որ վերջինիս զորքում տեղի մահմեդականները («տաճիկք»՝ ըստ Ղ. Ինձիձյանի) հիմնականում ծառայում էին հեծելազորում, իսկ հայերը՝ հետևակում: Ընդ որում, բացառապես հայերից էին կազմված իշխանության զինված ուժերի բաղկացուցիչ մասը համարվող ռմբանետների («**ոմբաձիգք, այսինքն թիւֆէնկձիք**», իմա՝ **grenadier**) ջոկատները: Հայկական և քրդական կիսանկախ իշխանությունների վերացումը բացասական հետևանքներ ունեցավ նաև **Գազկու գավառի** համար, մեծ ծավալներ ընդունեց նորանոր վաչկատուն քրդերի (մասնավորապես բաղըլցի կամ բաղըլկան) ներթափանցումը: Հետևանքը վարչամիավորի տարածքի զգալի մասի հայթափումն էր: Ի դեպ, խիստ տուժեց նաև տեղի դալիկ (զազա) բնակչությունը: 1880-ական թթ. **Գազկու գավառը**, լուծվելով հարևան **Խուլփի** մեջ, անցավ նորաստեղծ Բիթլիսի նահանգին:

Համիդյան կոտորածների ժամանակ տեղի հայերը լուրջ կորուստներ կրեցին, իսկ 1915 թ. գրեթե ամբողջությամբ բնաջնջվեցին: Հատկանշական է, սակայն, որ նույնիսկ մեր օրերում գավառակի օտարացեղ բնակչության շրջանում գործածելի է **Գավառ** հայեցի անվանումը:

#	Բնակավայր	Եկեղեցի	Դպրոց	Այլ տեղեկություններ
1	Գազկե (Գասկե, Կասգե, օտար հորջորջմամբ՝ Ciksi:)	Սբ Թեոդորոս	1	Ավանից շուրջ 9 կմ հվ-արևմուտք բարձրաձուլ է Դերառաշ սարը: Վերջինիս քրդերեն անունը՝ (Derafâş), որը նշանակում է «սև վանք», հուշում է, որ այստեղ ժամանակին գոյություն է ունեցել հայկական մենաստան: Գազկեն Մասունի առավել բազմամարդ բնակավայրերից էր և 1914 թ. ուներ շուրջ 1300 բն., որից 760-800-ը (100 տուն)՝ հայեր:

2	ԹՐՂԹԱՎ (ԹՐՂԹՐՖ) ԴԼԵՐԵԹԱՎ			ԹՐՂԹԱՎ («ՏՐԼԵՐԵԹԱ»), և ԹՒՃԱՍԱՐ («ԱՎՏԱ-ԿԷՍ», օտարախոնջ՝ Tiyakus) ԳԱԳԿԵԻ ԽԵՆ, հիշվում են Տարոնի Սբ Հովհաննես (Եղորդուտի) վանքի 1445 թ. նշանավոր կոնդակում: Նշված բնակավայրերի շարքում հանդիպում է նաև «ԱՅԻՊՈՂԷ» գյուղ: Որոշ տվյալներով, վերջինս ԳԱԳԿԵԻ «Թաղերից» մեկն էր և հայտնի էր նաև ԱՅԻՊՈՂԷ անունով:
3	ԹՒՃԱՍԱՐ			
4	ԽՐՈՒՑ (ԽՐՈՈՑ)			
5	ՀԱՎԸՐՐ			
6	ՄԱԿԱ ԳՐԵԵ			
7	ՄԱՂՏԱԿ	Սբ Կիրակոս		

14. Խարզան (Ղարզան)

Խարզանի գավառն ընկած էր Բիթլիսի (Բաղեշ) նահանգի հարավային մասում՝ հիմնականում ընդգրկելով **Խարզանաջրի (Արզան)** ստորին, մասամբ՝ միջին ավազանի շրջաններում տարածվող **Բշերիկի** արգավանդ դաշտի արևելյան հատվածը: Սահմանակից էր հյուսիսից՝ **Հագո-Խարլջոզին** և **Մոտկանին**, արևելքից՝ **Բաղիշոջրի** (թրք. Bitlissuyu) կիրճով՝ **Շիրվանին (Շերվանք)** և **Սղերդին**, հարավից՝ **Արևմտյան Տիգրիսի** հունով՝ **Սավուրին** և **Հիսն-Քեյֆին**, իսկ արևմուտքից՝ **Բշերիկին (Բիշերի)**, վերջին 3-ը՝ Դիարբեքիի նահանգում): Պաշտոնական վարչական բաժանումով գավառը թեև ընդգրկված էր **Սղերդի սանջակի** կազմում, սակայն ավանդաբար դիտվել է Սասունի բաղկացուցիչ մասը (**Գաշտային** կամ **Ներքին Սասուն**): Խարզանը, հարևան Հագո-Խարլջոզի նման, հարուստ էր աղահանքերով: Հանդիպում էր նաև սավթ, ինչի մասին վկայված է դեռ «Աշխարհացոյց»-ում: Գավառի կենտրոնը **Խարզանաջրի** ձախավնյակում՝ գետից շուրջ 10 կմ արևելք գտնվող **Ջոխ** կամ **Ջոկ** ավանն էր, որը նորագույն ուսումնասիրությունների համաձայն համապատասխանում է պատմական **Աղձնիքի Արզան** (սառք. **Շուկառաբա**) քաղաքին: 19-րդ դ. կեսերին **Ջոխը**, որն առանձին աղբյուրներում նշվում է որպես գյուղաքաղաք, գուտ հայաբնակ էր և ուներ 200 տուն բնակիչ: Սակայն քրդերի չղադարող ներհոսքը **Խարզանի** տարածք զգալիորեն ամայացրեց բնակավայրը՝ աղձատելով նաև վերջինիս ազգային նկարագիրը: 1914 թ. գավառի կենտրոնի բնակչության թիվը հազիվ էր գերազանցում 200 տունը: Այնուամենայնիվ հայերը **Ջոխում** շարունակում էին կազմել մեծամասնություն՝ որոշ տվյալներով 150 տուն: Նրանք ունեին **Սբ Սարգիս** անունով եկեղեցի և տարրական դպրոց՝ 30 աշակերտով: **Ջոխի** մոտ պահպանվել էր հնագույն կիսավեր բերդը («**Խարզանա բերդ**»), որին կից՝ գետափին բարձրացող մի ապառաժի գագաթին, երևում էր **Սուրբ Աստվածածին** (°) կամ **Գերակերի** վանքը:

Խարզանը 17-18-րդ դդ. եղել է **Հագոյի** (նաև՝ **Հզու**) իշխանության կազմում: Սակայն գավառն ուներ յուրահատուկ ինքնավար կարգավիճակ, քանի որ տեղի բնակչությունը գրեթե առանց բացառության կազմում էին հայերը, ասորիները (հակոբիկյան-յաղուրի և նեստորական) և եզդիները: Վերջիններս բաժանվում էին **արբկան** (եզդիերեն՝ abika) և **նակիբան** կամ **նախիբան** (եզդիերեն՝ nâqiba) ցեղերի: 19-րդ դ. 1-ին երեսնամյակը՝ եզդի ցեղապետ **Միրզա աղայի** կամ **Շեյխ Միրզայի** (ժողովրդի շրջանում՝ ավելի հայտնի **Միրզըք** անունով) կառավարման տարիները, **Խարզանի իշխանության** առավել հզորության ժամանակահատվածն էր: **Միրզա աղային** հաջողվեց ընդարձակել վերջինիս տարածքը տիրելով նաև **Սղերդին**՝ **Ազնվացձորի** ստորին հոսանքի շրջանում (այս մասում՝ **Գագը** կամ **Կեզեր**, նաև **Խազլ**): Իշխանության կենտրոնը **Ջոխից** շուրջ 22 կմ հարավ, **Խարզանաջրի** ձախ ափին գտնվող **Ռեդվան** կամ **Ռնդվան** գյուղաքաղաքն էր, որը

19-րդ դ. 30-ական թթ. ուներ 800 տուն բնակիչ, հիմնականում եզդիներ, նաև հայեր և ասորիներ: Ուշագրավ է, որ **Միրզա աղային** կից գործել է խորհուրդ, ուր հավասար իրավունքներ ունեին ինչպես եզդի, այնպես էլ հայ, նաև ասորի ավագանին ու հոգևորականությունը: Մեզ է հասել եզդիների ու ասորիների կողմից «**Քեշե Պոլե**» **անունը ստացած** (ասոր. qāšā-«քահանա») **Ռեդվանի** ավագ քահանա («աւագերեց») **Տեր Պողոսի**, և **Միրզա աղայի** ռազմական համագործակցությունը նկարագրող պոեմը, որը գրի են առել հայ մշակույթի մեծ երախտավորներ **Խ. Աբովյան** ու **Գ. Սրվանձտյանը**: 1828 թ. հայ-եզդիական միացյալ 10000-անոց զորամիավորումը ջախջախել և իշխանության տարածքից դուրս է շարտել մահմեդական մոլեռանդ հոգևորականության հրահրմամբ «անհավատների» դեմ «արբազան պատերազմի» դուրս ելած քուրդ ավագանու 30 000-ը գերազանցող բանակը, որն առաջնորդում էին քուրդ **Շեյխ Ղասըմը** և հարևան **Բոհտանի** ցեղապետ **Միր Մեհեմեդը**: Ըստ էության, հարավարևմտյան Հայաստանում 19-րդ դ. 1-ին տասնամյակներին գոյություն է ունեցել եզդիափայկական (քրիստոնեական) կիսանկախ իշխանություն, որը գրեթե չէր ճանաչում թուրք-քրդական գերիշխանությունը: Ավելին, **Խարզանի** (կոչվում է նաև **Սղերդի**) իշխանությունում հաստատված էր էթնոկրոնական «հանդուրժողականություն» (սա անգլիացի նշանավոր հնագետ և ճանապարհորդ **Օ. Լայարդի** բնութագրումն է), ինչն անհավանական էր շրջապատող մահմեդական բռնակալության պայմաններում: Հատկանշական է, որ 1828 թ. օգոստոսին ռուսական բանակի կողմից **Բայազետի փաշայության** գրավումից անմիջապես հետո **Միրզա աղան** փորձել է կապեր հաստատել ռուսների հետ՝ առաջարկելով իր ռազմական համագործակցությունը: Այդ նպատակով նա Պասկևիչի մոտ է ուղարկել ռեդվանցի **Կիրակոս Առաքելովին** (իմա՝ **Առաքելյանց**)՝ ուշագրավ տեղեկություններ հաղորդելով իր իշխանության գինական ուժի վերաբերյալ, որը կազմում էր 1500 հեծյալ և 5000 հետևակ: Նմանատիպ փորձեր են կրկնվել նաև 1830 թ., երբ հայերեն գրված հատուկ նամակով էրզրում առաքվեցին նույն **Կիրակոսը** և մեկ այլ ռեդվանցի՝ ուսուցիչ **Պետրոս Խազարովը** (իմա՝ **Ղազարյանց**): Քանի որ պատերազմն արդեն ավարտվել էր, **Միրզա աղայի** առաքելությունը որևէ հաջողություն չհասավ: Ավելին, օգտվելով 1830-ական թթ. Օսմանյան կայսրության նկատմամբ ռուսական քաղաքականության էական փոփոխությունից ու բացահայտ հովանավորությունից՝ Բ. Դուռը շտապեց «կարգուկանոն» հաստատել արևելյան ըմբոստ տարածքներում և 1833-1836 թթ. առաջին լուրջ քայլերը ձեռնարկեց՝ ընկձելու կիսանկախ իշխանությունները: 1833-1834 թթ. **Միրզա աղան** ևս ստիպված էր ճանաչելու օսմանյան գերիշխանությունը, որի հետևանքը **Ռեդվանում** թուրք կառավարչի (թրք. kaymakam) նշանակումն էր: Իսկ 1837 թ. Դիարբեքի կանչված եզդի ցեղապետը դավադրաբար սպանվեց: Նրա դիակը թիկնագործի գինվորները կարողացան տեղափոխել **Ռեդվան** և հողին հանձնել: Այս երևելի անձնավորությունը հավասարապես սիրված էր ինչպես ազգակիցների, այնպես էլ հայերի կողմից: Ի նշան երախտագիտության՝ ռեդվանցի հայերն ավանի եկեղեցու ձակտոնին արձանագրություն էին թողել՝ նրա հոգու հանգստության համար: **Միրզա աղայի** մահից հետո **Խարզանի (Սղերդ)** իշխանությունը սկսեց թուլանալ: Վերջնականապես այն ոչնչացնելու նպատակով, թուրքական իշխանությունները դիմեցին վաղուց արդեն փորձված միջոցին՝ բացեիբաց խրախուսելով **սիվանի, արվանցի, փանջնարի** վաչկատուն քրդերի **Խարզանում** և շրջակա գավառներում վերաբնակեցումը: Դա առաջ բերեց ոչ մահմեդական ժողովուրդների գանգվածային արտահոսք: Մասնավորապես եզդիների հիմնական մասն աստիճանաբար հեռացավ Հյուսիսային Իրաք՝ **Սինջար** (եզդ. Şāngal), հաստատվելով առ այսօր եզդի ժողովրդի հոգևոր կենտրոնը համարվող **Լալըշում** և շրջակայքում: **Խարզանում** նկատելիորեն նվազեց նաև հայերի և ասորիների տեսակարար կշիռը: Սրանով հանդերձ, գավառի ոչ մահմեդական բնակչությունը շարունակեց պահել իր գերակշռությունը: Անգամ թուրքական անկատար և զգալիորեն աղավաղված մի վիճա-

կազմության համաձայն, 1870-ական թթ. վերջին **Խարզանի** տարածքում (այն ժամանակ՝ բաժանված Դիարբեքիի նահանգի **Խարզան** և **Նախիրան** գավառների միջև) ոչ մահմեդականները կազմում էին բնակչության 62-63 %-ը: Ընդ որում, հայերն ամենամեծ էթնիկական տարրն էին (ավելի քան 44 %-ը): Իրականում նրանց թիվը, հետևաբար՝ տեսակարար կշիռը, անհամեմատ ավելին էին:

Համիդյան կոտորածների տարիներին **Խարզանի** հայ բնակչությունը ծանր կորուստներ կրեց, ավերվեցին տասնյակ բնակավայրեր, ահագնացավ արտագաղթը: 1915 թ. տեղի 10000-ից ավելի հայ բնակչությունը ենթարկվեց նոր արհավիրքների և զանգվածային կոտորածի: Խարզանցի վերապրած հայերը (ի դեպ, մեծ մասը քրդախոս էր, կային նաև արաբախոսներ) հիմնականում հաստավեցին **Հյուսիսային Սիրիայի Ղաճշի** քաղաքում (պատմական **Մծբինի** մոտ) և հարևան բնակավայրերում: 1930-ական թթ. կեսերին այստեղ տեղափոխվեցին նաև բնօրրանում մնացած փոքրաթիվ հայերը, ընդ որում, նոր կոտորածից խուսափելու համար (եղել են բազմաթիվ սպանությունների դեպքեր):

#	Բնակավայր	Եկեղեցի	Գպրոց	Այլ տեղեկություններ
1	Աբրկա (Ապրկա)			
2	Անդար (Անդար)			
3	Այնկար (Այնխար)	եկեղեցի		Գյուղից մի փոքր հվ-արևելք հայկական վանքի ավերակ կար:
4	Այնչորկ (Կանիչորկ, Կանիշորաղ)			
5	Ավիակ (Ավիշկ), Վերին			
6	Արանգ (Ականգ, Առնես)			
7	Բալբկա(ն)			Նորագույն ուսումնասիրությունների համաձայն (Բ. Հարությունյան)՝ Բալբկանից 2 կմ հվ-արև-մուտք՝ Բաղիշոջուր (Բիթլիս) գետի ստորին հոսանքի շրջանում, նույն գետի աջափնյակում բարձրացող Բերդ (թրք. Kale) լեռնագագաթի շրջանում է գտնվել Տիզրանակերտ մայրաքաղաքը: Գետի հանդիպակաց ափին գտնվում էր Բերդակ (աղավաղված՝ Birta) գյուղը, ուր ևս պահպանվել էին դեպի Չորա պահակ (Ռահվայի) լեռնանցք տանող գլխավոր ճանապարհը վերահսկող ամրոցի մնացորդներ:
8	Բաջրֆթ (Բաջութ)			
9	Բառընջ	եկեղեցի	1	Գավառակի (գյուղախումբ-նահիե) կենտրոն էր: Հիշատակվում է պատմիչ Փավստոս Բուզանդի մոտ՝ Բառալջ անունով:
10	Բայսըտուն (Բիսըթուն)			
11	Բարզան (Բրրզան), Ներքին			
12	Բարզան (Բրրզան), Վերին	եկեղեցի		
13	Բրվախս (Պեվախգ)			
14	Բիներ(իա)	Սբ Կարապետ (ավերակ)	1	
15	Բինարին			
16	Բիրբկ			
17	Բուրնդ	եկեղեցի (ավերակ)		
18	Բրիա (Պարահ)	Սբ Կիրակոս	1	Գյուղում գտնվում էր Տղա Մանուկ անունով մենաստան:
19	Բրուքան (Պրուզան)			

20	Բրբե (Պըրբ)			
21	Գառնըբ (Կառնըկ)			
22	Գրոգայդարա	եկեղեցի		
23	Գուրի (Գըրի)			Գյուղից շուրջ 4 կմ հարավ-արևելք գտնվում էր Ջոխերոդ (բրբռ. Ջոխափրոս , որտեղից էլ թրբ. Zokpirt) երբեմնի հայաբնակ գյուղը, ուր պահպանվել էին ամբողջի ավերակներ:
24	Գրեհասան			
25	Դըմսարըկ	Սբ Աստվածածին		
26	Դըլան (Տրիրան), Ներքին և Վերին			
27	Դիբե			
28	Դուսաղըբ	Սբ Աստվածածին	1	
29	Զվընկ			
30	Թախարի (Թաղարի, Թխրեկ)			
31	Թափե (Տապի)			
32	Թոժկան			
33	Թրբեսա(ն), Դրբեսա			
34	Լճիկ (Լիչըկ)			
35	Խաղրկան			
36	Խենդուկ (Խընդուկ)	Սբ Գևորգ		
37	Խուրին (Ղուրին)	եկեղեցի (ավերակ)	1	
38	Կանըկ (Խանըկ)			
39	Կանիխուլ (Օակաղբյուր)			Մոտակայքում պահպանվել էին 2 հայկական վանքի ավերակներ:
40	Կգըլան			
41	Կուլիկ (Խուլըկ)			
42	Հաղհաղըբ	Սբ Գևորգ	1	
43	Հալևի			
44	Հաջրե			
45	Հասհաս (Հըգհըգ)	եկեղեցի		
46	Հարֆաս (Հըրֆագ)			
47	Հաքամի(կ), Ներքին			
48	Հաքամի(կ), Վերին			
49	Հաֆըբ			
50	Հըգնամիր	եկեղեցի	1	
51	Հոպ(ե)	եկեղեցի		Մոտակայքում երևում էին հին բնակատեղիի ավերակներ:
52	Ճաման (Ճըման)			
53	Սայագըր			
54	Մալաֆան (Սըրֆան, Սլեկվան)	Սբ Գևորգ (կիսավեր)	1	Գավառակի (գյուղախումբ-նահիե) կենտրոն էր:
55	Մամլահա (Մամլայե, Աղահանըբ)			
56	Մարմարոնա (Մարմարոնա)			
57	Մեկիա	Սբ Աստվածածին		
58	Մեկիքան (Միլըքան)	Սբ Գևորգ		
59	Մըգե (Մըգի)			
60	Մըրեի(կ), Ներքին և Վերին			
61	Նագղար			
62	Շեխունուս (Շեխ Յունուս, Գոռտաշեն, Կոտաշեն)			

63	Զագնի (Զրգնե)			
64	Զալդարան (Զալդրկա)		1	
65	Զրնգարիկ (Ճամեգարրկ, Ոսկե-գետակ)			
66	Զոմանիկ	Սր Աստվածածին		Միտակայքում պահպանվել էին հայկական վանքի ավերակներ:
67	Զուվեյգ (Ճվահեգ)	Սր Աստվածածին		
68	Ռեդվան (Ռեդվան)	Սր Գևորգ (Մար Գորգիս), Սր Հակոբ	1	Ինչպես վերը նշեցինք, Ռեդվանը 19-րդ դ. նշանակալից բնակավայր էր, Խարզանի վարչական կենտրոնը, որի համար ժողովուրդն այն դիտարկում էր որպես «քաղաք»: 20-րդ դ. սկ. Ռեդվանը թեև խիստ ամայացել ու անշքացել էր, սակայն շարունակում էր մնալ Խարզանի առավել բազմամարդ բնակավայրերից մեկը և համանուն գավառակի (գյուղախումբ-նահիե) կենտրոնն էր: 1914 թ. հայերը կազմում էին Ռեդվան ավանի բնակչության շուրջ 60%-ը՝ ավելի քան 150 տուն:
69	Սալաս (Սալանգ)			
70	Սալիբա, Սլիվա (Խաս)			
71	Սարիբ			
72	Սևդիկ			
73	Սրբիկ(կ)			Ուներ հնագույն բերդ:
74	Սրչան (Սրճան)			
75	Վահարթ (Վարթթ)	Սր Հակոբ		
76	Տաթնո (Դարոնի)			
77	Տրրշան (Դեշան, Դերշվան)			
78	Փալոնիկ(կ), Պալունի	Սր Մինաս		Միտակա լքված բնակավայրը քրդերը կոչել են Bajefâ Xirab (իսն՝ «ավեր քաղաք»): Կարծիք կա, որ այդ բնակավայրն է համապատասխանում պատմական Աղձնիքի Արզան կամ Շուկատարա քաղաքին:
79	Քյոթիպ (Ղաթիպ)			
80	Քոխան			
81	Քուրդիկ			

19-րդ դ. վերջին-20-րդ դ. սկզբին հայաթափ եղած բնակավայրեր՝ **Բաղան**, **Բեյբու** կամ **Բեդո**, **Բզեգիա**, **Գոլամասիա (Զկնալիձ**, ուներ եկեղեցի), **Դյուշա** (XX դ. սկ. դեռ կիսավեր վիճակում պահպանվել էր երբեմնի հայկական եկեղեցին), **Զիարաթ** կամ **Վոսրդոռան (Վայս-ուլ-Կարանիե**, մահմեդական հայտնի սրբավայր և ուխտատեղի), **Զրննաֆ** (ունեցել է եկեղեցի՝ **Սր Մինաս**), **Խանրկ**, **Խոշյար** կամ **Կշլա**, **Խրբեղարե** կամ **Խոբե**, **Խրբեկակո**, **Խրբենըլա**, **Կանիբարազա (Վարազադբյուր)**, **Կանիսորիկ (Կանիսուրիկ)**, **Համդունան** կամ **Հրմդունա**, **Մարիբ** կամ **Մահրիբ**, **Զրմսարիբ**, **Ռաշոկ**, **Սեյիդ Մարիամ (Մերիեմ)**, **Սեհերդան** կամ **Մարդա**, **Սիլվասար** կամ **Սիլվառո**, **Սուլան Ներբին** (XX դ. սկ. դեռ կիսավեր վիճակում պահպանվել էր երբեմնի հայկական եկեղեցին), **Քուշանան**:

Բ. Բաղեշ (Բիթլիս) քաղաքը

Դեռ վաղ միջնադարում Բաղեշը Հարավային Հայաստանի նշանավոր բերդերից էր և ուներ բացառիկ կարևորություն Տավրոսի լեռնանշղթայի վրա գտնվող **Ձորապահակ** կամ **Բաղիշո** (ավելի ուշ՝ **Ռահվայի**) լեռնանցքով դեպի **Հայոց Միջնաշխարհ** ընթացող ռազմավարական և առևտրական մայրուղու պաշտպանության համակարգում: Ուշ միջնադարում **Բաղեշը** վերածվեց բազմամարդ և վաճառաշահ քաղաքի, որը մինչույն ժամանակ որոշակի ավանդ ունեցավ հայ մշակույթի զար-

գացման գործում: 16-րդ դարից սկսած՝ **Բաղեշ-Բիթլիսը** (նաև **Բեդլիս**) Արևմտյան Հայաստանի խոշոր վարչական կենտրոններից էր՝ քրդական **ռուզակի** (քրդերեն՝ roziqi) ցեղի կիսանկախ իշխանության կենտրոնը, ուր մեծ հեղինակություն ուներ նաև տեղի հայ ավագանին: Քաղաքի վերաբերյալ առաջին մանրամասն տվյալներին հանդիպում ենք նշանավոր Մխիթարյան միաբան **Ղուկաս Ինձիճյանի** խիստ շահեկան աշխատությունում¹⁶: Ուշագրավ տեղագրական և վիճակագրական տեղեկություններ է հաղորդում բժիշկ **Բարունակ** բեյ **Ֆերուհյանի** ուղեգրությունը¹⁷: Կարևոր է նաև Մխիթարյան միաբան **Ներսես Սարգիսյանի** ուղեգրական բնույթի երկը¹⁸: Սակայն **Բաղեշի** (Բիթլիս) մասին սկզբնաղբյուրների վիճակագրական և տեղագրական հաղորդումները հաճախանում են առավելապես 19-րդ դ. 70-ական թթ. վերջերից: Այս առումով ուշագրավ են Կ. Պոլսո Հայոց պատրիարք **Ներսես Վարժապետյանի** հանձնարարությամբ կազմված տեղեկագրերը¹⁹: Հետաքրքիր տվյալներ են հանդիպում նաև **Արիստակես Տեկանցի** և **Մանվել Միրախորյանի** ուղեգրական ու վիճակագրական բնույթի երկերում²⁰: Վերջիններիս գործերը կարևոր են հատկապես **Բաղեշի** հայկական եկեղեցիների ու վանքերի նկարագրության տեսանկյունից: Որոշակի հետաքրքրություն են ներկայացնում նաև **Գարեգին Սրվանձոյանցի**²¹ և **Ա-Դոյի (Հովհաննես Տեր-Մարտիրոսյան)**²² տվյալները: Անշուշտ, մեր ուշադրության կենտրոնում են եղել նաև 1912-1913 թթ. վիճակագրական տեղեկագրերը²³: Մխիթարյան միաբան **Համազասպ Ոսկյանի**²⁴ և **Տրդատ Պալյանի**²⁵ աշխատություններում ամփոփված նյութերի համադրումն օգնել է ամբողջացնել և հարստացնել քաղաքի սրբավայրերի վերաբերյալ տեղեկությունները: Որոշակի հետաքրքրություն է ներկայացնում նաև 19-րդ դ. 80-ական թթ. վերջին **Վանում** Ռուսաստանյան կայսրության փոխիյուպատոս **Ա. Մ. Կոլյուբակինի** աշխատության **Բաղեշին** նվիրված հատորը²⁶: Օտար հեղինակներից պետք է հիշել նաև անգլիացի **Հենրի Լինչին**, որի ուղեգրական ուշագրավ աշխատության մեջ գետեղված **Բաղեշի** արժեքավոր սխեմա-քարտեզն ուսումնասիրողին օգնում է ավելի լավ պատկերացնելու այն աշխարհագրական միջավայրը, ուր գտնվել է այս հայաշատ քաղաքը²⁷:

Բաղեշը կառուցված էր **Հայկական Տավրոսի** արևելյան հատվածում գտնվող **Ձորապահակ** կամ **Ռահվայի** լեռնանցքից շուրջ 26 կմ հարավ՝ **Բաղիշոջուր** (թրք. Bitlissuyu, նաև պարսկերենի ազդեցությամբ, Ab-i Bitlis) գետի գեղատեսիլ ձորահովտում: Քաղաքի բնակելի թաղերն ամֆիթատրոնաձև ցրված էին ինչպես վերոհիշյալ գետի հիմնական հունի երկայնքով, այնպես էլ վերջինիս մեջ թափվող

16 Տե՛ս **Ինձիճեան Ա.**, Աշխարհագրութիւն չորից մասանց աշխարհի, մասն առաջին: Ասիա, հատոր Ա, Վէնետիկ-Սուրբ Ղազար, 1806, էջ 167-176:

17 Տե՛ս **Բարունակ պեյի Ֆերուհյան**, Ճանապարհորդութիւն ի Բաբելոն ընդ Հայաստան, յամի Տեան 1847, Կ. Պոլիս, 1876, էջ 142-152:

18 «Տեղագրութիւնք ի Փոքր և ի Մեծ Հայս», **հայր Ներսիսի Սարգիսեան** Մխիթարեան վարդապետի, Վենետիկ, 1864:

19 Տե՛ս «Արձագանք», Թիֆլիս, 1882, N 4, էջ 56-57: «Մարդաթիւ և հարկահամար Բաղեշոյ վիճակի».- Նոյն տեղում, 1882, N 18, էջ 278: «Բաղեշ և իւր շրջակայք».- «Լոււմայ», Տիֆլիս, 1900, գիրք Ա, էջ 207-209:

20 Տե՛ս **Տեկանց Արիստակես**, Այցելություն ի Հայաստան: 1878 թ., Եր., 1985, էջ 93-98: **Մ. Միրախորեան**, Նկարագրական ուղևորութիւն ի հայաբնակ գաւառս Արևելեան Տաճկաստանի, Մասն Ա, Կ. Պոլիս, 1884, 53-59:

21 Տե՛ս **Սրվանձոյանց Գարեգին**, Երկեր, հատ. 1, Եր., 1978, էջ 411-414:

22 Տե՛ս **Ա-Դո**, Վանի, Բիթլիսի և Էրզրումի վիլայեթները, Եր., 1912, էջ 81-83:

23 Տե՛ս **Թեղդիկ**, Գողգոթա հայ հոգևորականության և իր հօտին աղէտալի 1915 տարին, Թեհրան, 2014, էջ 87-90:

24 Տե՛ս «Վասպուրական-Վանի վանքերը», Գ մաս, գրեց **դկտ. Հ. Համազասպ Ոսկեան**, Վիեննա, 1947:

25 Տե՛ս **Տրդատ Եպիսկոպոս Պալեան**, Հայ վանորայք, Սուրբ Էջմիածին, 2008:

26 Տե՛ս **Колобакин А. М.**, Материалы для военно-статистического обозрения Азиатской Турции, том 1, часть 1, Тифлис, 1888.

27 Տե՛ս „Bitlis and Environs“, Scale: 1 Mile=1 Inch or 1:63360 (էջ 146-147, ներդիրում).-„Armenia. Travels and Studies“, by **H. F. B. Lynch**, Volume II. Turkish Provinces, London-New York, 1900.

Խոցերու կամ **Խոսրովու ջուր** (կոչվում էր նաև **Գոնոց ջուր**, արևմուտքում), **Ծապրկորու (Ծապրկոր)** կամ **Պոռի ջուր** և **Ավելսու ջուր** (վերջին 2-ը՝ արևելքում) վտակների գառիթափերին: **Բաղեշը** կազմված էր մի քանի թաղերից.

1. **Թաղի գլուխ** (թրք. Taşmahallesi). գտնվում էր քաղաքի հյուսիսում: Այստեղ էր Բաղեշի առաջնորդանիստ **Կարմրակ (Կարմիրակ) Սուրբ Նշան** կամ **Սուրբ Կիրակոս** եկեղեցին, ուր պահվում էին **Քրիստոսի Խաչափայտի (Կենաց Փայտ)** մի կտորը, որին ագուցված էր կարմիր թանկարժեք քար (որտեղից՝ եկեղեցու անվանումը): Հատկանշական է, որ այն սրբություն էր նաև տեղի մահմեդականների համար: Եկեղեցուն պահվել են հայերեն բազմաթիվ ձեռագիր մատյաններ: Այս թաղում էին գտնվում քաղաքի գործարար կենտրոնը և շուկան:

2. **Ծապրկորու կամ Ծապրկորու թաղ** (թրք. Sapkör mahallesi). ընկած էր քաղաքի հուսիսարևելյան մասում՝ համանուն գետի ձորահովտում: Ժամանակին առանձին բնակավայր էր՝ **Բաղեշի** արվարձանը: Հայերն ունեին 2 եկեղեցի.

ա. **Սուրբ Սարգիս**, որի եկեղեցու ավագ սեղանի տակից բխող հորդ աղբյուրը՝ հատուկ ստորգետնյա խողովակներով, ջուր էր մատակարարում քաղաքացիներին:

բ. **Սուրբ Հինգվորան** կամ **Սուրբ Աստվածածին**, որը հայտնի էր նաև **Սրբոց Առաքելոց Պողոսի** և **Պետրոսի** անունով իր ճարտարապետական ոճով այս եկեղեցին հիշեցնում էր **Երուսաղեմի Սրբոց Հակովբյանց** վանքը:

3. **Ավեր (Ավել) մեղան**. գրավում էր քաղաքի հարավարևելյան հատվածը **Ծապրկորու ջրի** ձախակողմյան ձորահովտում: Հայերն ունեին **Սուրբ Գևորգ** անունով մի եկեղեցի: Թաղի մի մասը համանուն իսլամական սրբավայրի անունով կոչվում էր **Կզլմեշիդ** (թրք. Kızılmeşit, «կարմիր մզկիթ»): Ժամանակին այն հայոց **Մայր տաճարն** էր, որը, խլվելով հայերից, վերածվել էր մզկիթի: **Ավեր մեղանում** գոյություն են ունեցել ևս 2 հայկական եկեղեցիներ՝ **Սուրբ Սիմեոն** և **Սուրբ Կղեմես**, որոնք մոլեռանդ մահմեդականների կողմից նույնպես վերածվել էին մզկիթների: Ավեր մեղանում էին գտնվում բողոքական հայ համայնքի ժողովարանը և հայախոս **հակոբիկյան (յաղուբի)** ասորիների եկեղեցին:

4. **Գոնոց թաղ**. ընկած էր քաղաքի հյուսիս-արևմուտքում՝ գրավելով **Խոցերու ջրի** ձորահովիտը: Անունը կապվում է Բաղեշի արվարձանը համարվող **Գոմք** կամ **Գոմս** գյուղի հետ:

5. **Ջեղանի թաղ**. տարածվում էր **Գոնոց թաղից** հարավ և ընդգրկում **Խոցերու ջրի** աջափնյակը:

6. **Ավելսու թաղ**. գտնվում էր **Բաղեշի** հարավ-արևելքում՝ ընդգրկելով համանուն գետակի ձորահովիտը:

Բաղեշ քաղաքը հայտնի էր իր վանքերով, որոնք, ինչպես նշեցինք, միջնադարում հայ մշակույթի և կրթության կարևորագույն կենտրոններ էին: Առավել նշանավորն **Անյորդվու (Ամիրդուլու) Սուրբ Հովհաննես Մկրտիչ** վանքն էր, որը գտնվում էր **Գոնոց թաղի** հարավային մասում՝ **Խոցերու ջրի** ափին, ինչի համար էլ վերջինս կոչվել է նաև **Ամիրդուլու ջուր: Անյորդվու վանքը** հոգևոր-մշակութային մեծ վերելք է ապրել հատկապես 16-17 դդ.: Վանահայրեր **Բարսեղ Աղբակեցու (Գավառեցի)** և **Վարդան Բաղիշեցու** օրոք մենաստանը զգալիորեն բարեկարգվել ու ընդարձակվել է (այս երևելի հոգևորականների աջուններն ամփոփված էին նույն մենաստանում): Վանքում գործում էր վանական դպրոց, որի նշանավոր սաներից էին Կ. Պոլսի **Հովհաննես Կոլոտ** (1715-1741) և **Երուսաղեմի Գրիգոր Շղթայակիր** (1715-1749) հայոց պատրիարքները: **Անյորդվու վանքը** հայ գրչության կարևորագույն կենտրոններից էր, ուր ընդօրինակվել են տասնյակ գրչագրեր: Մինչև 19-րդ դ. 70-ական թթ. վանքը **Բաղեշի թեմի** առաջնորդանիստն էր: **Անյորդվու վանքին** կից կառուցված էր **Սուրբ Սիոն** տաճարը:

Քաղաքի շրջակայքում հայտնի էին մի քանի այլ վանքեր: **Ավելսու թաղին** կից գտնվում էր **Սուրբ Աստվածածին** մենաստանը (**Սուրբ Թաղեի վանք**), որի հիմնադրումը վերագրվում էր Սուրբ Թաղեոս Առաքյալին: Մոտակայքում բխում էին

Սուրբ Թադեոսի և **Սուրբ Թովմասի** բուժիչ աղբյուրները, որոնք միննույն ժամանակ նշանավոր ուխտավայրեր էին: Վանքում 20-րդ դ. սկզբին գործում էին դպրոց և որբանոց («**Ժառանգավորաց**»): **Ավելյու Սուրբ Աստվածածին** կից գտնվում էր հակորբիկյան (յաղուբի) աստիների **Մար Խումա** վանքը: Ժամանակին մեծ համբավ վայելող **Ծապրկորու Սուրբ Կարապետ** վանքը 20-րդ դ. սկզբին ավերակ էր և ամառի: Մեծ հռչակ ուներ **Խնդրակատար (Խնդիրկատար) Սուրբ Աստվածածինը**՝ Բաղեշից շուրջ 4 կմ հարավ-արևելք, **Բաղիշոջրի** ձախափնյակում: Վանքի հիմնադրումը դարձյալ վերագրվում էր Սուրբ Թադեոս Առաքյալին: Այդ իրադարձության, ինչպես նաև մոտակա **Ամպ** գյուղի մասին ժողովուրդը պահպանել էր գեղեցիկ ավանդագրույց: **Խնդրակատարը** նույնպես գրչության կենտրոն էր և հայտնի ուխտավայր: 1881-ից մենաստանում սկսել է գործել որբանոց և դպրոց: **Խնդրակատարի** շրջակայքում էր գտնվում նաև **Շեխիսի վանքը**, որը դեռ 18-րդ դ. բռնագրավվել էր մահմեդական մոլեռանդ հոգևորականության կողմից և վերածվել իսլամի հոգևոր դպրոցի (թրք. medrese): **Սուրբ Գևորգի** վանքը կառուցված էր քաղաքից հյուսիս-արևելք բարձրացող համանուն լեռան վրա՝ **Ծապրկորու ջրի** ձորահովտում: Իր վանքերով նշանավոր էր նաև քաղաքի արվարձանը համարվող **Գոմք** գյուղը, որի մասին խոսել ենք իր տեղում²⁸: Քաղաքի եկեղեցիներում և վանքերում պահվող ձեռագիր մատյանների թիվը 20-րդ դ. սկ. հասնում էր 80-ի:

Բաղեշի պատմական մյուս հուշարձաններից հայտնի էր քաղաքի միջնաբերդը՝ կառուցված **Խոցերու ջրի** և **Բաղիշոջրի** միախառնման մոտ բարձրացող դժվարամատչելի քարաժայռի գագաթին: Ուշագրավ է, որ ժողովրդական ավանդության համաձայն վերջինիս հիմնադիր է համարվել **Ալեքսանդր Մակեդոնացին: Սուրբ Գևորգի** լեռան գագաթին գտնվում էր **Դերդիվան** («**Տէրտիվան**») դիտակետամրոցը, որը հսկում էր **Բաղեշի** հյուսիսարևելյան մատույցները:

Քաղաքում Մեծ եղեռնի նախօրեին գործում էր 7 հայկական վարժարան (4-ը՝ տղաների, 3-ը՝ աղջիկների), որոնցից հայտնի են **Լուսավորչյան, Մեսրոպյան, Սուրբ Սարգսի, Վարդանյան** դպրոցները: Բաղեշում կար Կ. Պոլսի **Միացյալ Ընկերության** կողմից բացված կրթական հաստատություն: Նախակրթարաններ ուներ նաև հայ բողոքական համայնքը: Ծագումով բաղիշեցի էր աշխարհահռչակ գրող **Վիլյամ Սարոյանը** (1908-1981):

Մինչև 18-րդ դ. կեսերը **Բաղեշն** Արևմտյան Հայաստանի առավել բազմամարդ քաղաքային բնակավայրերից էր: Բացահայտորեն ուռձացված որոշ տվյալներով՝ քաղաքն ունեցել է 20000-25000 տուն բնակիչ: Սակայն քուրդ ավատատերերի պարբերաբար կրկնվող միջցեղային բախումները 18-րդ դ. 2-րդ կեսին բավական ամայացրին քաղաքը, ինչի հետևանքով բնակչությունը զգալիորեն նվազեց: Քաղաքին հզոր հարված հասցրեց նաև 1840-ական թթ. վերջին Բարձր Դռան կողմից քրդական կիսանկախ իշխանությունների դեմ կազմակերպած պատժիչ արշավանքը, որի հետևանքով առանձնակի ծանր կորուստներ ունեցավ տեղի հայ բնակչությունը: 1880 թ. **Բաղեշը (Բիթլիս)** դարձավ նորաստեղծ նահանգի կենտրոն:

Մեծ եղեռնի նախօրեին քաղաքի բնակչությունը կազմում էր շուրջ 30000 մարդ, որից 10000-11000-ը՝ հայեր (1500 տուն): Հարկ է նշել, որ 1895-1896 թթ. համիդյան ջարդերն էապես խաթարել էին **Բաղեշի (Բիթլիս)** ազգային նկարագիրը՝ ծանր կորուստներ պատճառելով հայությանը (ավելի քան 1000 զոհ): Սրանով հանդերձ՝ Բաղեշի հայերը մինչև 1915 թ. շարունակեցին իրենց ձեռքում պահել քաղաքի արհեստագործությունն ու առևտուրը: Հռչակված էին մասնավորապես բազմահմուտ բաղիշեցի վաճառականները, որոնց գործունեությունը տարածվում էր նահանգի սահմաններից դուրս մինչև Սիրիա և անգամ Կ. Պոլիս: Մեծ համբավ էին ձեռք բերել նաև քաղաքի «**շիլա**» կարմիր գործվածքի վարպետները, որոնց բարձրորակ

28 Տե՛ս «ՎԷՄ», 2016, N 4 (56):

արտադրանքն արտահանվում էր մեծ քանակությամբ: Բաղեշում լայնորեն տարածված և ամբողջությամբ հայերի ձեռքում կենտրոնացած արհեստներից էին **ջուլիակությունը, կաշեգործությունը (խաղախորդություն), ներկարարությունը, գինագործությունը, դարբնությունը, պայտառությունը, ոսկերչությունը, դերձակությունը, ոստայնանկությունը** ևն:

1915 թ. վաճառաշահ այս քաղաքի հայ բնակչության գերակշիռ մեծամասնությունը՝ շրջակա գյուղերի բնակիչների հետ, տարհանվեց «**Արաքի կարմունջ**» կոչվող վայր (**Բաղիշոջի** մոտ) և զանգվածաբար բնաջնջվեց: Բարբարոսաբար ոչնչացվեցին հայկական սրբավայրերը՝ այստեղ պահվող ձեռագրերով և եկեղեցական մյուս արժեքներով: Վերջին փրկվածները **Բաղեշը** լքեցին 1916 թ.:

Summary

HISTORICAL AND DEMOGRAPHIC IMAGE OF WESTERN ARMENIA ON THE EVE OF THE ARMENIAN GENOCIDE

Part eight: The historical and geographical province of Sasun and the city of Bitlis

Gegham M. Badalyan

Key words – Headmost villages, Holoyan–Petoyan, Talvorik, Khut–Brnashen, Hazo city, Khulp, Isyan principedom, Kharzan principedom, Taghi glukh, vicar church of Karmrak Surb Nshan, Aver meidan, Avekhu district, Tsaprkoru district, Gomotz district, St. John The Baptist of Amirdol, Khndrakatar Surb Astvatsatsin.

This article is devoted to the historical–geographical district of Sasun and to the town Bitlis. The district of Sasun, which occupies the most part of the southwestern province of Bitlis, has a unique place in the history of Armenia. Until the beginning of the 20th century, Sasun was the place where fragments of Armenian statehood were preserved. Semi-independent Armenian rule of Sasun was a federation of several noble families, where the dominant family was the Holo dynasty (Peto) with its branches. In Sasun an important role was also played by the Princes (Ishkhans) of Talvorik, Kajarents, Bermtsi and Asetsi. It should be noted that in some parts of Sasun (Khut–Brnashen, Kharzan or inland Sasun) in the 18–19th centuries there were mixed–national autonomous units, where, equally with the Armenians, the Yezidis and Kurds, who had penetrated into Sasun in the 15th and 16th centuries, had managerial rights. It should also be noted that members of the local Armenian council retained their high position and privileges in the west of Sasun (Koghb or Khulp) and in the southeast (Hazo–Khabiljos or Hazvan), where semi-independent Kurdish governments (hükümet) were formed. The most important role of Sasun is also visible in the preservation of the Armenian armed forces. A number of facts make it possible to assert that the military forces of the districts of Upper Sasun (Shatakh, Tsovasar, Talvorik, Psank, Ishkhandzor) reached 4–4.5 thousand as a whole in the 80–90s of the 19th century. Unfortunately, as a result of the treacherous policies of the Ottoman state power in the late 19th century, the Armenian rule of Sasun was significantly weakened and lost its positions. Nevertheless, in the 1890s, the Armenians of Sasun again assumed the role of the flagship of the strug–

gle for freedom, rebelling against the Turkish–Kurdish dictatorship. The tragic events of 1894 and 1904 did not break the rebellious spirit of the Sasun Armenians. Moreover, despite the large losses, the overwhelming majority of the population in Sasun until 1915 was still Armenian, i. e. 55000–60000 people. Meanwhile, the population of Upper Sasun was only Armenian. The tragic year of 1915 was a year of severe trials for the heroic Sasun. The advantage of the enemy did not discourage the freedom-loving inhabitants of Sasun, who had been in battle for life and dignity for the last six months. With terrible losses, 11,000 Armenians from various provinces of Sasun were able to move to Taron in 1916, whence they moved to Eastern Armenia, where they made a great contribution to the noble cause of gaining Armenia's independence. It should be noted that even the infernal conditions could not completely destroy these mighty people of the sacred land. And even today the Armenian highlanders live lives in some parts of Sasun.

The mountainous town of Bitlis (Baghesh) was a well-known handicraft and trade center of Western Armenians. But Bitlis was famous primarily for his spiritual and cultural centers. In the late Middle Ages, the monasteries and churches of St. John the Baptist of Amlordvo (Amirdolu), St. Astvadedzin (the mother of God) (the monastery of Saint Thaddeus), Surb Karapet Tsaprkoru, Khndrakatar of St. Mary's, Tatraakabnak St. Astvadedzin (the mother of God) or the monastery Gomots, Karmrak (Karmirak) surb Nshan or St. Kirakos were known here. Turkish–Kurdish violence had serious negative consequences also for this densely populated Armenian city, where in 1915 the Armenian population was sharply reduced to 10,000–11,000 (total of 30,000). Despite this, Armenians were engaged in trade and crafts in the city before 1915. The Armenian Genocide almost completely destroyed this part of the Armenians in their homeland.

This article summarizes the study of the demographic situation in 1914 in the three most important vilayets of Western Armenia – Van, Erzurum and Bitlis. It should be noted that the current study, which covers mainly the borders of Wilsonian Armenia, will be continued. We are planning, after some pause, to proceed to other vilayets in order to complete the study of the historical and demographic image of Western Armenia on the eve of the Armenian Genocide.

Резюме

ИСТОРИКО–ДЕМОГРАФИЧЕСКИЙ ОБЛИК ЗАПАДНОЙ АРМЕНИИ НАКАНУНЕ ГЕНОЦИДА АРМЯН

Часть восьмая: историко–географическая область Сасун и
город Битлис

Гегам М. Бадалян

Ключевые слова – Передовые деревни, Оляян–Петоян, Талворик, Хут–Брнашен, город Азо, Хулп, княжество Исяна, княжество Харзана, Тахи глух, викарная церковь Кармрак Сурб Ншан, Авер мейдан, район Авеху, район Цапркору, район Гомоц, Святой Иоанн Креститель Амирдола, Хндракатар Сурб Аствацацин.

Данная статья посвящена исследованию историко–географической области Сасун и одному из самых известных центров Западной Армении – городу

Битлис. Сасун, который занимает большую часть юго-западного вилайета Битлис имеет уникальное место в истории Армении. До начала 20-го века Сасун был тем местом, где сохранились фрагменты армянской государственности. Полунезависимое армянское правление Сасуна было федерацией нескольких дворянских семей, где доминирующей семьей была династия Холо (Пето) со своими ответвлениями. В Сасуне важную роль играли также ишханы Талворика, Каджаренц, Бермци и Асеци. Следует отметить, что в некоторых частях Сасуна (Хут-Брнашен, Харзан или внутренний Сасун) в 18-19 вв. существовали смешанные национальные автономные формирования, где на равне с армянами управленческие права имели также езиды и курды, проникшие в Сасун в 15-16 вв. Следует также отметить, что на западе Сасуна (Кохб или Хулп) и на юго-востоке (Азван или Азо-Хаблджоз), где образовались полунезависимые курдские правления (hükümet), члены местного армянского совета сохранили свое высокое положение и привилегии. Наиважнейшая роль Сасуна видна также в сохранении армянских вооруженных сил. Ряд фактов позволяет утверждать, что военные силы уездов или малых уездов Верхнего Сасуна (Шатах, Цовасар, Талворик, Псанк, Ишхандзор) в целом в 80-90-х годах 19-го века достигли 4-4,5 тыс.

Результате политики Османской государственной власти в конце 19-го века армянское правление Сасуна было значительно ослаблено и утратило свои позиции. Тем не менее в 1890-х годах армяне Сасуна вновь взяли на себя роль флагамена борьбы за свободу, восстав против турецко-курдской диктатуры. Трагические события 1894 и 1904 годов не сломили мятежный дух Сасунских армян. Более того, несмотря на большие потери, до 1915 года подавляющим большинством населения в Сасуне по-прежнему были армяне, 55000-60000 человек. А население Верхнего Сасуна было только армянским. Трагический 1915 год был годом жестоких испытаний для героического Сасуна. Преимущество врага не обескуражило свободолюбивых жителей Сасуна, которые в течение полугода были за жизнь и достоинство. Неся ужасные потери, 11 000 армян из различных провинций Сасуна смогли в 1916 году перейти в Тарон, откуда перебрались в Восточную Армению, где принесли большой вклад в благородное дело завоевания независимости Армении. Следует отметить, что даже адские условия не смогли полностью уничтожить этих могучих людей священной земли. И сегодня в отдельных частях Сасуна живет армянин-горец.

Горный город Битлис (Багеш), был известным ремесленным и торговым центром западных армян. Но Битлис был знаменит в первую очередь своими духовными и культурными центрами. В позднее средневековье здесь были известны монастыри и церкви Святого Иоанна Крестителя Амлордво (Амир-долу), Святой Марии (монастырь Святого Фаддея), Сурб Карапет Цапркору, Хндракатар Святой Марии, Татракабнак Святой Марии или монастырь Гомоц, Кармрак (Кармирак) сурб Ншан или Сурб Киракос. Турецко-курдское насилие и погромы 1890-х годов имело серьезные негативные последствия также для этого густонаселенного армянского города, где до 1915 года армянское население было резко уменьшено до 10000-11000 (общее число 30000). Несмотря на это, армяне до 1915 года занимались торговлей и ремеслами. Геноцид армян почти полностью уничтожил и эту часть армян на их же родине.